

BUMWE



Twasàkidila, Mwanèètù Orman. Mukalenge àkubènèshè.

Mwoyi wènù awu mu dindà emu, balundà bàànyì. Mbilenga be bwà kwikala cyàkàbìdì kaaba aka mu tabernacle mu dindà emu. Nènku mvwa mwimàne ànu lwà paanyimà apu munkaci mwà kutèèleja, pâmvwà mbwela apu, nè kuumvwa cipròfetà cipàtuka mu dyakula dyà mu myakulu, nè dyandamuna. Ke mèmè kwambila musumbà awu nè cibambalu cyàcya ncyùlè kàbìdì, ke mèmè kwamba nè: “Ncyèna mumanyè to, ncyèna mwakùle nè muntu ewu to” (Awu’s ùvwa m’Mwanèètù Higginbotham, bu mèmè mwà kwikala mûmvwe muntu awu bîmpè.) “kùkaadi ntàntà mule. Kùkaadi ngondo kacya ànu ngàmulabula nànsha ku cyanza.” Kàdi aci’s ke menemene cîndì ngààkulapù, cidiye mwambè mu dindà emu aci, ànu menemene cîndì ngààkulapù. Kàvwa mucimanyè to. Mèmè mwinè ncivwa mucimanyè to ànu too nè mu katanci kakesè emu, cîmvwà nè cyà kwakulapù aci. Nènku aci’s ke cyôcì, cyàmbiye ànu pa dîbà adi aci. Pa nànkù tudi nè disànkà dyà kumanya nè tudi badisangishe mu Dinà dyà Mukalenge Yesù, nè mwînshì mwà mapwàpwà Èndè makùbi.

² Mpindyewu, ndi mmòna bààbûngì biimàne kuulu, mwaba mmùle tètè nè mupàtàkàne, nè tudi ànu tuumvwa bibi bwà kumòna nùnkù. Nènku, patùdì ànu nè twâpeci mùshindù, netùcivwijè cishìlàngàne kaaba aka, tabernacle mutàmbe bunène. Mpindyewu, ndi muswè kufila mulubù wà ku Phoenix ànu lùkàsàlùkàsà.

³ Mwva kaaba aka mu dilòlò dyà dyàlumingu dishààle nè mwakùle pa cyena-bwalu cyà *Mèèsà à Mukalenge* kùdì... kumpàlà kwà mudimu wà mèèsà à Mukalenge. Bwobùmwe kî nkwangata dyàmpà to, *kwenza bwobùmwe* mbwena kwamba nè “kuyiikila nè, kwandamuna ku muyiiki, kuyiikilangana nè muntu kampàndà.”

⁴ Nènku mpindyewu mu dindà emu, mèmè mutàmbe kuleepeshakù ndambù, mòna’s, muntu kampàndà àshintakajèku nkwasà nè bàdì biimàne kuulu abu, nènku necyànyishiiwbè, kubàlekelakù bàsombèku panshì bwà katanci kakesè. Ndi—ndi nè bujitu mu mwoyi bwà cikondo citùdì nè mwoyi eci. Ndi nè bujitu bwàbûngì, bwàbûngì be. Pàndì mmòna bintu munkaci mwà kwenzeka bîndì mmòna byènzeka ebi, kùdì cintu kampàndà munda mwànyì cidi cìvwànduluka. Nènku ndi njinga ànu kwangata dîbà dyànyì bwà kuteeta bwà. . .

⁵ Diyiisha dyà mu dindà emu edi ndi ngààkula pa cyena-bwalu cyà *Bùmwe*. Nènku ndi—ndi muswè kwangata dîbà dyàbûngì bwà kuteeta kucivwija ànu. . . kudyàdija patòoke mu mùshindù

ànu mupwàngàne ùndiku pàànyì mumanyè awu. Nènku ndi dijinga nè masambila ènù bu munùdi bakùngwile emu.

⁶ Nènku mpindyewu ndi muswè bwà nùbuululè, panwikalà nè Bible nè baswè kubala pàmwè naanyì, ku nshapità 1 wa Ebèlù, dyàmbedi. Nènku ndi muswè kubala mvensà yìsàtù yà kumpàlà yà nshapità 1 wa Ebèlù, nè pashìishe Genèsè 1.26 nè 7, bwà kubitwàngaja pàmwè. Nènku muntu nànsha umwe kèna mwà kwamba cintu nànsha cimwè cyà mushinga pàdi Nzambi kàyì mumukwàcishe bwà kucyàmba nànsha. Nènku—nènku aci cidi nànkù bwà Diyiisha dyà mu dindà emu, kàbìdì, dyà bùmwe bwà bantu nè Nzambi. Mpindyewu mu Ebèlù nshapità 1, tudi tubala nùnkù.

Nzambi, uwua mu bikondo byà kale . . . mu mishindù mishilèshilàngàne mwakwile mu bikondo byà kale nè baataatù ku baprófètà,

Mu matùkù à ndekeelu aa mmwakwile neetù ku wèndè . . . ku Mwanèndè, udiyè mutèèke mupyànyì wa bintu byònsò, ku yéyè kàbìdì nkwàkenzàye buloba;

Uwua mwikàle mu dibàlakana dyà butumbi bwèndè, nè cimfwànyì citòòke tòò cyà mupèrsònà wèndè, nè mwimanyishe bintu byònsò ku diyì dyà bukolè bwèndè, pààkakezulàye yéyè mwìnè mpèkaatù yètù, wàkasòmba ku dyàbalumè dyà Mutàmbe bunène wa mu dyulu;

⁷ Nènku mpindyewu mu Genèsè, nshapità wa—wa 1 ku mvensà wa 27, wa 26 nè wa 27, ndi mbala eci.

Ke Nzambi kwamba nè: Twènzàayi muntu mu cimfwànyì cyètù, bilondèshile difwàangana dyètù: nè bìikalè nè bukolèkeshi pa mishipa yà mu mbù, nè pa nyuunyi yà muulu, nè pa nyama, nè pa buloba bujimà, nè pa cintu cyònsò cidi cidikòka pa buloba aci.

Ke Nzambi kufùkayè muntu mu cimfwànyì cyèndè yéyè mwìnè, mu cimfwànyì cyà Nzambi ke mwàkamufùkàye; wàkabàfuka mulùme nè mukàji.

⁸ Mpindyewu twinyikàayi mitù yètù bwà katanci kakesè cyanààna patùdi tusambila apa. Nè ndi mutwishìibwe nè kùdi malòmba àbùngi mu batèèleji bùngi nùnkù, pa nànkù pàmwàpa twèla ànu cianza muulu kùdi Nzambi, ewu udi nè dilòmba awu, nè ku cyòci eci àmanyishèku nè tudi nè cintu kampàndà citùdi tujingila disambila. Nzambi enzèku nànkù bwà yònsò wa kunùdi.

⁹ Mukalenge, tudi badìsangìshe mwìnshì mwà musàkà wà tabernacle ewu, nè tudi nè kusàkidila bwà kwikala nè musàkà kumutù kwètù leelù ewu, kàdi dikùngwila dyètù pàmwè dīvwa bwà kiipàcìlā katàmbe eci ku bunène. Tudi tumvwa nè ku mulayì wà Nzambi tudi badìsangìshe mwìnshì mwà mapwàpwà à Wa bukolè bwònsò. Bwà nè Yéyè, bu mùdi nzòòlo wa cikuka

mwà kubwikila twànà twèndè twà nzòòlo amu, wàtùkùbakù ku cyònsò citùdi tujinga bwà kutùkubaYè ku cyòci aci. Bwà nè Yèyè wàtùbwikilaku mapwàpwà nè kutùdiisha nè wàtùpèèshaku leelù ewu cyàkudyà cyètù cyà bwàcyàbwàcyà, nè cyà mubidi nè cyà nyumà bwà twamòna mwà kupeta dikàndà dikànkamiki dyà mubidi bwà kwendakana pa buloba, nè bukolè bukànkamiki bwà Nyumà Mwìmpè bwà kutwàla Dìyì dyà Nzambi kùdi cisàmbà cìdi nè nzala. Nè kuumuka mwab'ewu biikàle Naadi ku mishikù yètù nè mu myoyi yètù, nè dilaabiibwa dyà Maanyì dipyadìpyà bwà twamòna mwà kwikala bakùmbàne bwà kwambila bakwàbò bwà ditùkù ditùdi nè mwoyi edi, nè ngiikàdilù wa cikondo. Nzambi, tudi baKweyèmène mu byònsò. Kakwèna mwaba mukwàbò nànsha wùmwe mushààle wùdi muntu nànsha umwe mwà kuya to. Tudi tudyùmvwa bu mwàkadyùmvwà Peetèlò, ditùkù adi pàakambà Yesù nè: “Kanwèna nuya pèènù anyi?”

¹⁰ Yèyè kwamba nè: “Mukalenge, kutùdi bafwànyine kuya ki kwèpi? Wèwè nkààyebe ngudi nè Mèyi à Mwoyi wà Cyendèlèlè.” Nènku ke bwà cinyi tudi badisangishe mu Dìna Dyèbè mu dindà emu, bwalu Wèwè nkààyebe ngudi nè Mèyi à Mwoyi wà Cyendèlèlè. Nènku tudi tulòmba bwà Ûvwijèku eci cilelèlè menemene kùdi yònsò wa kutùdi leelù ewu bwà myoyi yètù yàlakuka kapyà munda mwètù. Misùukà yètù neyikalè mikolèshìibwe, mibidi yètù myondòpìibwe, nyumà yètù myondòpìibwe, misùukaà yètù mivwijìibwe mipyamìpyà, mifùkiibwe bilondèshile cimfwànyì cìdi Nzambi muswè bwà twètù kwikala naaci.

¹¹ Taatù, ndi ndòmba bwà Ûfilèku dikàndà kùdi aba bàdi biimàne mu bibambalu nè ku nyùngulukilu wa bimanu abu, nè lwà mu lutanda amu. Ndi ndòmba bwà Wèwè kubàpa dikàndà. Nènku, bu mutùdi bamanyè nè eci cìdi cikwàciibwa pa mukàbà wà mèyi, wàyà ku matùnga mashìilèshìilàngàne àbùngì, mu matùnga nè bisàmbà byà pa buloba. Nènku, Nzambi, tudi baKweyèmène mu kaabujimà. Tùpèèshèku ànu dikàndà nè—nè Dìyì nè dilaabiibwa, bwà kwikalabi ànu mu mùshindù wùvwà Wèwè muswè bwà kwikalabi bwà dìbà edi. Tudi tudilàmbula twètù biinè Kùdi mpindyewu, ditèeleja dyètù, dìyì dyètù, ntèmà yètù, cyònsò citùdi aci, tudi tuKulàmbulaci, bwà Wèwè wamòna mwà kubwela munda mwètù. Kukwàtakù mudimu munda mwètù nè kumwènesha Bwikadi Bwèbè bunène kutùdi. Bwalu tudi tulòmba nùnkù mu Dìna dyà Yesù, Mwan'Èbè. Amen.

¹² Mwàkù ewu *bùmwe* wùdi wùmvwija nè “kwikala umwe nè.” *Bùmwe*, “basanga.” Nènku, mpindyewu, eci's ncyena-bwalu ànu cyètù cyà bushùwà eci, nè cìdi—cìdi cikùmbanyina ntèmà yàbùngì kutàmba yìndi mwà kucipèèsha, nè kutàmba yìdi muntu kanà yònsò wa pa buloba ewu mwà kukùmbana kufila. Kàdi ndi muswè kunùleeja patòoke wanyì mmwènenu pa bwalu abu, nè, ku ciikalà Nzambi mwà kutùpèèsha aci. Mpindyewu, mu

cyôci eci, nkùfilà kwà dilongesha. Nènkù kùdì bàna bèètù bàdì mwà kutèeleja mukàbà wà mèyì ewu, ndi ntèkemena nè kacýàkwikala cilèndwishì to, kàdì neciikalè bwà kunùfikisha ku dyangata cyôci nè musinga menemene, mu dikenketa dîmpè's, èyowà. Bwà nwamòna mwà kucilonga mu disambila dikolè, nè dibàbidila dyònsò, nè kucýèla ku cipimu cyà Díyì dyà Nzambi, bwà kumòna nè Cidi cyà kùdì Nzambi anyi to.

¹³ Bwalu ndi ngiitabuuja nè mùshindù awu ke ùvwà ùkèngela bwà twètù kwenza misangu yònsò, kwela bintu ku cipimu cyà Díyì, bwalu Díyì ke Cintu cimwèpelè ciikalà mwà kukùmbana bwà kushàalakù. Yesù wákamba nè: “Dyulu nè buloba byònsò bibìdì nebijiminè, kàdì Díyì Dyànyì kadyàkujìminakù to.” Ke bwà cinyì ndi nDiitabuuja, nè kwitabuuja nè Didi ndongamu wa Nzambi. Ndi ngiitabuuja nè Aci ke mudimu mowela byanza wà Nzambi mufùnda mu Díyì. Ki bwà cinyì, bu cintu kampàndà mwà kwikala cibèngàngàna nè Díyì adi, kí ncifwànyine kwikala Nzambi anyi ndongamu wa Nzambi to. Ndi ngiitabuuja nè Didi ndongamu. Mpindyewu, Nyumà wa Nzambi mu Díyì ùdì wènzà nè Díyì diikale nè mwoyi Dyòdì diinè, bwà kuDipàtuladi patòòke. Ùdì ùfikisha Díyì ku diikala nè mwoyi, bu dimiinu.

¹⁴ Mpindyewu, mulùme wa kumpàlà nè mukàji wa kumpàlà mu budimi bwà Edènà bàvwa mu dipetangana dipwàngàne nè Nzambi, mu mùshindù wà nè Nzambi ùvwà mwà kupweka panshì mu dîbà kanà dyònsò diwàYe mwà kujinga bwà kuyiikila nè Adàmà nè Evà mpàla nè mpàla. Mpindyewu, aci's ke bùmwe bupwàngàne, Nzambi nè bufùki Bwèndè, Nzambi wàkula mpàla nè mpàla nè Adàmà nè Evà. Nènkù bàvwa bapwàngàne mu dyumvwangana dyà menemene nè Nzambi mu mùshindù wà nè bàvwa umwe nè Nzambi. Nzambi nè dîkù Dyèndè bàvwa umwe.

¹⁵ Muntu kanà yònsò ewu nè dîkù dyèndè, dîkù dijaalàme, dîmpè, dyà nsòmbelu mulenga, dyà ditùmikila didi dipetangana muntu nè mukwèndè, dîkù kanà dyònsò edi. Nènkù kwòkò cintu kampàndà mu dîkù cidi cibàtāpulula, dîbà adi kí mbîmpè to, dîkù ndikòsòlòke mwaba kampàndà. Bìvwa bikèngela bwà bònsò kwikalabò umwe, taatù nè maamù, maamù nè taatù, bàna nè muledi, muledi nè bàna, bònsò mu dyumvwangana. Nènkù, panùdì numòna aci, nenùmonè cimfwànyì cilenga cimwèpelè.

¹⁶ Ke kiipàcilà kàà Nzambi nkòkò aku. Nènkù kiipàcilà Kèndè bu Taatù, wa kumutù kwà bònsò, kàvwa kàà kwikala umwe nè dîkù Dyèndè, dîkù dyà pa buloba, Adàmà nè Evà. Nè mùshindù wùmwepelè wùvwàbokù bafwànyine kwikala umwe nè dîkù, anyi nè Nzambi, mbwalu ngiikàdilù wa Nzambi ùvwà munda mwàbò. Pa nànkù aci kubàvwijaci nè ngiikàdilù wa Nzambi munda mwàbò, pashishe muntu nè mukwèndè nè Nzambi, bàdì bàlwa bònsò umwe. Aci kí ncimfwànyì cilenga anyi, Nzambi mu dîkù Dyèndè, Taatù kumutù kwà bònsò, wa kumutù kwà bònsò! Kakùyì lufù, kakùyì dibungama, kakùyì māsāamā à mwoyi, cintu nànsa cimwè; ànu disànkà kadiyì kwamba; kabàyiku

mwà kusaama, kabàyiku mwà kupeta disaamà dyà mwoyi, ànu umwe nè Nzambi! Cìmfwànyì kaayipu's wè! Bwalu, ngiikadilù mene wa Nzambi ùvwa munda mwà bantu aba. Nenku ki bwà cinyi, cyàkenzàbo, bàakalonda ànu mu njila wa Nzambi, nè Nzambi mwikàle naabò kubàvwijaci umwe.

¹⁷ Mpindyewu, Yesù wàkasambila, mu Yone, nshapità wa 17 ku mvensà wa 11, nwènù bàdì bafùnda byena-bwalu byà kàlaasà kàà Dyàlumingu ebi. Ndi naabi byàbúngì mu dindà emu. Yone 17.11, Yesù wàkasambila bwà Èkèleeziyà nè Yèyè bààmòna mwà kwikala umwe bu mùvwà Yèyè nè Taatù biikàle Umwe. Bwà nè Èkèleeziyà, twètù bu bidimba byà Mubidi wà Kilistò, twamòna mwà kwikala umwe, pàmwè, ànu bu mùdì Yèyè nè Taatù biikàle Umwe amu. Nènku mu ditùkù adi tuvwa bafwànyine kumanya nè Yèyè ùvwa munda mwà Taatù... Taatù munda Mwèndè, nè Yèyè munda mwètù, nè twètù bònsò pàmwè tuvwa umwe. Nsangilu kaayi, bùmwe bùvwà mwà kwikalakù, bwà kumòna Nzambi mu Èkèleeziyà Wèndè mu mùshindù wà nè cidimba cyònsò cidi ànu mu dipetangana menemene muntu nè mukwèndè nè Nzambi. Ke Èkèleeziyà udi Yesù ùlwila awu's. Ke dìbà dyàndamunyiibwà disambila Dyèndè, dyà nè twikàlè umwe.

¹⁸ Nènku ke mwaba wùmwpèlè wà bwobùmwe wùkaadiku Nzambi mutèeke bwèndè Yèyè nè Èkèleeziyà Wèndè, mbùmwe bwèndè Yèyè mwinè mu bantu. Ke mwaba wùmwpèlè wà bwobùmwe ngwòwò awu. Nè mùshindù wùmwpèlè wùdiku mwà kupeta bishimikidi abi nku didisanga, bwà kudisanga Nèndè bwà kashidi. Ànu bu mùdì udisanga nè bàyeebè, mukàjì ùdisanga nè bàyèndè, mmucipù wà nè too nè ku lufù. Mpindyewu, dìbà adi paùdì udisanga nè Nzambi, ncintù cìmwècimwè pàdì èkèleeziyà ùdisanga nè Kilistò, cidi too nè pààtùtápululà lufù. Nè pashiishe wèwè kùyiku mwenze mpèkaatù anyi mwenze cintu kampàndà cyà cibi to, newikalè muswikàkàne nè Nzambi Cyèndèlèlèlè. Nènku ànu lufù ke lùdì mwà kukuumusha kùdì Nzambi, nè kaciyi lufù lwà mubidi to, kàdì mpèkaatù wa lufù. Mpèkaatù ndufù, nè aci cidi cikusàka kule nè Nzambi. Pa nànkù, bwà kudisanga Nèndè mu Nyumà wa bukolè Bwèndè, m'Mwoyi wà Cyèndèlèlèlè, udi mudisangè Cyèndèlèlè nè Nzambi. Kaa, ndi muswè kukùfika paanyimà pàà katanci. Badisange Cyèndèlèlèlè nè Nzambi wa Cyèndèlèlèlè, mu dinwàngana dyà menemene Nèndè, bidisange pàmwè ànu menemene, Èkèleeziyà udi byònsò, bònsò bàbìdì Nzambi nè Èkèleeziyà Wèndè, bàdì umwe, badisange pàmwè.

¹⁹ Nènku bu nwènù mwà kumòna mùvwà Evà mudisangè nè Adàmà, mukàjì wàkalwa citùpà cyèndè. Nzambi, nuvwakù bamòne mu Genèsè 1.27, Yèyè wàkafùka muntu mulùme nè mukàjì, Wàkabàfùka. Mpindyewu, muntu awu ùvwa... bònsò bàbìdì mulùme nè mukàjì pààkakèngelàbi bwà kwikala mu nyumà wa bukàjì nè bulùme. Pashiishe Nzambi kwangata mu luseke lwèndè lu—lubadi. Nukààvwakù bamòne nè citùpà cyà

mubidi aci cìvwa cintu cyangata ku cikwàbò, kàdi kaciyì nyumà anyì? Citùpà cyà mubidi wà mukàji cìvwa cintu cyangata ku cikwàbò, paanyimà pàà bufùki bumanè kujika, Nzambì wàkangata mu luseke lwà Adàmà amu lubadi nè kwenza mukàji. Kàdi kí n'nyumà to, nyumà awu ùvwa citùpà cyà Adàmà, bwalu yêyè ùvwa byònsò bibìdì mulùme nè mukàji, bukàj-... mu ngaakwilù wa nyumà, byònsò bibìdì bulùme nè bukàji.

²⁰ Mpindyewu, kanwènaayikù numòna cimfwànyì cinène aci anyì? Twètù, mu mubidi, tudi bashiilàngàne. Tudi bu cintu cyangata ku cikwàbò, muntu mufùkiiibwe, ku nsòmbelu wa cijila wa bantu basèlàngàne. Kàdi mu Nyumà tudi bânà bàà balùme nè bàà bakàji, kí nyumà mukwàbò kampàndà to, kàdi Nyumà wa Nzambì udi nè mwoyi. Tudi mu difwànangana Nendè, mu bwobùmwe Bwèndè, mu cimfwànyì cipwàngàne cyà Nzambì udi nè mwoyi, bwalu tudi tulwa bânà bàà balùme nè bàà bakàji. Katùyì batàpùlùke to, kàdi Nyumà umweumwe awu, Nzambì umweumwe awu, Mupersonà umweumwe awu, muswikàkàne mu dibàkà ku wa Cyendèlèlè. Nudi numòna mwàkacilongololà Nzambì's bwà twètù kwikala katùyì bashiilàngàne to, kàdi ànu Yêyè's! Kí munga muntu kampàndà wa mu cìfuku cikwàbò to, kàdi didìsanga dilelèlè nè mùtòlokù wà Wa Bukolè bwònsò, byenza ku disangila dyà cijila. Mpindyewu, mubidi wùdi wùfùmina kùdi maamù nè taatù, kàdi Nyumà ùdi ùfùmina kùdi Nzambì, Nzambì ùDitàpulula bu mùvwà Adàmà mutàpùlùdiiibwe amu.

²¹ Mu Ditàkù dyà Mpenta, tudi tusangana Nyumà Mwimpè, Dikunji dyà Kapyà, ùDitàpulula Yêyè mwinè nè ùsòmbela pa cidimba cyònsò cyà Èkèleeziyà awu, Nzambì ùDitàpèka Yêyè mwinè pàmwe's! Pashiishe nè kasumbù kàà bantu aku pàmwe, cidi cyèza cinyi? Ùdi wàlujulula Mubidi musanga pàmwe wà Mukalenge Yesù awu. Ùdisanga pàmwe!

²² Nènu leelù ewu mu ditàpuluka dinène ditùdimu nè mwoyi edi, dishiilangana dyà cyena-dingumba nè bikwàbò, luse kaayi's wè, mbundù kaayi's wè!

²³ Baswikakaja mu dibàkà dyà mu Dyulu nè Nzambì wa Cyendèlèlè, citùpà Cyèndè, citùpà cyà Nzambì. Mu mubidi ndi mulwè Branham bwalu taatù wanyì, m'Branham. Udi ulwa citùpà cyà tatwèbè nè mamwèbè, kàdi mu nyumà tudi tulwa mu bwobùmwe nè Nzambì, citùpà cyà Nzambì. Ke bwà cinyi nyumà kèna mwà kufwà to. "Ewu udi ungiitabuuja Mèmè ùdi nè Mwoyi wà kashidi. Nè mu cimfwànyì cidiye pa buloba apa, nè mu difwànangana dyèndè, Mèmè nèmmbiishè ku lufù mu matùkù à ndekeelu." Kí mmuntu kampàndà wa nyumà to, bwalu netwikalè nè mubidi mufwànàngàne nè mubidi wà butumbì wà Nzambì, mubidi mutumbiishèbwe wà Mukalenge Yesù, mubiishèbwe mu Cimfwànyì Aci.

²⁴ Yesù wàkamba, wènda ùya mutàngile ku lukità lwà Lazàrò

nè: “Mémè ndi dibiikà dyà ku lufù nè Mwoyi. Ewu udi ungiitabuuja Mémè, nànsha yèyè mufwè, kàdi yèyè neikalè nè mwoyi. Nè ewu yònsò udi nè mwoyi nè ungiitabuuja Mémè kàadyàkufwàku to. Udi wiitabuuja *mu* Mémè, kī *mbwà bwalu* Bwànyì to, kàdi *mu* Mémè.” Mwikàle *munda* Mwèndè, wìtabuuja! “Nwènù bashààle munda Mwànyì nè Mèyi Àànyì munda mwènù.” Munda Mwèndè, biikàle nwiitabuuja! Kaa, ekèlekèlè! Ndi ntèkemena nè Nyumà Mwìmpè ùdi ùnùfikishilaci bìmpè. Mpindyewu, nudi kasùmbù kakesè kàa mikòòkò, ke bwà cinyì mu lumingu lujimà emu, munkaci mwà kusambila nè kulòmba Nzambì, ndi musungùle cyena-bwalu eci, bwà kunùleeja mwaba wutùdi biimànyine. Twitabuuja *mu* Yèyè. Kwèna mwà kwitabuuja *mu* Yèyè paùdi kùyi mubwele munda Mwèndè to, anyì, Yèyè mulwè munda mwèbè, dībà adi udi wìtabuuja *mu* Yèyè, dībà adi udi nè Mwoyi wà Cyendèlèlèlè. Udi wìtabuuja *bwà bwalu* Bwèndè too nè paùdi upeta Mwoyi wà Cyendèlèlèlè, dībà adi Mwoyi wà Cyendèlèlèlè ke Mwoyi wà Nzambì munda mwèbè, dībà adi udi wìtabuuja *mu* Yèyè.

²⁵ “Nwènù munda Mwànyì, Mémè munda mwènù. Bwà bààmòna mwà kwikala umwe, Taatù, ànu bu Mùdi Wèwè nè Mémè biikàle Umwe.” Nzambì *mu* Kilistò, Kilistò *mu* Èkèleeziyà. Nwamònu anyì? “Ànu mutùdi Umwe emu, nànkù biikalè umwe.” Dībà adi mmunyi munùdi mwà kwikala umwe? “Nwènù bashààle munda Mwànyì, Mèyi Àànyì munda mwènù.” Nwamònu’s, shààlaayi! “Mèyi Àànyì munda mwènù, dībà adi nùlombè cinùdi baswè.” Bwalu kacicyènà kàbìdi wèwè to, n’Dìyi didi munda mwèbè adi, nè Dìyi didi Nzambì.

²⁶ Mpindyewu, Dìyi dyà Nzambì dītu m’Mwelè wà mvità. Ebèlù, nshapità mwi4, ùdi wàmba nànkù, Ebèlù 4.12. Mpindyewu, m’Mwelè wà mvità. Kàdi mwelè ncintu cilàale tulù menemene pàdiwu kawùyi mukwàta kùdi cyanza kampàndà anyì bukolè kampàndà to. Nè wùdi...kàdi bidi bikèngela cyanza kampàndà bwà kukwàta Mwelè wà mvità awu. Nè kwangata cyanza cidi cikwàte Mwelè wà mvità ewu aci, ncyanza cyà diitabuuja.

²⁷ Mpindyewu, cyanza cyà diitabuuja aci, mbilondèshile mùshindù ùdici nè bukolè. Cyanza cyà diitabuuja eci ncifwànyine kwikala ànu nè dikàndà dikùmbàne bwà kukòsa kutùbula disòò dikesè *mu* mīdimà nè kwamba nè: “Ku diitabuuja ndi musungidiibwe.” Aci’s ndikòsa dinène, kàdi, pashìishe, piikalàbi nè ke dikàndà dyònsò didi cyanza aci mwà kukùpa naadi Mwelè wà mvità awu, ke cyònsò cidìwu mwà kukòsa. Kàdi, piikalàci ncyanza cyà dikàndà, necikosè buludì e kupicila *mu* cintu cyònsò cidi dyabulù mwà kutèeka mwaba awu, kuvwija mulayi wònsò wà Nzambì wùkenkesha *mu* bukolè bwà dibiikà Dyèndè dyà ku lufù. Piikalàci ncyanza cikolè cyà diitabuuja nè: “Matùkù à bishimà! Yesù Kilistò, umweumwe awu makèèlèlè, leelù, too nè kashidi,” cidi cikòsa too nè ku

ndekeelu. Mbilondèshile bukolè bwà cyanza cìdì paanyimà pàà Mwelè wà mvità awu.

²⁸ Nè Mwelè awu mmutwè bikolè be. Ebèlù 4, mmwambè nè: “Mmutwè kutàmba mwelè wà mvità wà nseke yibidi wùdì wùkòsa mu dilwa nè mu diya, nènku ùyaaya too nè mu—mu bwongò bwà mifubà, nè mu manungu, nè dijinguludi dyà meeji à mu mwoyi.” Wùya dyàmwàmwà dyà byà mubidi, wùbwela mu cipaapu cyà nyumà nè wùbàkula meeji à mu mwoyi nè ùàbuulula. Nyumà wa Nzambi, Díyì dyà Nzambi.

²⁹ Mpindyewu, Díyì adi nedìkosè muntwamu pìikalàku dibòkò dikùmbàne paanyimà pààDì bwà kuDisàkamù, nedipetè Kàadi kaaba nè kukòsa mùlayi ònsò nè kukupèèshaWù, pawikalà nè dibòko dyà dikàndà dikùmbàne paanyimà pààDì apu. Mwelè wà mvità, Wambùlaakù nè dibòkò—dibòkò dyà diitabuuja’s! Wùkwàtè bikolè mu cyanza, Wùlamè mu cyanza nè asà lwendu tamàkàtamàkà nè mu mpàlà mwà mulwishì. Mmunyi mùdiku mwena lukunà udi kàyì mutengula awu mwà kwimanapù mu Bwikadi bwà Nzambi wa Cyendèlèlè? Pa nànkù, wèwè angàtà Mwelè wà mvità wà Díyì, nènku mùlayi wònsò ngwèbè wèwè. ÙWàmbwilè mu cyanza cìkolè cyà diitabuuja, asà lwendu mutàngile kumpàlà! Wèwè dijinga nè dyondopa, dikòsèlè mu Díyì nè: “Yesù Kilistò, umweumwe awu makèèlèlè, leelù, too nè kashidi.” Wèwè dijinga nè lupàndu, mùlayi wònsò mu Bible ngwèbè. Lùdì lùsanganyibwa paanyimà apu nè Sàtaanà ùdì ùteeta bwà kulùsokoka, kàdi angàtà Mwelè sàka munkaci mwà mîdimà amu too nè pìikalà Bukênkè bwà Nzambi nè cyà kùkenkesha pa musùukà wèbè nè wèwè kupeta mùlayi. Yèyè neàcyènzè.

³⁰ Adàmà ùvwa citùpà cyà, anyì, Evà ùvwa citùpà cyà Adàmà, yèyè ùvwa musunya wà ku musunya wèndè nè mufubà wà ku mufubà wèndè. Nènku aci’s ke cìdì didisanga dijaalàme. Nè aci ke cìdì disangila dijaalàme dyà Èkèleeziyà ncyôci aci, Nyumà wa Nyumà Wèndè, Díyì dyà Méyì Èndè. Kakùyì dìseesuka ku Díyì to, mwena kwitabuuja mulelèlè kàakudyà cibanga pa Díyì nànsha dimwè to. Vùlukaàyi nè, cìvwa ànu mpa Díyì dimwèpelè pàakadyà Evà cibàngà, Díyì dimwèpelè. Kàdi mwena kwitabuuja mulelèlè yèyè kàakudyà cibàngà pa Díyì nànsha dimwè to. Neàlamè Mwelè wà mvità wà Diitabuuja pàmwè nè. . . mu diitabuuja’s, èyowà, Mwelè wà mvità wà Díyì awu, nè kunana mùlayi wònsò wa kùdì Nzambi ùdì Nzambi mwenzè awu. Ke cyôci aci.

³¹ Bàvwa bileejilu byà Nzambi kutùdì, byà citùvwà twètù nè cyà kwikala, bóbò, biikàlè ànupù, kabàyi mwà kupangila nànsha. Pàvwàbo bàakula, Nzambi ùvwa wàndamuna. Ùvwa ùbàtàngila, ku ditùkù nè ku ditùkù. Bufùku, pàvwàbo mwà kudyòlola panshì bwà kulààla, Ùvwa ùbàtàbaleela. Mundamunya, Yèyè wakabàlombola, wàkabàdiisha, ùvwa mubànangè, ùvwa ùyuukila naabò ku musangu nè ku musangu,

dîbà dyônsò. Bàvwa mu cimfwànyì cyà Nzambi, nè Nzambi ùvwa munda mwàbò. Ke cidi cyèenza bwobùmwe ncyôci aci. Ke cidi cyèenza disangila ncyôci aci, n'Nzambi mu Èkèleeziyà Wendè. Ke disangila ndyôdi adi. Byàbûngi mbifwànyine kwambiibwa, ndi nè myaba yàbûngi yà kuya. Kudisanga Nendè, m'Mwoyi wà Cyendèlèlèlè. Nè mùshindù wùmwepele wutùdiku mwà kudisanga Nendè ngwà kulwa mu kantu nè kantu kàà Dîyi Dyèndè. Ncyà bushùwà, kwangata mulayi wònsò nè kuWitabuuja.

³² Mpindyewu, Evà ùvwa mudisange too nè pàakanyangakajàye Dîyi dimwèpele, anyi, kwela mpatà ku Dîyi dimwèpele nè ndilelèlè. Aci kàdi kumutàpulula. Dîyi dyônsò: “Muntu kàakwikala nè mwoyi ànu ku dyâmpà nkàayaadi to, kàdi ku Dîyi dyônsò's wè!” Pa nànu tudi mwà kwikala mu Nzambi, badisange, bwalu Adàmà nè Evà, kumpalà kwà kudyèla cibulà, kumpalà kwà kubènga kwitabuuja Dîyi, bàvwa cileejilu cyà citùvwa mwà kwikala munda Mwèndè. Kwikala badisangè Nendè, ke Mwoyi; kwikala batàpùlùke Nendè, ndufù. Mpindyewu, bu twètù tulonda mèyi Èndè matùma's!

³³ Tudi bamanyè nè tudi twenza bilèma, kàdi kwèna nè cyà kutàngila abi nànsha. Kì mbilèma byèbè to, bwalu newikalè ànu ubyèza misangu yònsò. Kàdi, nudi numòna's, nkulonda tunungu Twèndè, kulonda cidiYe mwambè bwà kwenza aci. Kutètuka nè kudishinda kakwèna nè bwalu to. Musadidi wetù mulelèlè ewu, yèyè mutètùke, neàjuukè cyàkàbidi. Yèyè ütètuka, Nzambi ùdi ùmupulumuna ùmwaluja buludi mu kajila, pàcidiye ànu mu kajila kàà mudimu. Kàdi yèyè mupàtùke mu kajila kàà mudimu, Nzambi kèna nendè dibànzà to. Kàdi pàdiye ànu mu kajila kàà mudimu, Nzambi mmwena dibànzà kùdiye, mumanyè nè yèyè ùdi ànu muntu wetù ewu mulùme anyi mukàji. Yèyè mmwena dibànzà kùdi muntu awu pàcidiye ànu mu kajila kàà mudimu.

³⁴ Mpindyewu, Èkèleeziyà mpindyewu mmubangila kùdi Kilistò bwà dibàkà. Dibàkà kì ndyânji kwenzeka to, nediiikalè ku Didya dyà Dibanji dyà Mwànà wa mùkòòkò. Pa nànu, tudi tumòna nè Èkèleeziyà mmubangila, bu mùdi mulùme mubangile mukàjèndè. Cidiye wèza ncinyà pàkaadibo bamanè kubangilangana? Udi ànu munkaci mwà kumupèesha bintu byà mishindù yònsò, ùmutùmina màtàpishì èndè, wèza nè àdyùmvwè bimpè. Èè, ke cidi Kilistò munkaci mwà kwenzela Èkèleeziyà Wendè ncyôci aci. Yèyè ùdi munkaci mwà kutùtùmina mapà à Nyumà. Mmuni mùdi mwà kwikala mubangila eku wèwè munkaci mwà kuvila nè mapà aa kaènakù to? Ke bimanyinu mene byà dinanga. Ncimanyinu cyà Nzambi kùdi Èkèleeziyà. Yesù ngwàkamba nànu nè: “Bimanyinu ebi nebifilè aba bàdi biitabuuja.”

³⁵ Mpindyewu, lamàayi bintu abi mu meeji. Èkèleeziyà ùdi nè cyà kwitabuuja Dîyi dyônsò, mulayi wònsò, katòba

katwàkwikala kàbìdì nè mùshindù wà kwela meeji pa cyòci eci to, paanyimà pàà mwoyi wà cifwàkà ewu mumanè kujika. Dyela dyèbè dyà meeji mmpindyewu. Kwèna mwà kusungula paanyimà pàà eci to, udi nè cyà kusungula mpindyewu, bwalu edi nditùkù dyà disungula, wenza disungula dyèbè. Mpindyewu yèyè, Dìyì dimwèpelè, kí m'Méyì dikùmi majimà to, ànu Dìyì dimwèpelè cyanààna, kwelayè Nzambì mpatà bwalu cyàkaleejiibwa kùdiye mu bukénkè abu, bwà nè Dìyì adi didi mwà kwediibwa mpatà. Dìyì dyà Nzambì kadyèna mwà kwediibwa mpatà to, Yèyè ùvwa ùswa kwamba ànu cyàkambàYe aci. Kàdi wàkaDyèla mpatà bwalu cyàkaleejiibwa kùdiye nè: “Kaa, ncyà bushùwà nè Nzambì kàvwa ùswa kwamba nànkù to.” Kàdi's ke cìvwàYe muswè kwamba! Nzambì ùdi ùswa kwamba Dìyì dyònsò didiYe wàmba adi. Nè Kadyèna dikèngela didyumvwijila dyà muntu pàà nkààyendè to, Dìdì ànu mùshindù wùdiYe muDyàmbe awu.

⁴⁰ “Èè,” wèwè udi wamba nè: “mmunyi mùdì mumanyè bwà Bible awu?” Mémè ndi ngiitabuujà nè Nzambì wanyì mmulombòle Bible ewu, Yèyè ùdi ùtábaleela Dìyì Dyèndè. Yèyè ùvwa mumanyè nè babèngì bàà diikalakù dyà Nzambì nè beena bupidyà nebàjuukè mu matùkù à ndekeelù, pa nànkù Yèyè mmuDiitàbàlèèle. Ewu ke mùshindù menemene wùdi Nzambì muswè kuDyàmba. Ke mùshindù wùdiDi bwètù twètù mpindyewu. Mpindyewu tudi nè cyà kuDiitabuujà. Dìyì dimwè dyumushilaKù, nènku tudi tujìmiya bwobùmwe bwètù, tukabwela mu—mu lufù, dìtápuluka dyà Cyendèlèèlè nè Nzambì, ànu mwàkenzà Adàmà nè Èvà amu. Tudi nè cyà kwitabuujà Bulelèlè bwà Nzambì.

⁴¹ Swàyi bwà ngambè cyòci aci kàbìdì. Kanùbèngì kwitabuujà nànsha Dìyì kaayi dyà mu Bible wa Nzambì to. Kàdi kwàmbi ànu nè: “Eyowà, ndi nDiitabuujà.” Wamba nè “kàdi”? To, kakwenà byà nànkù to. Udi uDiitabuujà, neùDiitabè. Wèwè muDitèèke ku luseke, wamba nè: “Èè, wanyì èkèleeziyà kèna ùDiitabuujà mùshindù awu to,” dìbà adi kwèna uDiitabuujà nè n'Dìyì dyà Nzambì to, nènku neùye ànu mwínshì mwà dipiishibwa dimwèdimwè dyàkabwelà Èvà mwínshì mwàdì adi. Udi muditápulùle nè wà Cyendèlèèlè pèèbè ùvwa mupetè mpungà wa kudisanga Nendè. Mpindyewu, vùlukàayi nè, Aci kacyèna mwà kwediibwa mpatà to, bwalu Cìvwa n'Dìyì dimwèpelè, divwà, mu Dìyì dyà Nzambì.

⁴² Nènku, mpindyewu, pìikalàbi nè Nzambì ùvwa ànu nè—nè ndambù wa Méyì mwaba awu àvwà bantu nè cyà kutùmikila, nè mu òwù Méyì makesè awu dimwè dyà ku òwù divwa dileejiibwe bibi, nè kulelabi lufù, tàngilàayi Méyì atùdi naawù leelù ewu's! Nwamònu anyi? Tudi nè cyà kwakidila dyònsò dyà kùdiwù, kushààla bakwàtekù nè kubwela munda mwàwù bu milayi yà kùdì Nzambì. Nènku mukàjì wa lulamatu wa Nzambì neénzè cyòci aci, mukàjì wa lulamatu udi mubangila. Mpindyewu, ndi ntékemena nè tuntu tokesè etu tudi túbwela mu ndòndò

mpindyewu bwà twamòna mwà kutùbàkula.

⁴³ Ncintu kaaŷi cyà kumpàlà cyàkafikisha Evà ku dibenga kwitabuuja Diyì dyà Nzambi? Mbwalu Sàtaanà wàkamulaya lungènyi lutàmbidile nè: “Nenwikale nè lungènyi.” Mpindyewu, nudi numòna’s, bukwàbantu bùtu misangu yònsò ànu bùlumbila cintu kampàndà. Nènkù Evà ùvwa wènda ùlumbila lungènyi lutàmbidile.

⁴⁴ Mpindyewu twánjääyibi kwimana katanci kakesè cyanààna. Aci kî ngiikàdilù wa buloba leelù ewu anyi? Bòbò mbaswè lungènyi lutàmbidile, cipidi citàmbe bwímpè, kwikala balongè tùlaasà tutàmbe kutùmbuka, bàkèba cintu kampàndà cyà cishìllàngàne, lungènyi lutàmbidile. Ke cìvwa Evà muswè aci’s. Kàdi lekèlaayi ngàmbè eci kàbìdì nè, kakwèna lungènyi nànsha lùmwe lùdì mwà kutàmba lwà Nzambi to, kàdi Cìdì mu mmwènekèlu mupwekèle menemene wudi bantu bàCìpangila.

⁴⁵ Sàtaanà, ànu múnkaadi mwambàmbe misangu nè misangu, ùdì ùbàlakana, kàdi Èvànjeeliyò ùdì wèla nsèsè. Kaa, kùdì dishìllangana dyàbùngì pankaci pàà kubàlakana nè kwela nsèsà. Hollywood ùdì ùbàlakana, kàdi Èkèleeziyà ùdì wèla nsèsà nè bukolè nè dinanga dyà Nzambi. Hollywood ùdì ùbàlakana. Kùdì dishìllangana dyàbùngì pankaci pàà kwela nsèsà nè kubàlakana. Katwèna baswè kubàlakana to. Tudi baswè kwela nsèsà.

⁴⁶ Leelù ewu, mbibì be bwà kwela meeji ku cyòci eci, kàdi èkèleeziyà yìdì yiteeta bwà kweyemena dyumvwa dyàbò bòbò biinè, ànu menemene mwàkenzà Evà amu. Kwelayè meeji nè, bwalu bàvwa bamuleejeci, cìvwa cìmwèka cilelèlè menemene. Kaa, kanùpangikù kuumvwa eci to. Cìvwa cìmwèka cilelèlè menemene, cintu kampàndà cìvwa mwà kusàkidiibwa ku cìvwa Nzambi mwambè. Bìvwa bìmweka ànu bu nè ùvwaku nè cintu kampàndà cyà nè Nzambi kàvwa mumwambile menemene ntàntà uwayè mwà kuya to. Nzambi kàvwa mumwelèle mikàlu bu mùdìYe mutèèkèle mbù bwà kàyì mwà kusambuka bwalu ngondo mmumutàngile. Yèyè kudyàmbidila nè... Yèyè kudyàmbidila nè Sàtaanà ùvwa nè meeji matwè, bu mutùtù twamba amu, bwà wàmòna mwà kutùngunuka nè kwikala mu bwobùmwè nè Nzambi, kàdi nànsha nànkù mwikàle nè meeji matwè, yèyè’s ùvwa mufwànyine kwikala nè dilonga dyà kàlaasà ditàmbe bwímpè. Kàdi Nzambi ùvwa mumukòsèle ànu menemene cìvwa cìmukèngela aci.

⁴⁷ Nè Yèyè mmukòsèle èkèleeziyà cintu cìmwècìmwè aci. Aci kî ndikònyangaja dyà sèminèrè kampàndà, anyi dibwela anyi dinyangakaja dyà mu—mu cìlongelu cyà Bible to. Kàdi Cìdì ànu menemene cìdì cìfunda, nè EMU MMÜDÌ MUKALENGE WÀMBA! Kabèèna mwà kuCishintululakù to! Kàdi èkèleeziyà yìdì yèyemena luumvu lwàyì yòyì miinè. Bàdì—bàdì bèèla meeji nè pàmwàpa cìdì... kùdì cintu kampàndà cibàlongolwela, kàdi pàaci cibàshima.

48 Ndi ànu nè cyà kwindila katanci mwab'ewu. Buloba bujimà mbushindàmeena pa cyôci aci. Bubangi bwônso nkòong bwà ditunga edi mbushindamijila pa mmwènenu wa mashimi. Ndi nnwàmbila bwalu bukesè bwà tuseku bwànyì mèmè mwinè, kî mbilèlè to; kàdi's nudi bamanyè nè twètù bônso tudi banangè bakàji bèètù, anyì, bìvwa bikèngela bwà twètù kubànanga. Nènku mvwa munkaci mwà kutàngila ndongamu kampàndà mwaba ewu kùkaadi cikondo kampàndà ku Wesètè kwàka, kùkaadi ntàntà mule, bidimu bitwè ku bisàtù. Nènku mu cibambalu cyànyì dindà kampàndà mèmè kubiika, nènku kùvwa ntèlèviziyò mutèeka mu cibambalu amu. Mèmè kudyàmbidila nè: "Kuulu kùmwèka kubì." Ki mèmè kudyàmbidila nè: "Èè, pa dîbà mwandamukùlù jaajaajaa nebikèngele bwà kufilabò nguumù." Nènku mèmè kwangata kakàndà kakesè aku, kàvwa kàmba nè kùvwa nguumù pa dîbà kampàndà.

49 Mèmè kukàngula nguumù, nènku pàmvwà munkaci mwà kutèeleja nguumù, ke mèmè kumòna nè munkaci mwà ditangalaja dyà nguumù amu bóbò kuyikòsà bwà kumanyisha disumbisha dyà bintu kampàndà, bwanga kampàndà bwà disukula naabò bintu. Ke bóbò nè: "Kabyàkukèngela bwà wèwè kusukula kàbidi màlòngà èbè awu to, inàbànzà. Cintu cìmwèpelè cyùdi wenza cidi ànu kuèla mu màyi nè kuàshikikamù munda mwà ndambù wa tusunsa, kuàjuulamù nè kuàtèeka pa mèèsà à diànyikila, bwalu mbutùuke."

50 Mèmè kudyàmbidila nè: "Nèngiikalè cilòbo pàngàalukilà kumbèlu." Mèmè kufùnda dînà dyàbù, dyà cintàkanyì kampàndà eci's. Mèmè nè: "Nèngàmbilè mukàjàànyì nè: "Tàngilà cîndi mwà kwenza!"

51 Ke mèmè kuya è kupeta mùlàngì wà bintàkanyì *kampàndà* ebi, mèmè kàdi kubitunkumwina byônso mu màyi. Mèmè kumwambila bwà yèyè kutungunuka nè kukòmba mu nzùbu, mvwa nè cyà kumusukwilawù. Ke mèmè kwangata malòngò à bânà nè kuumusha nkòtòtò yìvwàmu, nè bikwàbò, nè mayi malamàtemù, nè kuèla mu màyi nè kuàlekela àshàalamù katanci, kàdi kuàpàtula nè kuàteeka mwaba awu. Mùvwa mayi ànu bùngì bùvwàwù pàmvwà muelèmu apu. Nwamònu's, nùnkù's mvwa—mvwa kwikala mujimije. . . Nùnkù's mukàjàànyì ùvwa kwikala mujimije dyeyemena mu mèmè mwinè musangu awu.

52 Nudi numòna's, bwà cinyi ditunga, mbwà cinyi bùdi aba . . . ditunga edi dilekela bantu bàseeswishibwa? Aci kacivwa nè cyà kwanyishibwa bwà kwambibwaci mùshindù awu to. Aci cìvwa nè cyà kwikala cìbèngangana nè mikenji. Bwà bìdi bìtàngila dimanyisha dyà mfwankà dyà cyena leelù edi, bundù kaayi's nè: "Kakwèna lukosù mu mushikì mujimà to," bintu byà mîshindù yônso. Kabìvwa bikèngela bwà aci kwikalaci cyanyishibwe to. Cidi cyènzà ncinyi? Cidi cìseeswishangana. Kùdi lufù mu yônso wa ku yôyi ayi's. Kùdi lufù mu dînà dyà maalà à wiskí;

dinyangilangana buumùntù, dishipangana, dipaala, bìdi mu mùlàngi amu. Kàdi nànsha nàнку tуди biitàbila bwà kucitèèka mu ndongamu yètù nè kucimanyisha bu nè “Maalà à bwena àvwà kaakù mulùme ùnwa awu. Masànkà matàmbidile mu nsòmbelu,” mishindù kampàndà yà maalà à bièrre nè maalà à kapyà. Ncinyi aci? Cìdi cìseeswishangana. Nditèèka dyà cintu kampàndà kumpalà kwà bantu bwà kudishebeyabò naaci. Nè mbatwanyishile bwà twètù kucyènzà.

⁵³ Nènku lekèlaayi nkudimunè cyôci aci ncitàngijè luseka lukwàbò. Nè maèkèleeziyà ku mēyi maswika makwatakaja kùdi bantu, twitabàayi mikwatakaja kùdi bantu yidi yilejeja bantu cibadi cinène, nè bàdi munkaci mwà kucyùpukila, cidi lufù. Èkèleeziyà nànsha umwe kààkukezula musùukà wèbè to. Twitabàayi nànsha umwe kēna mwà kusukula musùukà wèbè to. Ànu Mashi à Yesù Kilistò ke àdi mwà kusukula musùukà wèbè, bwanga bwà Nzambi abu, Bwòbù ke bùdi bujaadikiibwe. Pa nàнку cidi ànu cyà mashimi, kàdi bantu bàtu beeyèmène dyumvwa dyà beena meeji, nènku bàdi bàfwa ku cyôci aci. Nè bantu leelù ewu mbashindàmèene pa dyumvwa dyà—dyà twitabàayi nè màngumba, nè mìliyò yà bantu bu mùdi nguluba mikòsa mitù bàdi munkaci mwà kutùkina mu ciinà cyà ndòndò mule cyà ifernò. Bundù kaayi's wè. Mbatùkàndike bwà kweyemena dyumvwa dyètù twètù biinè. Katwèna mwà kuteeta to.

⁵⁴ Wèwè udi wamba nè: “Kabìvwa bikèngela bwà nsangilu wa bantu kwikalayè mukùmbàne mwà kwamba byàbùngi pa Bwalu abu kutàmba muntu umwèpelè anyi?” Kí mpìikalà muntu umwèpelè awu wàmba Dìyi dyà Nzambi to. Kwàkadi bapròfeta nkàmà yinaayi musangu kampàndà bààkalwà kumpalà kwà bamfùmù bàbidi, nè bàvwa beeyèmène dyumvwa dyàbò bòbò biinè. Kàdi kùvwa umwe wàkashààla nè Dìyi dyà Nzambi nè byàkajaadikiibwa nè yèyè ùvwa mubingè, Miikà. Mbilondèshile ku nè n'Dìyi dyà Nzambi. Cyònsò cidi cibèngangana nè Dìyi adi ncibi, cidi cibwela mu lufù. Lungènyi nànsha lùmwe kalwèna mwà kutàmba lungènyi lwà Nzambi to. Yèyè's ke udi mutàmbe kwikala wa meeji matwè ku bònsò. Yèyè's ke—Yèyè's ke Mpokolo. Yèyè ke mushimi wùmèpelè wà lungènyi. Dìyi dyà muntu yònsò ndipaala nè mashimi, pa kuumusha ànu dyà Nzambi, dyòdi dibèngangana nè dyà Nzambi. Mpindyewu, muntu yèyè wàmba Dìyi dyà Nzambi, dìbà adi kí—kí n'dìyi dyà muntu awu kàbidi to, n'Dìyi dyà Nzambi. Nwamònu's, kí dyumvwa dyà muntu to.

⁵⁵ Sàtaanà neànùpèèshè milayi yà mishindù yònsò, kàdi kēna nè cintu nànsha cìmwè cyà kunùpèèsha to, bwalu kēna nè cintu nànsha cìmwè to. Kēna nè lupàndù nànsha lukesè to. Sàtaanà ncinyi? Cintu cyònsò cidi cibèngangana nè Dìyi aci. Yèyè kàtu nè lupàndu to, kàtu nè Bukènkè to. Bukalenge bwèndè mmìdimà, ndekeelu wabù's ndufù. Mìdimà nè lufù ke bukalenge bwà Sàtaanà. “Mwanèètù Branham, ambùlùlaku cyôci aci cyàkàbidi.

Bukalenge bwà Sàtaanà ncinyi?” Cyònsò cidi cibèngangana nè Dìyi dyà Nzambi.

⁵⁶ Mpindyewu, aci's cidi citàpa, kàdi's dībà ndyôdi edi dyà kutàpa. Nwamònu anyi? Ditàmbà, mucì awu, wòwù nè cyà kukwàma, wùdi nè cyà kusònjiibwa. Ke dībà ndyôdi edi's.

⁵⁷ Cyònsò cidi cibèngangana nè tunungu twà Nzambi, Dìyi dyà Nzambi, kī n'Nzambi to. Ncinyi aci, mpèkaatù ncinyi? Bwakànè bunyangakaja. Lufù ncinyi? Mwoyi munyangakaja. Bukalenge bwà Sàtaanà ncinyi? Cintu kanà cyònsò cidi citèèka cintu kampàndà bwà kwangataci kaaba kàà Dìyi, cintu kanà cyònsò, dilongesha kanà dyònsò. Dìyi dimwèpelè, ànu dīyi dimwèpelè cyanààna. Udi mufwànyine kwitabuuja kantu nè kantu, Evà wàkiitabuuja kantu nè kantu kààDì pa kuumusha ànu Dìyi dimwèpelè adi. Dìyi dimwèpelè adi ke cyònsò cyàkamukèngela bwà kubènga kwitabuuja. Dìyi dimwèpelè adi ke cyònsò cidi cikukèngela bwà wèwè kubènga kwitabuuja.

⁵⁸ Mpindyewu tùcitàngilaayi. Mùshindù wùmwèpelè wà kushààla mu bwobùmwe bwà kùdi Nzambi, wùvwa ngwà kulama Dìyi adi. Nzambi wàkamba nè: “Newènzè *cikampàndà*. Kwènji *cikansanga* to. Newènzè *cikankènga*, nè nudi mwà kwenza *cikampàndà* nè kwenza *cikansanga*. Kàdi kanwènji *cikampàndà* to.” Mpindyewu, ànu katùpà kakesè kàà dīyi ditùma kàakabèngaye kutùmikila aku, ke kutwàdijakù cintu cyònsò aci mu kabujimà. Bwalu wàkenza nànkù, wàkavwija mwàna yònsò udi nè nzala uvwakù pa buloba apa awu, bisaamà byònsò byà lufù, tunyinganyinga twònsò, disaamà dyònsò dyà mwoyi. Yèyè wàkacyenza ànu dībà adi mene. Cintu kaayi cyà cyèenza bwòwà's, bwà kubènga kwitabuuja Dìyi dyà Nzambi. Muntu yònsò udi utwà mikèmu mu bisaamà byà lufù lònsò lùvwà nè lwikalàku, yèyè ke wàkabìtwàla ànu dībà adi. Mwàna mukèsè yònsò udi kàyi mulela mu dībàkà, yèyè ke wàkacyenza ànu dībà adi, mwanà yònsò mulela mwīnshì mwà... pambèlù pàà dībàkà. Mpèkaatù yònsò ukààdikù mwenjiibwe ewu, yèyè ngwàkamutwàla ànu mwaba awu ku dishààla mulame Dìyi dyònsò pa kuumusha ànu kaaba kakesè kàmwèpelè cyanààna aka. Yèyè—yèyè wàkalukakaja lungènyi. Yèyè ùvwa ànu... Yèyè kàvwa mucipàngè to. Ùvwa mucimanyè, kàdi ùvwa ànu... Wàkasàkiibwa bwà kwenza cintu kampàndà cyà citàmbe bwìmpè bwalu bàvwa bamulayè cipidì citàmbe bwìmpè cyà bantu, lungènyi lutàmbe bwìmpè, kumanya byàbúngì pa Bwalu abu bu yèyè mwà kwenza *cikampàndà*. “Bambi bèètù mbalongè tùlaasà bimpè bitàmbe. Tudi nè cipidì citàmbe bwìmpè.”

⁵⁹ Kakùtu cipidì citàmbe bwìmpè cyà bantu pa buloba kutàmbe aba bàdi balamè Dìyi dyà Nzambi to. Ke cidi citàmbe bwìmpè ku byònsò. Ke musumbà wùmwèpelè wùdi Nzambi ùtàngila. Ànu mu katanci kakesè cyanààna nènku pàmwàpa Nzambi neénze ne tùbwelèmu.

⁶⁰ Bukalenge bwèndè kabwèna mwà kulaya cìngà cintu to ànu lufù. Ke cyònsò cidiye naaci. Yèyè ke mfúkyamukèlè wa lufù. Ùdi mwà kulaya mashimi bwalu yèyè ke taatù wa mashimi. Yèyè kèna mwà kukupèèsha Mwoyi to. Kèna mwà kukupèèsha Dyulu to, kèna nè Dyulu dyà kukupèèsha to.

⁶¹ Elàayi meeji ku bwalu abu's! Dìyì òm̀wèpèlè, bwà kubènga kwitabuuja Nzambi ku mulayi wà dyabùlù anyi ngenzèlù yèndè, Dìyì òm̀wèpèlè, didi dikutùma mu mwaba wà dikèngeshiibwa. Mùshindù awu ke wàkabangàci. Nènku pìikalà Nzambi, mu luse Lwèndè mùdiYe amu, mufwànyine kutùma mushiki wà ifèrnò ewu pa buloba, nè kutwàla bânà bakesè bàdi nè nzala, ntàtù yà mshindù yònsò, nè bantu bàfwa nzala, nè lufù pa buloba, bwalu Dìyì òm̀wèpèlè, ku cibangidilu, Yèyè kàvwakù mwà kwikala mucilèngulùlè nè mwepùka kwikala nè mushiki wònsò wà makènga ewu anyi? Kàvwakù mwà kwikala mucyenzè anyi? Dìbà adi pìikalàbi nè Yèyè kààkalèngulula Dìyì òm̀wè mwaba awu to, mumanyè nè eci cìvwa mwà kwikala bipeta, mmùshindù kaayi wàtambàYe kubènga kulèngulula Dìyì òm̀wè kuntwaku dìbà diikalà muntu-nkààya nè cyà kwikala mukèngi nkààyèndè udi ubènga kwitabuuja awu? Elàayi meeji pa bwalu abu, ncintu cyà dikèma.

⁶² Mpindyewu, pààkatèèlejà Adàmà nè Evà mashimi à dyabùlù, cimfwànyì cyà cijila cyà Nzambi cyàkabàshiya, bwobùmwe bwàbò nè Nzambi bwàkakòshiibwa. Bwobùmwe bwàbò bwà bùmwe bwàbò nè Nzambi bwàkanyanguka. Mu kasunsa mene mwàkatèèlejàbò dishima dyà dyabùlù, aci's cyàkanyangakaja bwobùmwe bwàbò. Nè mu kasunsa mene muwàtèèleja dishima dyà dyabùlù, necikosè bwobùmwe bwènu. Ke kasunsa mene kaùdi upàtuka mu Bwikadi bwà Nzambi nkòkò aku, mwàkenzà mukàji awu, mpawàkapangilà bwà kwangata Dìyì dyà Nzambi ànu mùdiDi amu.

⁶³ Mpindyewu tàngilàayi, ndi muswè kunùkonkakù cintu kampàndà. Tudi bònsò bamanyè nè kùdi Nzambi kampàndà. Nènku pìikalà Nzambi mmujaalàme ànu menemene nè Dìyì Dyèndè, nè mmupàngàdike bikolè bwà nè Yèyè neàlumbulwishilè bantu ku Dìyì Dyèndè, dìbà adi bìdi bikèngela bwà Yèyè kulaminyina Dìyì mwaba kampàndà bwà kulumbulwishilakù bantu. Bible ewu ke Dyòdi. Kanùpu aci mwoyi to. Bible ngudi Nzambi ulumbulwishilakù bantu, bwalu Mbambè mu Bwàkabuulwibwà 22 nè: “Ewu wadidinga kuumushilaKù Dìyì òm̀wèpèlè anyi kusàkidilaKù dìyì òm̀wèpèlè.”

⁶⁴ Nwamònu's, kî nkwamba ànu nè: “Èè, ntu—ntu nya mu èkèleeziyà to. Ntu ngitabuuja. Ntu—ntu—ntu ngitabuuja Nzambi.” Mòna's, démon nè démon yònsò mu ifèrnò ùdi ùMwitabuuja. Yònsò wa kùdìyi mmutèndeleeedi, yònsò wa kùdìyi.

65 Kàdi bìdi bikèngela ànu dīyì òmwèpèlè cyaààà, bìdi bìshipa bwòbùmwè ànu mwaba awu mene. Mùnyòòlòlò kawèna nè bukolè butàmbe bwà dinungu dyàwù dīdì ditàmbe kuteketa adi to. Nènku mwaba wùdì butekètè bwèbè busanganyibwa pa kubènga kwitabuuja Dīyì dyà Nzambì, ke mwaba wùdì wùkèngela bwà wèwè kutèèkapù dinungu dipyadiyà, dikolè pàmwe nè makwàbò ònsò. Wèwè mwitàbùùje nè Yesù Kilistò ùdì ùsùngila, dībà adi udi nè cyà kutèèka dinungu muntwamu dīdì diitabuuja nè Yèyè ùdì wòndopa. Wèwè mwitàbùùje nè ke cìvwàYe, udi nè cyà kwitabuuja nè ke cìdìYe. Àlèluuyàh! Wèwè mwitàbùùje nè ke cìvwàYe, kàdi ùdikonka nè ke cìdìYe, dinungu adi nedikòsekè, dībà adi udi mujìmine. Nudi bamòne cīndi njinga kwamba aci anyi? Ncyà disù dyumisha, ncyà cikolè, kàdi m'Bulelèlà. Udi nè cyà kuMwitabuuja, Dīyì dyònsò, cyònsò cyàkambàYe aci.

66 Mpindyewu, wèwè udi wamba nè: “Èè, mpindyewu, Mwanèètù Branham, kàdi bìshi bwà màngumba aa?” Èè, mpindyewu tèèlèjààyi. Pìikalàbo nè Dīyì edi, mbìmpè. Kàdi bóbò bàvila Dīyì adi, dībà adi kí ncilelèlà to, ndyabùlù cyàkàbìdi. Nwamònu anyi?

67 “Kàdi bìshi bwà èkèleeziyà *kampàndà* ewu?” Mèmè ncyèna mumanyè bìdì bitàngila èkèleeziyà awu to. Cintu cìmwèpèlè cīndiku mumanyè n'Dīyì edi. Mpindyewu, mmunyi muwitabuuja èkèleeziyà pàdiku màngumba nkàmà citèèmà nè byà mu njila mashilèshilàngàne, nè dyònsò munkaci mwà kwamba nè “dìngumba dyètù dīdì nè Bulelèlà bwà menemene”?

68 Mpindyewu nkwèpì kùdì mufwànyine kuya? Bikèngela wikalè nè diitabuuja mu cintu kampàndà. Èè, wèwè udi wamba nè: “Mèmè ndi nè diitabuuja mu ba-Méthodistes, mu ba-Baptistes, mu ba-Presbytériens, mu ba-Luthériens, mu beena Mpenta, mu beena Kàtòlikè,” cyònsò cìdici aci. Udi nè diitabuuja mu bulongolodi abu, nènku, cyòci cìbèngangana nè Dīyì, udi wenza cintu cìmwècìmwè cyàkenzà Evà aci. Menemene's! Udi wenza ànu cintu cìmwècìmwè cyàkenzàye aci, wàngata Dīyì dyà Nzambì nè ùDìvwija . . .

69 “Èè, s'kùdì musùmbà mutàmbe bwìmpè wà bantu wùlwalwà apa. N'nzùbu mutàmbe bunène. Mbantu bàà meeji matàmbe kutwà.” Aci kacyèna naaci bwalu nànsha bukesè to. Sàtaanà yèyè ùdì nè meeji matwè kutàmba Evà. Yèyè kàvwa . . . kàvwa nànsha mu cìmfwànyì to. Kàdi mukàji awu kàvwa nè cyà kwikala nè meeji matwè to, ùvwa nè cyà kwikala mutùmikidi. Katwèna nè cyà kwikala nè meeji matwè to. Yesù wàkamba nè bàna bàà buloba ebu, anyi, bukalenge bwà pa buloba ebu mbutàmbe kwikala bwà meeji matwè, bàna bàà mīdimà's mbatàmbe bàna bàà Bukènkè. Tudi bafwànyikìjìbwe nè mìkòòkò. Mikòòkò kayèna nànsha mwà kudilombola yòyi miinè to, bìdi bikèngela yìkale nè mulami wa mìkòòkò. Nzambì kí mmuswè bwà twètù kwikala nè meeji matwè to,

Yèyè mmuswè bwà twètù kweyemena pa dyumvwa Dyèndè, amen, ànu mwaba wùdìYe wùlombola awu. Amen. Nudi numòna cimfwànyì aci anyì? Kwèyemenyi dyumvwa dyèbè wèwè mwinè to. Nsumwinù 5,3. Kwèyemenyi dyumvwa dyèbè wèwè mwinè to, eyèmènà dyumvwa Dyèndè. Nànsha byòbì bimwèka bibèngangana bishi, nè mùshindù wùdì makènkè àmwèka manène pambèlu apa, kùtùmikù ntèmà to. Eyèmènà ànu dyumvwa Dyèndè, cyàkambàYe ke Bulelèlà.

⁷⁰ Mpindyewu, bùmwe mu bwobùmwe bwàkanyangakajiibwa pankaci pàà Nzambì nè bânà Bèndè, ànu mu kasunsa kààkabèngà mukàjì kwitabuuja kasaka kakesè kàmwèpelè, Dìyì dikesè dimwèpelè dyà Nzambì. Bantu bônso bàdì bùmwa aci, ambààyi nè: “Amen.” [Disangisha dìdì dyàmba nè: “Amen.”—Muf.] Kì m’Bible to; kwamba nè: “Mémè ncyèna ngiitabuuja Bible to nànsha kakesè. Ndi ngiitabuuja cyàbibidì Cyèndè.” Bivwa bikèngela bwà yèyè kuMwitabuuja yònsò, kantu nè kantu.

⁷¹ Kì ng’ànù aci to, kàdì bùmwe pankaci pàà mulùme nè mukàjèndè bwàkanyanguka. Mémè ncyèna ngiitabuuja nè kùdikù dibàkà didì mwà kwikala cìdidi nè cyà kwikala kakùyì didisanga pankaci pàà mulùme nè mukàjèndè nè Nzambì to. Ncyà bushùwà. Nebàlèlè bânà pa buloba, nè kubàvwija bàà mu masandi, bàbàpèesha mfwankà, maalà à wiskí, bànya twartà ku mèsù kwàbò, bànwà maalà makolè mwísù mwàbò. Nànsha bóbò biikàlè nè lulamatu lwà bishi ku micipù yàbò yà dibàkà ayi, aci’s ncyà disangila dyà mulùme nè mukàjì, aci’s mmubidi. Kàdì kùdì nyumà munda amu, nyumà wa papa ngènzàmpèkààtù nè maman ngènzàmpèkààtù, nànsha bóbò nè lulamatu lwà bishi kùdì bânà bààbò, nèbàlwe mu mùshindù mubì.

⁷² Èè, wèwè udi wamba nè: “Ndi mumanyè balùme nè bakàjì bàvwà kabàyi balongeshe bânà bààbò abi to, kàdì kabàyi beena Kilistò to.” Cintu mene cyà kubènga kubàlombola kùdì Kilistò aci kì cìvwà cintu citàmbe bubì menemene cìvwàbo mwà kwikala benzè pa kuumusha cìkwàbò aci; cyà kubènga kubàlombola kùdì Kilistò, nwamònu’s. Pa nànkù kanwèna mwà kwenza disangila dijaalàme kanùyì naaci to. Bwobùmwe bunyangakaja.

⁷³ Dìbà adi pààkanyangukà ànu bwobùmwe pankaci pàà Adàmà nè Evà...Pààkanyangukà ànu bwobùmwe bwàbò pankaci pààbò nè Nzambì, dìbà adi bwobùmwe bwàbò pankaci pàà muntu nè mukwèndè bwàkanyanguka.

⁷⁴ Tèèlejààyi! Dìbà kanà dyònsò didì èkèleeziyà ùnyangakaja bwobùmwe bwèndè, bwà kuditwà yèyè mwinè mu bulongolodi kampàndà, bwobùmwe bwà beena kwitabuuja mbunyangùke. Bikèngela twitabuuje nè mwoyi wùmwe, meeji àmwè, nè dīyì dimwè. Mùshindù awu ke wàkadìbo kumpàlà kwà didisanga kwenjiibwadi mu Ditùkù dyà Mpenta; mwoyi wùmwe, meeji àmwè, nè dīyì dimwè. Nènku dìbà dinùdì nwela èkèleeziyà

mu bulongolodi kampàndà, nenùkapetè makòsoloka à mishindù yònsò munda mwèndè. Bwalu, bàmwè bàà ku bàna abu muntwamu nebùikalè mwà kwitabuuja Nzambi, nebàshaalè bakwàte ku cintu cidi cijaalàme, nè bakwàbò nebàlondè njila mukwàbò. Pa nàнку, kanwèna nè bwobùmwè nànsha bukesè to. Èyowà.

⁷⁵ Cinyi? Ngeelèlù wendè wa meeji wàkashintuluka. Kaa, èyowà's, ngeelèlù wendè wa meeji wàkashintuluka. Bwobùmwè bwèndè nè bàyendè kabùvwa bujaalàme to. Bàdi bàbanga kutumpilangana cilumbù. Nwamònu anyi? Ngeelèlù wendè wa meeji wàkashintuluka cyà bushùwà. Bwà cinyi? Ùvwa nè mwoyi wà dyabùlù munda mwèndè. Menemene's! Mmwenze ànu ùbènga kwitabuuja Dìyi dyà Nzambi anyi, kwitabayè mwoyi wà dyabùlù bwalu wàkiitaba dilongesha dyèndè.

⁷⁶ Ndi mwà kuvwija eci cicolè menemene kaaba aka mene, kàdi cidi pa mukàbà wà mèyi. Ndi mutwìshìbwe nè nudi bùmvwè, Èkèleeziyà.

⁷⁷ Wàkabènga kwitabuuja Dìyi dyà Nzambi nè cyàkamutàpulula nè Nzambi, bwalu munda mwèndè dîbà adi mene mùvwa mwoyi wà dyabùlù. Yèyè ùvwa mwitabùùje mashimi èndè, wàmba nè: "Mamuma mmîmpè," nè yèyè ùvwa muabànyàngàne nendè. Ncyà bushùwà.

⁷⁸ Ncyàkulama Eci to, ndi nCilekelela cìlwa ànu mwìnè. Ncyènà ànu mwà kuCilama to. Ditùkù adi mu Californie, ndi njinga kwamba mu Arizona, mvwa munkaci mwà kulongesha mu èkèleeziyà kampàndà. Kacya ncitukù mwambè cintu mu disonsodiibwa cìvwà cikèngela bwà mèmè kuumusha to. Nàнку bààbùngi bàà ku bambi bààkalumbatàngana naanyi pa dimiinu dyà Sàtaanà, dimiinu dyà nyòka. "Mukàji, cìvwa ndidyà dyà cimuma cyà pomme." Huh! Aci, èè, Kaayinà wàkeela meeji àmwèàmwè awu, wàkatwàla mamuma à mu budimi, nudi numòna's. Kacìvwa cimuma cyà pomme to! Mmunyi mwàkamanyàye nè ùvwa butakà? Tukaàdi bacikenkète. Cìvwa bulelèlèlè disangila dyà mulùme nè mukàji. Cyà bushùwà, ke cìvwàci, wàkajingulula nè ùvwa butakà. Nè yèyè wàkalela mwànà nè nyòka, uvwa kàyi wa ùdikòka panshi awu to, yèyè ùvwa nyama mutàmbe budimù wa ku nyama yònsò. Yèyè ke cintu cìvwà cilondèle muntu. Muntu ùdi mwà kupeta nsokò nè nsòkòmntù—nsòkòmntù, nè bikwàbò, kàdi kabèèna mwà kupeta dinungu adi didi diswikakaja muntu nè nyama adi to. S'ki yèyè ewu. Nzambi wàkamwela mulawu too nè mu mùshindù wà nè kèna mwà kwalukilakù kàbìdi to, aci's cidi pambidi pèndè bwà cyenzedi cibi cyàkenzàye aci. Yèyè nguvwa dimiinu dimwèpelè dìvwà mwà kusambakanakù.

⁷⁹ Mpindyewu, ditùkù adi, mvwa mwimàne, munkaci mwà kuyiisha, kùvwa musumbà wà beena Kàtòlikè mu batèèleji bàànyi amu, ke mèmè kwamba nè: "Nwènù beena Kàtòlikè

bàdi bàbiikila Yesù, anyi, bàbiikila Màriyà's wè, èyowà, nè 'mamwëndè wa Nzambi,' mmunyi mùdi Nzambi mwà kwikala nè maamù pàdiYe wa Cyendèlèlè? Yèyè kèna mwà kwikala nè maamù to. Yesù kàvwa nànsha nè kantu kàmwè kàà kùdi Màriyà to, kàdi Yèyè ùvwa ànu . . . mukàji awu ùvwa cyamù cyà ditooyishila mayi cyàkaMutooyà."

⁸⁰ Èè, bàvwa misangu yònsò ànu biitabuujà, nè mèmè mvwa nè cingènyingenyi cyà bwalu abu kùkaadi bidimu, nè di—diimiciibwa dyà kakùyi mulùme adi divwa n'Nzambi mumubwikile mundidimbì nè mutèkemù kabulù kàà mashi, kàdi diyi adi ndifùmìne kùdi mukàji. Diyi dyòdi difùmìne kùdi mukàji, kùvwa nè cyà kwikala divwayila dyà mubidi bwà kupàtula diyi mu njila kudibweja mu matrice. Nudi numòna cinùdi nwenza nè Nzambi aci anyi? Nudi nuMubweja mu bukooyà bwà disangila dyà mulùme nè mukàji. Nzambi, Yèyè wàkafùka kabulù kàà mashi awu, ngwakafùka diyi adi, kàbìdi. Docteur, kùvwa nè cyà kwikala bungungu bulùme nè bukàji. Ncyà bushùwà.

⁸¹ Èè, dībà adi, pìikalàbi nè mukàji ewu wàkapàtula diyi, dībà adi mmunyi mùvwà Davidi mufwànyine kwamba nè "Ncyàkulekela Wa Cijila Wanyi ùmòna dibola to, anyi Ncyàkulekela musùukà Wèndè mu ifèrnò to"? Dībà adi pìikalàbi nè diyi dyà mukàji adi divwa munda mwà Kilistò, dībà adi muntu awu's ùdi nè cyà dyenza nè citùpà Cyèndè mu dibìikà dyà ku lufù, pàdici cikumbànàngane mu kaabujimà nè Nzambi. Nzambi wakajuula citùpà cyà disangila dyà mulùme nè mukàji cyà muntu bwà cinyi? Mu dibìika dyà ku lufù, bwà cinyi Yèyè kàakalekela mubidi Wèndè ùmòna dibola? Bwalu Yèyè ùvwa wa cijila. Kàdi mmunyi mùvwàYe mwà kwikala wa cijila bu Yèyè mwimiciibwe nè Màriyà, nè bungungu bùvwa bufùmìne kùdi Mariyà, diyi kupwekela mu kajila kubwela mu matrice? Kuvwa nè cyà kwikala disaluka kampàndà bwà kupwekesha diyi adi. Dībà adi mukàji awu uvwa mufwànyine kwikala . . .

⁸² Èè, wèwè udi wamba nè: "Diyi adi's divwa difwànyine kwikala dilàadile mwaba awu. Bìvwa mwà kwenzeka." Kàdi aci, byòbì nànkù, dībà adi tàngilàayi nùmonè cidì cyènzeka kaaba aka, dībà adi Yèyè kàvwa Nzambi mu kaabujimà to. Yèyè kàvwa Nzambi to, bu mùvwàYe mwikàle muntu. Kàdi's dībà adi byòbì biikàle nànkù, mukàji ùvwamù nè cyèndè cintu's. Nènkù di—dimiinu dilelèlè divwà difùme kùdi Màriyà, divwà difùme kùdi mamwëndè, nè wèndè mamwëndè, nè wèndè mamwëndè, cìvwa ncintu kampàndà cyà buntu cisopakajamù, nè dijinga dyà buntu. Kacìvwakù mwà kwikala nànkù to. To, mukalenge. Mèmè kwamba nè: "Yèyè . . . mukàji awu ùvwa ànu . . ."

⁸³ Ànu bu munùdi nwangata mukankù nuwùlekela wèla diyi, kàdi kuditéekela nzòlò, cikuka cyà nzòlò necitooyè diyi adi, yèyè's ùdi ànu cyamù cyà ditooyishila. Kàdi kakwènakù katòba nànsha kàmwè mu wòwù, mukankù awu, kiikale nzòlò to. To,

mukalenge. Nzòòlo ùvwa . . . Udi mwà kuswikila kabwà katekète pamutù pàà—diyi dyà nyuunyì, kàdi's kàdi mwà kutooya nyuunyì kampàndà, kabwà katekète nkafwànyine kutooya. Nduyà lwà mu mubidi lùvwà lutooyishe diyi adi;

⁸⁴ Nènku ke mùshindù wùm wèwùm wè awu wùdibi bwà Yesù. Màriyà ùvwa ànu cyamù cyà ditooyishila. Nzambì wàkakwàta nendè mudimu ànu mùdiYe ùkwàta nè mukàjì mukwàbò kanà yònsò ewu. Yèyè ùvwa virgò, kàvwa nè bânà to. Yèyè wàkabwela mu difù dyà nsongàakàjì virgò, kàdi Nzambi Mufùki ngwàkenza byònsò bibìdi diyi nè civuba, wàkabifùka. Ki bwà cinyi, cìvwa diimiciibwa dyà kadìyì katòba.

⁸⁵ Pàngakapàtuka, mu bushùwà bwà bwalu, nudi bamanyè nè bânà bèètù abu bàvwa bangindile's. Kwambabò nè: “Mwanèètù Branham, ndi muswè nkukonkèku cintu kampàndà. Uvwa mwenzè cilèma. Mpindyewu twakukwàci.”

Mèmè nè: “Èyo, ke cìndi muswè, nkukwàciibwa.”

⁸⁶ Ke yèyè nè: “S'uvwa mwenzè cilèma pa kwamba nùku ewu, pawàkayiisha *Dimiinu Dyà Nyòka* apu. Mpindyewu wèwè udi wamba nè—nè diyi adi òvwa dyà . . . Nzambi ngwàkadifùka, diyi adi. Cyàkenzekà ncinyi, tudi tusangana kaaba aka nè mu Genèsè nshapità mwi3, Nzambì wàkambila Màriyà nè: ‘Nènteeke lukunà pankaci pàà dimiinu dyèbè nè dimiinu dyà nyòka.’”

⁸⁷ Mèmè kudyàmbidila nè: “Kaa, ekèlekèle!” Kacya ncitukù mwanjì kuyiisha cintu nànsha cìmwè mu nsòmbelu wanyì mu disonsodiibwa cìvwa cikèngela bwà mèmè kuumusha to, bwalu mèmè ncyèna ngèeyemena dyumvwa dyànyì mèmè mwinè to. Nènku pùkala dyumvwa dyànyì dibèngangana nè Dìyì dyà Nzambi, dìbà adi dyumvwa dyànyì ndibi. Bidi nè cyà kwikala Dìyì dyà Nzambi. Byòbì kabiyì nànu to, cilekèlaayi kwà tàlàlàà, kì ncyakàne to. Kàdi mpindyewu kuCisùnsula ke cintu cìdi cikèngela kwenza. Mu mwoyi wànyì, mèmè kwamba nè: “Taatu wa mu Dyulu, Wèwè nk wàcishèku. Ncyèna mumanyè cyà dyenza kaaba aka to. Muntu udi nè Mufundu awu, ùdi ùfunkunakù munu wèndè nè: ‘Nènteeke lukunà pankaci pàà dimiinu dyèbè nè dimiinu dyà nyòka.’”

⁸⁸ Mpindyewu, ncyòci eci! Nyumà Mwîmpè kukwàta mudimu. Ndi ngiitabuujà nè Yèyè umweumwe uvwa mubwikile Màriyà mundidimbì awu, uvwa mwà kufùka awu, Yèyè ùdi kàbìdi mwà kutèeka Dìyì mukana mwèbè amu. Ndi mMweyemena ku ditùkù nè ku ditùkù. Nènku cìdi misangu yònsò ànu Dìyì Dyèndè. Kèna mwà kwamba . . . cintu kampàndà cyà cibèngàngàne nè Dìyì Dyèndè to. Dìbà adi wèwè wamba nè udi mwela maanyì, nè uyiisha bibèngàngàne nè Bulelèlà bwà Nzambi, dìbà adi kì ndilaabiibwa dyà Nyumà Mwîmpè to. Bwalu, pàdi Nyumà Mwîmpè ùkubwikila mu mundidimbì, Ùdi ùtwàla cintu cìmwècìmwè aci, bwalu Cìdi n'Dìyì.

⁸⁹ Tèèlejaàyi. Cyàkenzekà ncinyi? Mémè nè: “Èyo, ndi muswè nkukonkèku cintu kampàndà. Mukàjì kèna nè diyi to. Kèna nè dimiinu to. Yèyè kwamba mpindyewu, Yèyè kàakamba nè ‘diiyi’ to, Wàkamba nè ‘dimiinu dyèbè.’ Kàdi mukàjì kàvwa nè dimiinu to.”

⁹⁰ Bidi bikèngela didisanga bwà kwenza dimiinu. Ncyà bushùwà anyi, ngàngabukà? Bidi nè cyà kwikala nànkù. Wèwè nmwikàlè nè misunya búngi cyanààná pambèlu apa, kayiyi nè mwoyi munda mwàyì to, nè muyìkùne pambèlu apa, kí—kí mmifwànyine kutòloka to, yidi yilààla mwaba awu yibola. Kàdi kwèná mwà kukùna mwoyi wà cikùnnyìlbwà pàdiku kakùyì musunya to. Pa nànkù, nudi numòna’s, cintu cyònsò mu kaabujimà ndisangila. Ndi nteeta kunwambila mpindyewu bwà Kilistò nè Èkèleeziyà. Ndisangila. Nwamònu’s, piikala mukàjì mwikale dimiinu dyèndè yèyè mwinè díbà adi kèna dijinga nè mulùme to, ùdi mwà kulela mwanèndè yèyè mwinè. Kàdi yèyè kèna mwà kwikala nànkù to, kèna mwà kulelakù mwànà awu pàdiye kàyì mwànji kutwilangana nè mulùme nànsha, bwalu bidi bikèngela bibìdi abi pàmwe bwà kwenza dimiinu. Ncyà bushùwà anyi? Kùnabi dimiinu kadiyi nè mwoyi munda mwàdi to, kàdi ùmonè cyènzekà.

⁹¹ Bu mùdibu bàmba nè mukàjì ewu mmulelè tubwà etu. Nwamònu’s, kacìvwakù mwà kwikala nè mwoyi to. Kacìvwakù mwà kwikala nànkù to, bwalu, nwamònu’s, bungungu abu kabwàkusambakanakù to.

⁹² Mpindyewu, mōnaayi eci mpindyewu, mu—mukàjì awu kàvwa dimiinu to. Ki bwà cinyi, Yèyè wàkamba nè: “Nènteekè lukunà pankaci pàa dimiinu dyèbè nè dimiinu dyà nyòka.” Ùmwambila nè Yèyè ùvwa, Yèyè mwinè, mwà kumupèesha dimiinu, kabiyi ku dyangatangana dyà mulùme nè mukàjì, ku disangila dyà mulùme nè mukàjì to. Yèyè ùvwa nè cyà kufùka dimiinu munda mwèndè. Èè, wèwè udi wamba nè: “Aci ncifwànyine kwikala dimiinu Dyèndè anyi?” Èyowà. Divwa mwà kwikala dyà Màriyà díbà adi paanyimà pàa Yèyè mumanè kumupèeshadi. Eci ke dísu dyànyì, Yèyè ngudi mumpèeshe eci. Cidi ndísu dyànyì, kàdi Yèyè ngudi mudimpèeshe. Eci ncyanza cyànyì, Yèyè ngudi mucimpèeshe. Eci ndíyì dyànyì mémè, kàdi Yèyè ngudi mudimpèeshe. Nwamònu anyi? Nè dimiinu divwà, Màriyà... kadivwa nè cyà dyenza nè Màriyà nànsha. Divwa ncintu civwà Nzambi Nkààyèndè mwenze.

⁹³ Pa nànkù dimiinu divwà munda mwèndè díbà adi, divwa ndisangila dyà cyenzedi civwà kaciyi cilondàngàne nè mikenji nànsha, civwà lufù. Yèyè ùkaavwa mumanè kwimicishiibwa kùdi dimiinu dyà nyòka, bwalu yèyè ùkaavwa mushààle nè... Ke kukùdimukayè è kwamba, yèyè mwinè nè: “Nyòka ngudi mungambishe.” Ncyà bushùwà. Nènku, dyàkàmwè, Kaayinà kulwayè.

94 Kaa, tudi bamanyè nè yêyè wákamba nè ùvwa mupetè mwânà kùdì Nzambi. Ncyà bushùwà nè, mwânà yònsò udi mulediibwe ewu, mulela mu masandi nè bikwàbò byònsò, ùdi nè cyà kulwila ku cyenzedi cyà Nzambi. Yêyè ke Umwèpelè Udi mwà kufila mwoyi. Cyà bushùwà. Ncyà bushùwà.

95 Nwamònu's, yêyè ùkaavwa mumanè kwikala mudilongòlòle bwà kwikala maamù. Nè aci kacya... cyàkenzàci, cìvwa ànu kuumusha cintu cyà dimiinu dyà nyòka. "Dimiinu didi munda mwèbè mpindyewu didi ku diimiciibwa, cyenzedi cyèbè cyà kaciyi cikumbànàngàne nè mikenji cibèngàngàne nè Dìyì Dyànyì, nè cintu eci kaaba aka, nènku mpindyewu ukàadi nè dimiinu dyà nyòka. Kàdi Nènkupèeshè dimiinu ku diimiciibwà kadìyì katòba, nè Dimiinu Dyèndè nedìzaazè mutù wà nyòka, nè mutù wèndè newùtapè cikànkanyà." Amen. Lekèlaayi ànu Nzambi àcipetè, cyòci ciikàle Dìyì Dyèndè Yêyè nè Cìfikishè ku dyenzeka.

96 Ke bwà cinyi bìdi bikèngela bwà wêwè kwikala mu bwobùmwe nè Nzambi. Ke bwà cinyi Peetèlò wákamba mu Ditùkù dyà Mpenta, paanyimà pàa Yesù mumanè kwamba nè "nubàbàtiizè mu Dìna dyà Taatù, Mwànà, Nyumà Mwímpè," Peetèlò kukudimuka è kwamba nè "nùbàbàtiizè mu Dìna dyà Yesù Kilistò," bwalu Dìna dyà Taatù, Mwànà nè Nyumà Mwímpè m'Mukalenge Yesù Kilistò. Nwamònu aci anyi? Bìdi bikèngela didìsanga.

97 Pòlò kacya kàvwakù mwànji kumòna Peetèlò to, kàdi Nyumà Mwímpè umweumwe awu, mu disangila òmwèdìmwè adi (butùmbi's wè!), kumufikisha ku dyamba cintu cìmwècìmwè aci. "Nukàadi bapetè Nyumà Mwímpè kacya nwìtabuuja anyi?"

Yêyè nè: "Katwèna bamanyè mene ní ùtukù to."

Yêyè nè: "Nwàkabàtiijiibwa mùshindù kaayi?"

Bòbò nè: "Kùdì Yone."

98 Yêyè nè: "Bikèngela nùbatijiibwè cyàkàbìdì, mu Dìna dyà Yesù Kilistò." Ke kupetabò Nyumà Mwímpè.

99 Cìvwa ncinyi? Disangila, kwamba cintu cìmwècìmwè cìdì Nzambi wàmba aci! Nènku aci's ki ditonda. *Ditonda* mbwena kwamba nè: "kwamba cintu cìmwècìmwè aci." Nè Yêyè m'Mwakwidi Munène wa ditonda dyètù, bwà kwenza cyenzedi pa cìdìYe mwàmbè. Tudi twamba nè Cìdi Bulelèlè, nè Yêyè ùdi ùkwàcilaPù mudimu. Kaa, ekèlekèlè! Ki bwalu mbwòbù abu's. Ke diimiciibwa ndyòdì adi.

100 Mpindyewu mònaayi mùshindù wùvwàye—wùvwàye—didìsanga dyèndè pankaci pèndè nè bàyèndè divwa dikòsòlòke. Nwamònu's, lùkàsàlùkàsà, Nzambi mmwenzè ànu wàmba nè: "Adàmà, mmunyi mùdì mwà kwenza cikampàndà eci?" Pamutù pàa kubwelelayè mukàjèndè, yêyè kwela mukàjèndè

bwalu pambidi. “Mukàjì Ûdì mumpèèshe ewu.” Didisanga ndinyangùke. Nwamònu anyi?

¹⁰¹ Cyàkènzàye ncinyi? Pamutù pàà kunanga bàyendè nè kwamba Bulelèlè, yèyè kushima. Yèyè—yèyè—yèyè—yèyè’s ùvwa nè cyà kwikala mwambè nè: “Yèyè kí mmumanye bwalu to, mèmè ngudi mumupèèshe.” Amen. Bible mmwambè nè: “Yèyè wàkapà bàyendè.” S’bìvwa bikèngela kwikalayè mwambè nè: “Muntu ewu kí mmumanye bwalu to. Mèmè nguvwa mumupèèshe nè pashùishe kudyàye, kàdi mèmè ke uvwa mumupèèsheci.” Pamutù pàà cyòcì aci, wàkacyèla nyòka pambidi, kajila kàà cikòsò.

¹⁰² Ke cintu cìmwècìmwè aci cìdìbo bàteeta bwà kwenza leelù ewu. Nwamònu’s, mulùme, mukàjì, disangila dinyangùke. Bwobùmwe bwà mulùme nè mukàjì bùvwa bunyangùke pankaci pààbò. Bùmwe bwàbò bùvwa bunyangùke, bùmwe pankaci pààbò nè Nzambi bùvwa bunyangùke. Cintu cyònsò mu kaabujimà cìvwa cinyangakaja. Bwà cinyi? Bwalu bààkabènga kwitabuuja Dìyì dìmwepelè. Kaa, mwanèètù, ekèlekèlè! Eyowà’s, bìvwa bikèngela kwikalayè mwambè Bulelèlè. Bùmwe bwèndè nè bàyendè bùvwa bufwè, nè bùmwe bwàbò nè Nzambi bùvwa bufwè. Nè ekèleeziyà yònsò udi kàyì wàngata Dìyì dyà Nzambi mu kaabujimà awu, cintu cìmwècìmwè aci cidi cyènzekà. Mèmè ndi muCìnangè, kí mmwòmò anyi?

¹⁰³ Tàngilààyi mwanèndè mwanààbutè, Kaayinà, mushebyanganyi, mwena mashimi, museeswishanganyi, mwena mukàwu, mukwàcìle mwanààbò mukàwu. Mwanààbò wàkalama Méyì matùmwa à Nzambi, nè Nzambi wàkenza difuta dyà cibawu ku dishipa dyà mulàmbù nè kuwùlàmbula bwàbò bóbò. Tàngilààyi dipanga dyà cyòcì aci mpindyewu, dyà Sàtaanà, wàkateeta bwà kupingaja cintu kampàndà pa kaaba kààwù. Nzambi, Bible mmwambe nè, wàkaya nè kubènzela bilùlù byà bisèbà; bwà kupeta bisèbà, cintu kampàndà’s cyàkafwà. Adàmà wàkateeta kudyènzela bilùlù byà mabèjì à mfigì. Kabyàkakùmbana to, mwoyi wà micì. Mwoyi, mwoyi ùdì ùteentemuka ùvwa nè cyà kufwà. Pa nàнку kushebeyaYè mwoyi kampàndà wà mutàmbe kushààdila, nè wàmba mwòmò amu nè: “Dìngà ditùkù Mwoyi Wànyì Sungasunga newùfidiibwè bwènù nwènù, Mwoyi mulelèlè wikalà mwà kwaluja cyàkàbìdì didisanga edi.” Mpindyewu, netùkafikèku mu tusunsa tukese emu, bu Nzambi mwà kwanyisha. “Nwamònu’s, ke mwoyi wà mwànà wa mùkòòkò ngwòwù ewu. Mpindyewu, nudi nudìjìngila eci bwà kusokoka butakà bwènù.” “Kwèna nè cyà kudyà bimuma byà pommes to”? Macimbu’s wè! Nwamònu anyi? “Dìjìngilaayi bisèba ebi.” Bìvwa bikèngela bwà kushebeyaYè cintu kampàndà.

¹⁰⁴ Nè mwànà wa Sàtaanà, kààkalwa mu mùshindù ùvwàYe muswè awu to, wàkacyènzà. Mùshindù kanà wònsò wùdì muswè kucyàmbe awu, kàdi ùvwa mmwànà wa Sàtaanà, bwalu bukezùke bwà Adàmà abu kùdì Nzambi kabùvwa mwà kwikala butwàle cintu cyà mùshindù awu to. Mònaayi dìbà adi mwànà

wa Sàtaanà awu, ùteeta kwenza difuta dyà cibawu, wàlukila nè cintu cimwècimwè cidi bantu bààbùngi bàmba leelù ewu nè: mushiki wà bimuma byà pommes nè mamuma à mu ditùnga, bwà kuàlàmbula bwà difuta dyà cibawu, ncipaja-mulùngù.

¹⁰⁵ Kàdi Abèlè mwakàne awu wàkenza cinyi? Ûvwa mumanyè nè kacìvwa cintu cyà didyà dyà pommes to. Ûvwa mashi à mamwèndè nè tatwèndè, mwoyi wàbò. Pa nàнку yèyè kutwàla mwànà wa mùkòòkò, ànu mwàkenzà Nzambi amu. Alèluuyàh! Yèyè wàkashààla mukwàte ku Dìyi dyà Nzambi, nè Kaayinà wàkamumvwila mukàwu.

¹⁰⁶ Cintu cimwècimwè aci leelù ewu's! Kulwakù mulàmbù wà mashi awu, Dìyi dyà Nzambi adi ànu menemene cidiDì dyàmba aci, shààla wèwè ànu naaDì. Bààbùngi bàà kùdìbò bàvwa bafwànyine kwitabuuja mulàmbù wà mashi awu, bushùwà's, kàdi amba ànu cintu kampàndà cikwàbò mu Dìyi, bàdi bàmba nè: "Kaa, to, mèmè ncyèna ngiitabuuja aci to. Uh-huh, aci—aci's cidi bwà ditùkù dikwàbò." Dyabùlù umweumwe wa kale awu, diyelè òmwèòmwè dyà kale adi's! Indilaayi too nè patwàjikijà naadi. Mònaayi, yèyè wàkatùùluka ànu mùshindù wùmwèwùmwè awu.

¹⁰⁷ Kàdi Kaayinà, mu mìshindù yèndè yà mikùtàkàne ayi, kí mmikùtàkàne bikolè to, kàdi mu mìshindù yèndè yà budimù ayi, kuseeswishayè, nè kutwàla mamuma. Adàmà wàkalama . . . Abèlè wàkalama Dìyi dyà Nzambi, wàkatwàla mwànà wa mùkòòkò. Nzambi kwamba nè: "Ncyà bushùwà, Adàmà, udi mulamè . . . Anyi, Abèlè, udi mulamè Dìyi Dyànyi." "Kaayinà, udi mumanyè nè kacìvwa . . . Mpenyi pàmvwà mwangacile ndambù wa mabèji à mfigi bu mwàkateeta papa webè bwà kwenza amu? Udi wangata bisùmbù byà tumuma twà mfigi anyi twà mvinyò anyi pommes anyi cyònsò cyùdi naaci aci. Nènku mpindyewu papa webè wàkatùùle mabèji ku mucì, bwà kuteeta kwenza difuta dyà cibawu, kàdi apa wèwè udi uteeta kupòòla mamuma ku mucì." Kacìvwa aci to! Cìvwa mmashi à ku mwoyi.

¹⁰⁸ Kaa, Nzambi kupweka naawù, kwamba nè: "Ki cyòci eci." Ke Abèlè kulàmbulayè wà mulelèlè awu. Pashiishe mwanààbò wa balùme kumumvwilayè mukàwu. Tàngilàayi cyàkenzàye, wàkashipa mwanààbò wa balùme awu. Nzambi wàkajuula mukwàbò; bu lufù, dijiikiibwa, nè dibìikà dyà ku lufù dyà Kilistò. Tàngilàayi. Nzambi dibà adi, Wendè . . . CyàkambilàYe Adàmà nè Evà ncinyi? "Ndàayi nè nùvulanganè nè nùjè buloba." Kutangalaja cisà cyà bukwàbantu pa buloba bujimà, bwà Wàmòna mwà kukwàta naabò mudimu ku muntu nè ku muntu too nè mùvwàYe mwà kubààluja pàmwè. Wàkakula nè bantu, bantu-nkààya, nè muntu yònsò. Kàdi kabàvwa baciswe mùshindù awu to.

¹⁰⁹ Kanùpangidikù dibuulula edi to. Nzambi, cyènzekèku. Nùcimònèku mùshindù wùndi mèmè ncitàngila ewu.

¹¹⁰ Nwamònu's, kabìvwa nànkú to, Nzambì kàtú ùkwàta mudimu nè muntu mu cisùmbù kampàndà to. Nzambì kàtú ùkwàta neebè mudimu mu bulongolodi kampàndà to. Ùdi ùkwàta neebè mudimu bu muntu-nkààyà, muntu-nkààyà. Tudi babàtìjìibwe kùdi Nyumà Mwímpè mu mùshindù wà muntu-nkààyà. Mu mùshindù wà ciibúngì tudi babàtìjìibwe mu Mubidi patùdi babàtìjìibwe nè Nyumà Mwímpè apu. Muntu pàànkààyà, muntu yònsò mmubàtìjìibwe nè Nyumà Mwímpè, Nzambì ùkwàta mudimu nè muntu yònsò. Ke cìvwa kiiipàcìlà Kèndè aci, kubàtàngalaja pa buloba bujima bwà Wàmòna mwà kukwàta naabò mudimu muntu pàà nkààyèndè.

¹¹¹ Kàdi pamutù pàà cyôci aci, cyàkenzekà ncinyi? Byàkakèngela bwà Nzambì àtapululè cisàmbà cyà Kaayinà nè cisàmbà cyà Setè. Wàkiiipata Kaayinà. Wàkabàtàpulula bwà Wàmòna mwà kukwàta mudimu nè èkèleeziyà Wèndè. Tàngilààyi. Kaayinà wàkatàpuludiibwa. Mpindyewu tàngilààyi. Nzambì wàkatàpulula Kaayinà mubì wa Evà awu nè Setè wa cijila wa Adàmà. Kaa! Wàkacyènza anyi? Kupicila ku cyenzedi cìvwa kacyi cìlonda mikenji nànsha, mukàji ewu ùshààla nè muntu kampàndà mukwàbò nè kulela mwànà. Nzambì wàkatàpulula mwànà awu nè nkòngò yèndè nè muntu mwakàne nè wa cijila ewu, nè bèndè bânà.

¹¹² Ncintu cìmwècìmwè aci leelù ewu, munkaci mwà kutàpuluka, bàtāpulula, kubāsangana nè, kabāvwa mu bwobùmwè to. Kabāvwakù mwà kwikala nè bwobùmwè nànsha. Bufùkù bùdi mwà kwikala mu bwobùmwè nè ditùkù anyi? Mwena kwitabuuja ùdi mwà kwikala mu bwobùmwè nè mwena dyabùlù anyi? Muntu udi witabuuja Dìyì dyònsò dyà Nzambì ùdi mwà kwikala mu bwobùmwè nè aba bàdi ànu biitabuuja citùpà cyà Dìyì dyà Nzambì anyi? Nzambì utu muswè batapuludi.

¹¹³ Mpindyewu, Kaayinà ùvwa mwànà wa Evà, wàkamba nè: “Ndi mupetè mwànà wa balùme.” Kàdi Setè ùvwa mwànà wa Adàmà. Nènku Nzambì wàkabàtāpulula bwalu kāvwa mwà kulekela... Mòna's, nùnkú's mbanyàngùke ewu nè mukwàbò, bânà babì bàà Kaayinà bàvwa mwà kunyangakaja bânà bimpè bàà Setè. Ncyà bushùwà.

¹¹⁴ Mpindyewu tàngilààyi! Nènku démon umweumwe wa kale wàkafikisha Evà ku dibenga kwitabuuja Dìyì dimwèpelè dyà Nzambì awu, nè kubàmbila bwà kutàpulukabò muntu nè mukwèndè nè kwikalabò nè nsòmbelu mushiilàngàne, muntu nè muntu, yèyè dyabùlù umweumwe awu wàkabwela munkaci mwàbò nè kubāsangisha cyàkàbìdì. Nwacyùmvù anyi? Ambààyi nè: “Amen,” panwikalà bacyùmvwè. [Disangisha didi dyàmba nè: “Amen.”—Muf.] Wàkabāsangisha cyàkàbìdì mu disangila dyà mashimi, cyenzedi cyà Nzambì... cibèngàngàne nè ndongamu wa Nzambì. Cyàkenzekà ncinyi? Wàkacyènza bìshi? “Bânà bàà balùme bàà Nzambì,” mùdì Bible mwambè, Genèsè,

“bààkamòna bânà bàà bakàji bàà bantu.” Bânà bàà balùme bàà Nzambi, bânà bàà Setè, bààkamòna bânà bàà bakàji bàà bantu, bânà bàà Kaayinà abu, mùshindù mwinè wùvwàbo balenga’s wè. Hum! Kàdi, cyàkenzàbo ncinyi, bààkabànanga’s! Ke kudisangishabò cyàkàbìdì pàmwè, bwà bulenga bwà kwisù, bwà nè “bàvwa bímpè kumòna.”

¹¹⁵ Cintu cìmwècìmwè aci leelù ewu! S’ki bwalu mbwòbù ebu, bânà bèètù. Nwènù beena Mpenta bafùbà, bàvwa Nzambi mutàpùlùlè nè kunùtùma bwà nwènù kwikala pankaci pàa bukwaamàngumba! Kawèna mwà kuvwija mpenta dìngumba to. Wàkanùtùma bwà nwènù kwikala cisàmbà Cyèndè. Kàdi nudi bamòne èkèleeziyà minène milenga nè tèòlòjì, nudi badyenzèle bilongelu binène bùngì cyanààna nè bikwàbò. Kàdi cinwàkenza ncinyi? Nudi basangishe cyàkàbìdì cisàmbà cyà Nzambi pàmwè nè bulongolodi, ciinè aci, cishìmikidi ciinè cyàcìs ncyena Kàtòlikè. Èkèleeziyà minène, milenga, nè bantu balwàte bímpè, mutàngidi wa cimenga nè bakwàbò bònsò bàdi bàlwamù, balwàte bímpè bitàmbe, batàmbe kulonga tùlaasà, beena tèòlòjì batùmbùke, bamanyè mùshindù wà kulwa mu mwaba wùdì muntu yònsò ùvwàla bilàmbà byà maleela àbùngì menemene, nè mpaasàtà wimana ànu bímpè menemene pa mwaba awu. Ncinyi aci’s? Udi utàngila bintu bivwà Nzambi mupiiishe. Nènku nwènù nudi bangàte èkèleeziyà wa beena Mpenta (Nzambi, cìlekèleku cìya pa mikàbà yà mèyi’s!) nè bamusangè mu bulongolodi kampàndà. Nzambi kacya kàtùkù muswè bwà Cyòcì aci kudisangaCì to, Yèyè ùvwa muswè bwà kutàpulukaCì; kacya kaCyàkadisanga nè maalu à pa buloba nànsha.

¹¹⁶ Dyabùlù umweumwe wa kale wàkafikisha Evà ku dibenga kwitabuuja Dìyi dyà Nzambi awu nè kumwenzela bibi awu, nyèwù wàkaalukila buludì nè kwangata bânà bàà Setè nè kubàlekela bà mòna bakàji balenga bàà Kaayinà aba, kàdi kudisangabò cyàkàbìdì. Nè bòbò kabàvwa beena dyabùlù to. Kabàvwa ba-communistes to. To, to. Bàvwa beena kwitabuuja. Kwambabò nè: “Mpindyewu pàmwàpa Mukalenge mmufwànyine kwenza cintu kampàndà.” Anyi, kaa, eci mùshindù awu. Bòbò—bòbò bàvwa. . . Bàvwa bèèla meejì nè bàvwa bènza cìvwà cijaalàme. Nè cìvwà cìkèngelà bwà Nzambi kwenza ncinyi? Kukùpula cintu cyònsò mu kaabujimà, byàkakèngela bwà kukùpula cintu cyònsò mu kaabujimà. Mwìnshi mwà disangila dyà mashimi! Byàkakèngela bwà kutùmaYè dipaasalala dyà màyi nè kubùtula musùmbà mujimà. Cilumbulwidi cyàkalwa bwà disangila dyà mashimi adi. Cilumbulwidi cyàkatuuta Edènà bwà didisanga dyà mashimi.

Mpindyewu, nyòka ùvwa nè dimiinu anyi? Bundù bwèbè.

¹¹⁷ Disangila dyà mashimi dyàkatwàla cilumbulwidi pa buloba, kùdì Evà nè Adàmà, mu Edènà. Nènku disangila dyà mashimi kulwadi nè mvùla yà cilumbulwidi cyà Nzambi pa buloba bwalu bânà bàà bakàji bàà Kaayinà bààkanàya nè bânà bàà balùme

bàà Nzambi, nè bààkabànanga nè bààkadisanga cyàkàbìdì. Ki bwalu mbwòbù abu's. Disangila dyà mashimi: "Cintu nànsha cìmwè kacìvwakù mwà kwenzeka to." Cyàkenzà Nzambi ncinyi? Wàkabùtula cintu cyònsò nkòòng, bònsò pa kuumusha Noà wa kale wa mushinga mukolè nè dīkù dyèndè. Yèyè...bòbò bààkadisanga.

¹¹⁸ Nè cyàkàbìdì paanyimà pàà cyòcì aci, paanyimà pàà lufù lwà Noà, nè dīkù dyà nyumà dyà Noà adi, katanci aka anyi, bānà bàà bantu kubangabò kutàngilangana muntu nè mukwèndè cyàkàbìdì. Bàakenza cinyi? Bàakamba nè: "Mpindyewu, twètù katwèna beena dyabùlù to, tudi bònsò twitabuuja Nzambi." Pa nānku kupetabò muntu, ku mulombodi kampàndà, mwèpiskòpò munène kampàndà wa mutāmbidile dīnà dyèndè Nimèlòòdè, nēnku kwibakabò kàleyi. Kabāvwa beena dyabùlù to. Bāvwa biitābùùje nè kùvwa Dyulu. Bāvwa biitābùùje nè kùvwa ifernò. Bāvwa biitābùùje manyooka. Kādi bānà bàà balùmè bàà Nzambi nè bānà bàà bakājì bàà bantu, cyàkàbìdì, nè bààkadisanga, mu mùshindù mubì, nè kwibaka kātèdrālè kanène menemene, bulongolodi bunène menemene, nè myaba mikwàbò yònsò yivwa ku—ku Babèlè, nkùvwàyi nè cyà kufuta bitādi.

¹¹⁹ Ke bòbò nè: "Mémè ndi nzwāmbila citùdì mwà kwenza. Nudi bamanyè nè tudi nè meeji matwè." Mpenyi pāvwbò bāfwānyine kulūpetela lungènyì alu's? Lwà kùdì dyabùlù. Aci's mmwòmò menemene. Bākalūpetela kùdì dyabùlù bu—bu Evà. Úvwa mulūpetele kùdì dyabùlù. Pa nānku kwambabò nè: "Netūdiibākìlè twètù biinè bulongolodi kampàndà, netūsānkishe Nzambi. Nēnku mémè nēnnwāmbilè citwēnzà, netwikale nè bibāndilu bikesè. Netūbandè muulu nè netwimbè nè tūsānkè nè banjèlò, nè kwalukila panshì apa nè kusōmba mùshindù wutùdì baswè awu." Dyabùlù awu ùcìdì ànu nè mwoyi. Nwamònu anyi? Kabivwa bipetangana nè mèyì matùma à Nzambi to. Kabāàkalama mèyì Èndè matùma to. Cyàkenzà Nzambi ncinyi? Èè, bààkiibaka cibumbà cyà Baabèlè, cintu cibì cyàkàbìdì, ke Nzambi kubābwejakaja nè kubātāpulula.

¹²⁰ Nzambi wākatāpulula kàbìdì nè Wākatùma Abraham mwakāne wa kale awu pambèlu, wāmba nè: "Nēnkwangātè cyanānà bwà kwenzela ditùnga ku wèwè eku." Nzambi wākabātāpulula. "Pātukà munkaci mwàbò, Abraham, lekèlā byònsò bishaalè paanyimà." Nè Nzambi kàakamubēneshakù to too nè pàakashiyāye bintu byònsò paanyimà, Lotà ke ùvwa wa ndekeelu. "Pātukà, Abraham, tāpulukà wèwè mwine nè beena bupidya abu. Nēnku Mémè nēnkwangātè ngēnzèlè ditùnga ku wèwè aku. Nēngēnzè bantu biikalà mwà kulama mèyì Aānyì matùma. Nēmbāpèèshè mpùngà mukwàbò."

¹²¹ Abraham mununu mwīmpè awu wākaya kasōmbela mu buloba bwenyi. Ke cìdì Abraham kanà yònsò ewu wēnza, musōmbèle mu buloba bwenyi. Cinyi? Kwitabuuja mulayi wùvwà kawùyi mwà kwenzeka to, mu ngaakwilù wa buntu. Nudi

nwela meeji nè ncinyi cìvwà bangàngàbukà bàà cyena-leelù bàà Kaayinà abu bafwànyine kwikala bambè ditùkù adi? “Yoyòyò, ekèlekèle, muntu mukùlàkàji, wa bidimu lukàmà lujimà, nèikalè mwà kupetela mwànà kùdì mukàjèndè, wa bidimu makùmi citèemà awu anyi? Kaa, cintu kaayi cyà macimbu’s wè!” Kàdi Abraham wàkiitabuuja Dìyi dyà Nzambi. Nè cyònsò cìvwà cibèngàngana naaDi, yèyè wàkacibìikila bu nè kacìvwakù to.

¹²² Mabàtiiza ònsò à mashimi aa, masaluka à mashimi aa, bintu byà mashimi bìdì munkacì mwà kwenzeka leelù ewu ebi, amba nè kacyènakù to, itàbuuja Dìyi dyà Nzambi nè ùtungunuka nè kuya mutàngile kumpàlà. Cìdì ànu dibwe dyà cilèndwishi bwà kukupangisha bwà kulenga cilelèlà. Ncyà bushùwà. Tùngunukàayi ànu nè kuya, nwènu bânà. Dìyi dyà Nzambi, Nzambi ùtu ùshààla mukwàte ku Dìyi Dyèndè. Nànsha dyabùlù mukùpe bintu byà mafi bùngi kaayi kuntwaku, Nzambi ùcìdì ànu nè Dìyi dilelèlà nè Ùdi ùDilama.

¹²³ Abraham wàkabìikila cintu kanà cyònsò cìdì cibèngàngàne aci, nè ncyà mafi. Loomò, nshapitá mwi4, panwikalà nucifunda. Abraham wàkabìikila cintu kanà cyònsò cìvwà cibèngàngàne nè Dìyi dyà Nzambi aci, bu nè kacìvwakù to. Ncyà bushùwà. Yèyè wàkiitabuuja Nzambi, ùvwa nè dikàndà, nànsha mùvwà mubidì wèndè nè butekètè amu, nànsha mùvwàbì bimwèka kabiyi mwà kwenzeka, Abraham wàkatùngunuka ànu nè kuciitabuuja. Mpindyewu, kabìvwa bìkèngela bwà yèyè kupweka ku cyoshelu kwamba nè: “Cyòci kaciyi cyenzèke mpindyewu mene to, nèngènzè. . . Ncyèna mumanyè ní bìdì bikèngela kuciitabuuja anyi to.” Abraham wàkashààla naawù munda mwà bidimu makùmi àbìdì nè bitaanu kumpàlà kwà kulwawù, kàdi wàkalwa ànu kulwa. Ke mùtùwù wènta misangu yònsò.

¹²⁴ Ku Abraham, kulwakù Izàkà; ku Izàkà, kulwakù Yakòbò; mu Yakòbò kupàtukamù bankambwà; mu bankambwà, kuyabò mu Èjiipitù; mu Èjiipitù, kupàtukamù ditùnga. Pashiishe pàakajuulàYe ditùnga Dyèndè adi apu, cyenzedi Cyèndè cyà bulòbo aci, cyàkenzàYe ncinyi? Nzambi wàkabàtápùlùla cyàkàbìdì. Bupidyà nè diitabuuja kabyèna mwà kudisanga pàmwè to. To, mukalenge. Yèyè wàkabìtápùlùla cyàkàbìdì, bwà Bèndè Sungasunga. CyàkabènzèlèYe ncinyi bwà kwikala mutwishìibwe nè bàvwa balombòdìibwe mu mùshindù mujaalàme? Tèelejàayi nè ntèmà mpindyewu, katwèna nè dìbà dipitèpìte bùngi mpindyewu to, pàmwàpa tukwàbò tusunsa dikùmi nè tùtaanu. Wàkabàlombola pabwìpì. Tàngilàayi, Wàkajuula ditùnga, kubàtèeka mwínshì mwà bandeeji nè bikwàbò. Bàvwa batucìibwe nè bàdila mwadi, nè bàdila mwadi nè bàtùngunuka nànkù. Kàdi Nzambi ùvwa mutàngile panshì, Yèyè kuvùluka mulayi wònsò wàkapèèshàYe Abraham. Dìngà ditùkù Yèyè—Yèyè kudyàmbidila. . . CyàkabènzèlèYe ncinyi? CyàkenzàYe ncinyi pàakabàtápùlùlèYe apu? Wàkabàpèèsha mukenji nè Wàkabàpèèsha mupròfetà, Wàkabàpèèsha Dikunji

dyà Kapyà. CyàkenzàYe ncinyi? (Éyì Nzambì!) Wàkatèèka èkèleeziyà Wendè mu bulongame. Dikunji dyà Kapyà, Nyumà, bwà kubàlombola, mupròfetà uvwa mwà kubàmbila Bulelèlè bwà Dìyì Dyèndè awu. Bàvwa badìlongòlòle bwà lwendu dîbà adi. Kî mbilenga bilayà anyi?

¹²⁵ Bààkaditwa mu cipèèlà, bènza bimanyinu nè maalu à kukèma, kukàngula Mbû Mukûnze, kubîikila bipùpù byà mu ifernò pa Pâlò. Kaa, ekèlekèlè! Dikunji dyà Kapyà dyènda diya kumpàlà kwàbò, amen, dibàlombola nè bufùkù nè mundaamuunyà. Àlèluuyàh! Mupròfetà, mwikàle nè lulamatu ku Dìyì adi, mwimàne mwaba awu kacya ànu wàbàlama mu njila. Amen. Dîbà adi Úvwa pabwîpî bwà kwangata bàna Bèndè's. Aci's ke musangu wà kumpàlà wàkabîikidiibwàbò nè ng'èkèleeziyà. Cìvwa ncifwànyikijilu cyà cìikalàYe mwà kwenza mu matùkù à ndekeelu. Netùfikèku cyàkàbidì ànu mu katanci kakesè emu. Wàkabàbîikila bwà kupàtukabò, kubàpèèsha mikenji, kubàpèèsha Dìyì Dyèndè, nè kubàpèèsha mupròfetà, Wàkabàpèèsha cimanyinu, nè Wàkabàtùma mu cipèèlà. Wakabàtàpulula nè bakwàbò bàà pa buloba abu.

¹²⁶ Bààkenza cinyi? Bààkamòna bakàji balenga bàà mu Moàbà, èkèleeziyà wa civùmvù nè nzambì milùme nè mikàji nè bikwàbò byònsò. Bààkenza cinyi? Bààkabànanaga, kusèlanganabò naabò. Aci ncilelèlè, ncilelèlè menemene. Ndi ndifwànyikijila nè bakàji balenga bakesè bàà beena Moàbà abu bàvwa balenga bàà dikèma.

¹²⁷ Ndi nè cipròfetà citèèka kumbèlu, òmwè dyà ku matùkù aa nèngìikalè mwà kucìbala. Nènku nudi nudikonka bwà cinyi ndi ntàndisha bakàji mùshindù wùndì ngèza ewu. Kùkaadi bidimu makùmi àsàtù bijimà... Ndi nè EMU MMÙDÌ MUKALENGE WÀMBA's! Kùkaadi bidimu makùmi àsàtù pangàakabwelà mu mudimu wà bwambi, Yèyè kungambila nè ngenzèlù wa bakàji neàtàmbe kwikala wa masandi nè luumù lubi mu matùkù à ndekeelu nebiikalè cintu cyà citàmbe kwikala cikooyike pa buloba's. Cyà bushùwà's! Wàkacibanga ku cibangidilu nè Sàtaanà ùdì ùkwàta nendè mudimu ku ndekeelu. Kàdi tàngilàayi cidi munkaci mwà kwenzeka, tàngilàayi munda mwà bidimu byònsò. Yèyè nè: "Neàtungunukè nè kudivùula bilàmbà." Ke yèyè nè: "Nekwikalè ànu kasumbu kakesè kàà menemene, kàà Basungula mene bàdì badyànjila kulongolola abu, bààpàndukà ku cyòci aci."

¹²⁸ Pààkalwà cikèènà-kumòna aci, cyàkantàcisha bikolè. Mèmè kudyàmbidila nè: "Bakàji..." Mèmè kwalukila mu Bible kùdì Yeshàayi, ngèela meeji ku nshapità mwi5, nè m'Mwambè nè: "Ditàmba didi dipànduke ku... bàna bàà bakàji bàà mu Sionà, mu ditùkù adi nedìikalè dilenga kùdì Mukalenge."

¹²⁹ Mukàji kampàndà ùvwa mumfùndile lukonko ditùkù adi, kwambayè nè: "Mwanèètù Branham!" Anyi, to, ùvwa mmuntu

mulùme, mwambi. Yèyè ùdi mwà kwikala mwimàne kaaba aka mu dindà emu. Ùdi ànu wa ku Ohio. Ke yèyè nè: “Tudi baswè kwamba cintu cìmwècìmwè cyùdi wamba aci, kàdi tudi tusangana cintu kampàndà pa mikàbà yèbè yà mèyì cìdi kaciyì cijaalàme to.” Ki Billy kuntwàdila mukàndà awu. Yèyè nè: “Cintu kampàndà pa mikàbà yèbè yà mèyì,” wamba nè, “cìdi cibèngangana bikolè menemene, Mwanèètù Branham, nè Dìyì dyà Nzambì. Kàdi’s tudi baswè bwà—tudi baswè kwamba cintu cìmwècìmwè neebè.” Yèyè nè: “Lukonko lùmwèpelè lùndi muswè kukwela, n’Kolintò wa Kumpàlà, nshapità wa 11, nè ùdi wamba nè bwà bìdi bitàngila cibwikilu cyà ku mutù cyà bakàjì, nè balùme kabèèna nè cyà kwikala nè cibwikilu to.” Yèyè nè: “Tudi twitabuuja aci. Bivwa bikèngela bwà bakàjì kwikalabò bàvwàla bifulu mu èkèleeziyà, nè bikèngela bwà balùme kutùulabò bifulu byàbò mu èkèleeziyà.” Yèyè nè: “Tudi twitabuuja bibwikilu byà ku mitù abi, nè bikwàbò.” Ke yèyè nè: “Pashiishe lukwàbò lukonko lùdi nè bantu bàdi bàlwa kutùdi bàmba nè Mwanjèlò wa Mukalenge ùdi wùkwambila byònsò. Dìyì dyònsò dyùdi wamba didi difùmina kùdi Mwanjèlò wa Mukalenge. Nènku, Mwanèètù Branham, mbikolè be bwà kulwisha cintu bu nànkù,” mwàkambàye, “mu èkèleeziyà wanyì.” Yèyè nè: “Tudi baswè kwamba cintu cìmwècìmwè aci. Mpindyewu, Mwanèètù Branham, kwènàku wela meeji nè wèwè uvwa mu ntùpàkànyì kakesè mwaba awu anyì?”

¹³⁰ Mèmè kufùnda kwandamuna nè: “Mwanèètù wa mushinga mukolè, ncyèna mu ntùpàkànyì to. Kolintò wa Kumpàlà, nshapità wa 11, mmwambè nè bivwa bikèngela bwà mukàjì kwikalayè nè mutù wèndè mubwikila, nè mòna’s. Pashiishe mvensà wa 15 mmwambè nè nsukì yèndè mile ayi yàkamupèèbwa bu cibwikilu, kí ncifulu to.” Nyumà wa Kàtòlikè awu mmukòòkèshe èkèleeziyà ntàntà bule bukumbàne. Nsukì yèndè mile ayi ke cibwikilu cyèndè. Nànsha bufùki bwinè kabwèna . . .

¹³¹ Kàdi tàngilàayi, nè pashiishe lukonko lùdi lwàlukila cyàkàbìdì, muntu kampàndà mmunkonkè kùkaadi cikondo kampàndà . . . Ndi ndùumvwija pàndi ngààkulapù apa. Yèyè nè: “Èè, Bible’s mmwambè nè bivwa bikèngela kwikalayè nè nsukì mile bwà banjèlò. Bùdi naabù banjèlò nè cyà kwenza nè mukàjì mbunganyì?”

¹³² Mèmè nè: “Mwanjèlò ncinyì? Mmùsànjeelà.” Pòlò ùdi wamba cinyì? Mùsànjeelà mulelèlè, mwanjèlò wa kùdi Nzambì yèyè mulwè, mbìmpè wikalè nè nsukì mile. Yèyè nèapiishè cintu aci. Ncyà bushùwà. Mbanganyì bàdiku nè . . . bamanyè nè mwanjèlò mmùsànjeelà? Cyà bushùwà menemene. Mùsànjeelà mutùma kùdi Nzambì nèapiishè. Yèyè nè: “Bikèngela wikalè nè nsukì mile, bwà banjèlò.” Baamisànjeelà batùma kùdi Nzambì abu bàdi bàlwa, nèbapiishè cintu aci. Èyowà’s, cyà bushùwà, bwalu, mùsànjeelà mulelèlè wa kùdi Nzambì, mwanjèlò mmuswikàkàne

nè Nzambi, nè Dìyì Dyèndè kadyèna mwà kupangilakù to. Aci's ncyà bushùwà menemene. Pòlò Munsantu mmwambè mwaba awu nè, nànsha mene Mwanjèlò wa mu Dyulu yèyè mulwè kulongesha cintu cyà cyanààna, èdiibwè mulawu. Ncyà bushùwà. Mpindyewu tudi tujandula nè aci ncilelèlè, bìvwa bikèngela bwà kwikalayè nè nsukì mile, ke cibwikilu cyèndè ncyôci aci.

133 Kàdi ndi ndifwànyikijila bakàjì balenga bàà beena Moàbà aba bàvwa balenga bàà dikèma, bàvwa bafwànyine kwikala balongòlòlè bàmwè bu bàmwè bàà ku ba-Izàbèlè bàà cyena-leelù bàà leelù ewu aba. Kàdi, nànsha nànkù, kî mbakàjì bônso to! Ndi ngèèla meeji nè mukàjì udi mushùwashùwàle ncilengà. Nzambi àtumbè bwà mukàjì mulelèlè. Nwènu nudi basadidi bàà Nzambi. Kàdi mukàjì mulelèlè ùdi bu mulùme mulelèlè, nebàlonde Dìyì dyà Nzambi kabàyi bàcyùka cìdi dyabùlù wàmba, anyì cintu kampàndà cyà mashimi to.

134 Kàdi kwamba nè: “Mpaasàtà wetù mmwambè nè bìdi ànu bîmpè bwà kwenza *cikampàndà*.” Cìdi mpaasàtà webè mwambè nànsha ciikàle cinyì. Byôbì bìbèngangana nè Dìyì dyà Nzambi, dîyì dyèndè diikàlè mashimi, kàdi nùlamè Dìyì dyà Nzambi. Cìdi dîngumba nànsha ciikàle cinyì anyì cidiye aci, yèyè nè cintu kampàndà cyà kwamba pa bwalu abu, mwambile bwà kutàngilayè mu Dìyì dyà Nzambi. Cyà bushùwà menemene.

135 Kaa, mutùdi mwà kutùngunuka nè kumòna Nzambi ùbàtàpùlula's. Nebikengelè bwà twètù kwimanyika katanci kakesè cyanààna. Ndi nè ndambù wa Mifundu kaaba aka yîndi muswè ànu kuyicinguluka, bwà kufika, kulwijakaja bwà kufika ku ndekeelu. Dìbà adi pàvwà...cyàkenzekà ncinyì pàakasanganyibwàYe mwaba awu apu, pàvwà bakàjì bàà beena Moàbà abu? Bìvwa bikèngela bwà Nzambi àbàtàpùlùlè cyàkàbìdi. CyàkenzàYe ncinyì?

136 Pashìishe kulwakù Yesù. Mpindyewu kutùdi tukafika aku mwaba kampàndà. Pashìishe kulwakù Yesù, cimfwànyì pyòpyopyò cyà Nzambi, dimiinu dyà mukàjì, mwimìta kùdi Nzambi Yèyè mwinè. Maanyimèèlè munène wàkaDìibakila mubidi. Kabyàkakèngela bwà kusombaYè micì yà diitu kùdi muntu nànsha umwe to, kùdi mukàjì anyì kùdi mulùme. WàkaDìibakila nzùbu. Kaa, ekèlekèlè!

137 Ndi mvùluka Stèfanò mu ditùkù adi pààkiimanàye, kwamba nè: “Nwènu bàdi kabàyi batengula mu myoyi nè mu macì aba, nwènu beena nshìngù mitàndàbàle aba. Nudi misangu yònsò ànu nukàndameena Nyumà Mwimpè. Ànu mwàkenzà baatatwènu amu, ke munùdi nwenza pèènu!” Wàkamba nè: “Solòmò wàkaMwibakila nzùbu, kàdi pààbì Mutàmbe bunène wa mu Dyulu kàtu ùsòmbela mu nzùbu myasa ku byanza to, kàdi Wèwè wàkalongòlòla mubidi.”

¹³⁸ Kàvwa nè cyà kusomba micì mwaba nànsha wùmwe to. Ebèlù, nshapità wa 11, ngèèla meeji nku mvensà mwi² anyi mwi³, ùdi wàmba nè: “Buloba bwàkenjiibwa kùdì Dîyì dyà Nzambi, bintu byàkenjiibwa ku bintu bìdì kabiye bimwènèka.” Nzambi wákamba ànu nè: “Kwikalè,” nè kwikalakù. Kabivwa bikèngela bwà kuyayè kuntwaku bwà kwamba nè: “Mukalenge Ngondo, udikù mwà kunsombesha ndambù wa micì anyi? Mukalenge Mùtootò, Udikù mwà kumpèeshakù ndambù wa kàlisiyumù anyi?” Nzambi kàtu wènza nànkù to.

¹³⁹ Kabyàkakèngela bwà kwambaYè nè: “Màriyà, nsombèsèku Mèmè diyi, Ndi muswè kwenza mubidi bwà Mèmè kumòna mwà kusòmbelamù” to. Nzambi Mufùki awu kwakulaYè, nè yèyè ùvwa maamù ànu dîbà adi mene. Kàvwa maamù to, ùvwa ànu mukàjì wetù ewu mwambùle Dimiinu Dyèndè. Ncyà bushùwà. Vùlukaayi nè, yèyè kàvwa mamwèndè wa Yesù to. Bàà pa buloba mbàdì bàmba nànkù. Ndeejàayikù kaaba nànsha kàmwè mu Mifundu kàdiYè kacya mumubiikile nè maamù. Mpindyewu alùkilaayi ku Dîyì. “Mamwèndè wa Nzambi,” bundù bwènù. Nwamònu anyi?

¹⁴⁰ Dìngà ditùkù kùvwa bàmwè bantu bààkaMwambila, bàmba nè: “Mamw’Èbè ùdi pambèlù ùKukèba.”

¹⁴¹ Yèyè nè: “Maamù Wanyì nganyì?” Kutàngilayè bayiidi Bèndè, kwamba nè: “Aba bàdì bènza diswa dyà Taatù Wanyì ke maamù Wanyì.”

¹⁴² Kàvwa mam’Èndè to, yèyè ùvwa cyamù cyà ditooyishilamù. Nzambi ùvwa mufwànyine kwikala mukwàte mudimu nè cintu kampàndà cikwàbò, kàdi Yèyè ùvwa muswè kwangata citàmbe kushàadila nè kuleeja cìvwàYe mwà kwenza naaci. Kucìjuula, kucìvwija cintu kampàndà mu mwaba wùvwà cyanàànà, aci’s n’Nzambi.

¹⁴³ Cimfwànyì pyòpyopyò kulwaci, Yesù, Ewu uvwa kàyì katòba awu, Mulenga awu, mutàmbe bulenga ku binunu dikùmi, Mbata wa mu Cibanda, Rose wa Shalònà, kaa, Mùtootò wa mu Dìndà. Yèyè ùvwa cinyi? Yèyè wàkalwa bwà cinyi? Tèèlejàayi nè ntèmà mpindyewu. Bwà kwalujilula cyàkàbìdì bùmwe pankaci pàà Nzambi nè bantu. Kaa, nudi nuci mòna anyi, mwanèètù?

¹⁴⁴ Tuleyi twàbò twònsò twà Babèlè atu ne bintu byàbò bikwàbò byònsò byà kale wàwa kabyàkakùmbana to. Mamuma àbò ònsò à mu madimi nè bintu bikwàbò byònsò kabyàkasànkisha Nzambi to. Pa nànkù Nzambi wàkatùùluka nè kwimiciibwa mu difù dyà muntu mukàjì, ku Yèyè mwinè, muDìvwijè mubidi, nè mulwè Èmanùwèlè, Nzambi neetù; kàyì ní mmwena Yudà anyi wa bàà Bisàmbà byà bendè to, kàdi Nzambi. Yèyè kàvwa mwena Yudà to, Kàvwa wa bàà Bisàmbà byà bendè to, Ùvwa Nzambi. Nè bàà Bisàmbà byà bendè bàvwa Bèndè mu dîbà kanà dyònsò, cikòlà Yèyè wàkateeta bwà kutàpulula mwena Yudà bwà kwikalayè ditunga kampàndà. Wàkateeta kwenza byònsò bwà kucyàluja,

nè mùshindù wùmwèpelè wùvwà Yekù mwà kucishindika wùvwa ngwà kwalukila kùdì muntu-nkààya mùvwàYe ku cibangidilu amu. Mùshindù awu ke wùdìbi leelù ewu, bwà muntu-nkààya. Kí nku òngumba kampànda to, kí nku bulongolodi kampànda to, kí nkùdì kasùmbù kampànda kàà bantu to; kàdì nkùdì muntu-nkààya. Mònaayi, bwà kwalujilula bùmwe pankaci pàa Nzambi nè muntu.

¹⁴⁵ Ûvwa mulàmbù mulelèlèlè wà mpèkaatù. Mikòòkò, mbùji, nè bikwàbò, kayìvwakù mwà kuumusha mpèkaatù to. Kàdì mwoyi... Bwalu pàdì mulàmbù ùshipiibwa nè mwoyi wà mwànà wa mùkòòkò, cintu cyà citàmbe kwikala kaciyi cyenzè bwalu, kawùvwa mwà kwalukila to, mwoyi awu's, pa mwena kwitabuuja, bwalu yèyè ùvwa muntu, mwikàle nè musùukà, nè mùkòòkò kawèna nè musùukà to.

¹⁴⁶ Nwamònu's, kakwèna cintu nànsha cìmwè nè musùukà to pa kuumusha muntu. Nzambi mmutèèke... Yèyè ùdì nè ncimwènekeli cyà nyama, aci ncilelèlèlè, kàdì Yèyè mmutèèke musùukà mu yèyè. Ke cyàkamuvwijà mushiilàngàne nè nyama ncyôci aci. Yèyè ùvwa mumanyè maalu mîmpè nè maalu mabì pàakalwà musùukà wèndè pambidi pèndè. Kàdì yèyè... Vùlukaayi nè pàakafukà Nzambi muntu mu cìfwànyì Cyèndè Sungasunga, ke dibà adi kulwayè musùukà wùdì nè mwoyi. Nwamònu's, yèyè wàkalwa cyôci aci, mumanyè maalu mîmpè nè maalu mabì.

¹⁴⁷ Mpindyewu mònaayi. Kàdì mpindyewu, mu eci, Yesù wàkalwa nè Yèyè ùvwa Nzambi. Kí ng'ànù mwoyi wà muntu mukwàbò wùdì mwà kwalukila pa muntu mukwàbò to, kàdì Mwoyi mwìnè wà Nzambi, wùmuvwijà mwànà wa Nzambi, bìmupingaja mu didisanga òmwèdimwè mùvwàye kumpàlè kwà cibula adi. Mpindyewu tudi tupeta bùmwe bwà cyà bushùwà.

¹⁴⁸ Bantu, muntu kampànda ùdì ùngambila nè: "Mwanèètù Branham, wèwè kwèna unitaire anyi?" Kí mbulongolodi bwà ba-Unitaires to. Kàdì mèmè ndi mu bùmwe nè Kilistò, nwamònu's, kàdì kí mbulongolodi bwà ba-Unitaires to.

¹⁴⁹ Wàkafuta dibànzà dyà mpèkaatù. Mpindyewu, bwà kupeta bùmwe pankaci pàa Nzambi nè bantu, Yesù kàvwa mwà kucyènza pàvwàYe ànu pànwapa mu mubidi wà musunya apu to. Pa nànkù byàkakèngela bwà kulwaYè mulàmbù mukùmbànàngàne wà mpèkaatù bwà kuumusha dipilè dyà mwena kwitabuuja, nwamònu's, kuumusha bwà Nyumà Mwîmpè wàmòna mwà kubwela munda mwà muntu, nè kuvwijà muntu nè Nzambi bùmwe cyàkàbìdì. Nwamònu's, kùvwa nè cyà kwikala cintu kampànda bwà kwalujilula's.

¹⁵⁰ Mpindyewu, ncinyì cìdìku cìfwànyine kwalujilula's? Pàdì diyì dítùma dyà Nzambi dyùle. Mwanjèlò ùdì mwà kudyùja anyi? Kèna nè mashi to. Nzambi ùvwa mwà kwikala mucikùmbàje

anyi? Yéyè kàvwa nè mashi nànsha. Nènkù Nzambì wàkalwa mubidi nè mashi bwà Wàmòna mwà kufuta dibànzà mu mùshindù mujaalàme nè kuumusha mpèkaatù, bwalu ke mùshindù wùmwèpelè ngwówò awu. Tùleyi twà Baabèlè tubàtàpùlùle pa buloba, nè bikwàbò byònsò, malongolodi nè bikwàbò mbipangile mu mùshindù wònsò, bìvwa bisambàkàne pàmwè, byà pa buloba nè bikwàbò byònsò, kàdi eci cìvwa mwà kwikala ditàpuluka mu kaabujimà. Butùmbi's wè!

¹⁵¹ Mpindyewu ngààlu kuumvwa bwena Nzambì bwāmbwēdi. Èè, ndi ndyùmvwa ànu bu nè ndi mwà kwangata cyena-bwalu cyànyi mpindyewu nè kukùtula diyiisha mpindyewu mene. Ndi ndyùmvwa ànu musàngulùka mpindyewu bwà kutwàdijila ànu mwab'ewu, pàadi ndibà dyà mèmè kwimanyika. Uhm! Pàmwàpa nèncìjikijè pashìishe díbà kampàndà, bùmwè bwà Nzambì nè muntu. Nudi bumvwè anyi? Bònsò bàdi bumvwè, ambàayi nè "Amen." [Disangisha didi dyamba nè: "Amen."—Muf.]

¹⁵² Nwamònu's, ke mùshindù wùmwèpelè wùvwà muntu mwà kwalukila cyàkàbìdì mu ngiikàdìlù wendè wa ku cibangidilu, mbwà cibawu cyà mpèkaatù aci kufuciibwaci. Cibawu cyà mpèkaatù ncinyi? Lufù. "Difutu dyà mpèkaatù's ndufù." Ke Nzambì kwamba nè: "Ditùkù diwàdyàku, ditùkù diwènzà bwalu ebu adi, ke ditùkù diwàfwà." Nènkù pààkenzekàbi nànkù, cyàkakòsa malanda èndè, bwobùmwè nè bikwàbò byònsò bwà muntu, nè kàvwa mwà kwalukila kàbìdì to too nè pàvwa cibawu aci cìfuciibwa. Nènkù muntu nànsha umwe kàvwa mukùmbàne bwà kucifuta nànsha, bwalu muntu yònsò ùvwa mudishinde nè bukwàbantu, bwalu cìfùkiibwa cyònsò cìdi mwìnshì mwà muntu, nè yéyè ùvwa mudishinde. Butùmbi's wè! Kaa, mwanèètù!

¹⁵³ Mwanèètù Mac, ncìvwa mukumòne musòmbè mwaba awu to, Nzambì àkubènèshè. Tudi twitabuujà eci, Mwanèètù Mac. "Kulwa mwìnshì mwà cibawu cyà lufù." Mwanèètù Mac ewu ùvwa mpaasàtà mu tabernacle emu pàngààkuumuka. Èyowà. Mpindyewu, mukwàbò Baptiste mwìmpè wa kale, Baptiste Missionnaire kuntwaku ùvwa mupete Nyumà Mwìmpè awu. Nwamònu anyi? Mònaayi mpindyewu nè, kubwela mu bùmwè nè Nzambì.

¹⁵⁴ Mpindyewu, patùdì tumòna cyòci eci, tumòna nè cibawu cìdì nè cyà kufuciibwa, nè mònaayi nè, mmwènekèlu mutàmbe kutùmbuka wa mwoyi wà bukwànyama's mmuntu, kàdi muntu awu kudishìndayè, yéyè mwìnè. Pa nànkù mmunyi mùdiku muntu mwà kusùngila mukwàbò? Bìvwa bìkèngela Nzambì. Nènkù Nzambì, mu Nyumà, kàvwa mwà kufwà to. Pa nànkù: "Byàkakèngela bwà Nzambì kuDìpwekesha ndambù kwìnshì kwà Banjèlò," Ebèlù nshapità 1, mvensà 1. Ùvwa nè cyà kuDìpwekesha kwìnshì kwà Banjèlò bwà kwangata lufù, bwà kufuta cibawu, bwà kutwàla bùmwè pankaci pàà muntu

nè Nzambi cyàkàbìdì, bwà Nyumà Mwímpè wàmòna mwà kwalukila.

¹⁵⁵ Dibànzà dyà mpèkaatù dyàkafuciibwa. Byàkakèngela bwà Yesù kwenza nùnkù bwà—bwà kwaluja Nyumà Mwímpè pa, bwà kusangisha cyàkàbìdì bantu mwàkadibì mu budimi bwà Edènà amu. Dibànzà dyàkafuciibwa pààkafwà Yesù. Aci kukòsacì bwalu. Amen, mwanèètù! Bu mémè ànu mwà kucifikisha ku dibwela nè mu ndondo, nwamònu's. Dibànzà ndimana kufuta. Alèluuyàh kùdì Mwànà wa mùkòòkò! Dibànzà ndimana kufuta. Nènku mulùme yònsò nè mukàjì yònsò udi ungumvwa mu dindà emu, anyì wantèèlejila pa mukàbà wà mèyì, cibawu cyèbè ncifuta. Kùbèngi kwitabuujà cyàkàbìdì Dìyì dyà Nzambi to. Alùkìlà ku Dìyì's! Kwitabuujikù aci to... Yèyè ùvwa Dìyì. Butùmbi's wè! Ndi ngùmvwa bu wa kwela mbilà, nè meeji àànyì matòòke ke mùndì ndyùmvwa menemene's. Cibawu ncimana kufuta. Nkùmanè kujika. Kabyèna bikèmesha pààkeelà Banjèlò mbilà mikolè bìmba, miyenga yà mu Dyulu yidila bikolè. Eyowà, mukalenge, mùkòòkò mujìmine wùvwa mupecìibwe! Mulàmbù wà kujìmija naawù mpèkaatù wàkafidiibwa bwà yèyè kwalujuludiibwa cyàkàbìdì, màyi à ditàpulula, Dìyì dyà Nzambi didì dimusukula ku bubì bwèndè, pààkafwà Dìyì pa kaaba kàànyì nè pààkabìkàdì cyàkàbìdì nè kushààladi nè bukòòkeshi mu nsòmbelu wanyì, mu mwoyi wanyì. Amen. Cibawu ncimana kufuta! Nkumanè kujika. Tudi bapikùdìibwe.

¹⁵⁶ Kì nkùdì èkèleeziyà wa Kàtòlikè to; nànsha mutùdì beena Kàtòlikè balelèlè amu, beena Kàtòlikè bàà cìpostòlò. Eyowà's, mukalenge. Kì mbeena Kàtòlikè kàà cyena-Loomò nè mèyì àbò maswika awu to, bàdì bàvila Dìyì edi nè dìyì dyàbò diswika adi; byònsò ndiyì dyènù diswika, kì n'Dìyì to. Ba-Méthodistes, ba-Baptistes, bundù bwènù, banangi bàà bubì kutàmba kwikala banangi bàà Nzambi. Banangi bàà bisànkasanka, bakèbì bàà maalu à pa buloba, bisànkasanka, ngulube mishipa yà mu cikùmbì. Dyabùlù ùdì ùtùma byamu byèndè byà mudimu kuntwaku bwà kunùminyisha cintu aci ànu mwàkenzà Sàtaanà mu budimi bwà Edènà amu. “Èè, bambi bèètù bònso's mbalonge tùlaasà. Bàdì nè Ph.D., LL.D.” Aci kaciyèna nè cìdici cyùmvwija to. Kuvila Dìyì adi, cìdici ànu diyelè dyà dyabùlù. Ndi munùjaadikileci ku Dìyì mu dindà emu, abu mbushààle bwènù kwambwila ànu ku mpindyewu.

¹⁵⁷ Bayiidi, bàvwà bènda mene nè Yesù abu, kabàvwa nè bùmwe to. Kabàvwa nè bwobùmwe nànsha bùmwe to. To, bàvwa bàkòkangana nè: “Nganyì wìkala mwèpiskòpò paanyimà pàà cyòcì eci. Udi mutàmbe bunène munkacì mwètù nganyì's?” Kabàvwa nànsha mwà kwitabuujà Yesù to. Kabàvwa mwà kuMuumvwa to. “Wèwè's udi wakula mu myanu. Twàmbilaaku bitòòke tòò cyùdì Wèwè muswè kwamba.” Kakùvwa bwobùmwe pankacì pàà Yesù nè bayiidi nànsha, anyì bayiidi kùdì Yesù, nè bayiidi munkacì mwàbò to.

158 Nànsha nànkù, aci cìdì cìkuleeja's, mwanèètù. Tèèlejaàyi nè ntèmà mpindyewu, ndi muswè bwà eci cibwelèku mu ndòndò menemene mu mwoyi wèbè amu. Nwamònu anyi? Nzambi ùtu nè ndongamu kampàndà. Pa kuumusha ndongamu awu, nànsha lungènyì búngì munyì lwikàle paanyimà pààci, mmiliyò yà nzùbu milenga yà miyiile ndola búngì kaayi, búngì kaayi bwà bilongelu byà tèolòjì, mbantu bàà cijila búngì kaayi nè wa cijila *kampàndà*, nè wa cijila, wa cijila, wa cijila, kacyèna nè cìdici cìshintulula nànsha kakesè to, pìikalà Dìyì òmwèpèlè dyà Bible wa Nzambi divila, mbyà dyabùlù. Mpindyewu, ndi munùjaadikileci ku Dìyì difùnda dyà Nzambi, kuumukila ku Dipungila Dipyadìpyà too nè ku Dipungila Dikùlukulu, nènku nèncitwàle too nè ku ditùkù edi bu nwènù mwà kusòmbakù naanyi munda mwà tusunsa tukesè.

159 Bayiidi bààkendà nè Yesù cyanza mu cyanza, bààkalààlà Nendè, bààkadyà Nendè, bààkamònà bishimà Byèndè, nè bààkaswikakanà Nendè, balamàkàne ànu mùdì mwanèètù kanà yònsò ewu mwà kwikala amu, kàdì nànsha nànkù kabàvwa naabù to. Kabàvwa bakùmbànyine bwà kuyiisha Èvànjeeliyò to. Yesù wàkamba nè: “Kanùyiishi kàbidi to, kanùteecikù mene to. Indìlaayi mu cimenga cyà Yèlusàlèmà mwàmwa. Nènùtùminè mulayi, ùvwàbo banùpèèshe awu, pambidi pèènù. Newùnùsangè dìbà adi.”

160 “Mpindyewu, Taatù, ndi ndòmba bwà kwikalabò umwe ànu mùdì Wèwè nè Mèmè biikàle Umwe amu. Nènku ndi . . .” “Ànu mùdì Taatù Wanyì muNtùme bwà kuyiisha Èvànjeeliyò amu, ke mùNdì pàànyì nnùtùma.”

161 Nènku Taatù mwinè wakatùma Mwànà awu, wàkalwa mu Mwànà. Bwobùmwè ànu bu Umwe. Yèyè wàkamba nè: “Mèmè nciyì ngèza byenzedi byà Taatù Wanyì to, dìbà adi kanùNgiitàbùùjì to. Kàdì pìikalà byenzedi Byànyì bîNdì ngèza byàkula nè dîyì dikolè menemene, nwènù nudi menemene baampudimaci, tumàmà nè baampofo panwikalà kanùyì nucimòna to.” Kaa, mwanèètù, yoyòyò! Yèyè nè: “Nwènù beena lubombo nwè! Nudi mwà kujingulula mmwènekelu wa dyulu, kàdì kanwèna mwà kujingulula bimanyinu byà cikondo to. Bu nwènù baMmanyè, nùnkù's nudi bamanyè ditùkù Dyànyì. Yeshààyi wàkaakula bîmpè bwènù. Nudi nè maci, kàdì nudi mpudimaci bikolè mu mùshindù wà kanùyì mwà kuumvwa to. Nè mèsù, kàdì mpofo bikolè mu mùshindù wà kanùyì mwà kumòna to!”

162 Mupostolò Pòlò wàkamba bîmpè nè: “Mu matùkù à ndekeelu nebìikalè nè cimwènekelu cyà difwànà dyà Nzambi kàdì bàvila Bukolè bwàdì,” nè Mufùndu ku Mufùndu, cìvwà mwà kwenzeka mu malongolodi aa mu matùkù à ndekeelu. Pashìishe bàdì bàdikonka nè mbwà cinyì ndi ngèèla mbilà mpiisha ndongolwelu mukwàtakaja kùdì bantu wa dyabùlù awu. Kumòna bàna bàà

mushinga mukolè baseswisha pambèlu pààpa bu mùdì mìkòòkò yìya ku cishipeelu. Bápàtùle, Mukalenge!

¹⁶³ Èyowà's, bayiidi kabàvwa nè bwobùmwe nànsha bùmwe to. Kabàvwa mwà kuumvwa Yesù to. Bààkamba nè: "Aa, nganyi udikù mwà kuumvwa bintu ebi?" Nwamònu's, Nzambi kàvwa mwànji kwikala munda mwàbò to. Bàvwa ànu baswikàkàne mu bwobùmwe. Bààkaswikakana ànu Nendè. Ki mùdì bantu bimpè bààbùngì leelù ewu. Kabàvwa bàvwa maalà, bàshima, bìlba, cintu nànsha cìmwè to, kàdi kabàvwa nè bùmwe bwà Nzambi abu to. Kabàvwa bàvwa kwikala umwe nè Nzambi to. Nwamònu's, kabàvwa mwà kwikala umwe to. Kaa, bààkenza bishimà. Bààkiipata badémòns. Aci kí—aci kí. . .

¹⁶⁴ Mvwa mubalè kaabwalu mu cibèjibèji ditùkù adi pa bwalu abu, pa kwipata kwà baadémòns. Bantu bàmba nè: "Kaa, mwanèètù, ndi nkwebila nè, s'ke cyòci aci." Kí ng'aci to! Muntu udi wipata dyabùlù kàdi uvila Dìyì dyà Nzambi, mmwena mashimi. Èyowà's, mukalenge. Yèyè ùdi wàmba nè ùdi wipata badémòns. Bàdi bàmba mùdibo bènza nànkù. Kèna mwà kucyènzakù to pìikalàye kàyì nè Dìyì dyà Nzambi. Yesù ngudi mwambè nànkù.

¹⁶⁵ Mpindyewu, pashìishe kulwakù Mpenta, Nzambi kubàvwija umwe cyàkàbìdì. Kaa, ekèlekèle! Dìbà adi bàvwa badyènzè bùmwe nè Nzambi. Nzambi ùvwa munda mwàbò. Mpindyewu, Byenzedi, panwikalà munkaci mwà kucifùnda, Byenzedi 4.32, Bible mmwambè nè "Bàvwa nè mwoyi wùmwe, musùùkà wùmwe, nè meeji àmwè." Kaa, mwanèètù. Bwà cinyi? Bàvwa baalujuludìibwe cyàkàbìdì ku cyà ku cibangidilu aci. Cintu cìmwèpelè cìvwa cibàshààdile bwà kukùùdiibwakù cìvwa n'cimenga cyà kale aci, anyi cìvwaò basòmbèlemù aci, mubidì wà kale wùdì wùbùikidiibwà nè n'cimenga anyi ntempèlù, mùvwabò basòmbèle amu, wùvwà nè cyà kubola awu, bwalu wùdì nè cyà kufwà nè kubola. Kàdi mu nyumà nè mu mwoyi, nè mu kiipàcìlà nè mu mmwèneni wa maalù, nè bikwàbò byònsò, bàvwa umwe nè Nzambi.

¹⁶⁶ Kaa, Adàmà, mulundà wanyì mucibùlùke, kwitabi bwà Sàtaanà àkwambilè mashimi èndè awu kàbìdì to. Kùlekedikù aci cyènzeka to. Kùlekedikù Sàtaanà ùkwambila nè Dìyì kadyèna dyùmvwija ànu cìdìDi dyàmba aci to. Ncyà bushùwà. Dìyì didi dyùmvwija. . . Èyowà, apa kí. . .

¹⁶⁷ Mvwa ngààkula pa dibàtiiza dyà mu Dìnà dyà Yesù Kìlistò. Ncyà bushùwà, dibuulula dyà cyòci aci dyàkalwa. Aci's m'Bulelèlè. Kàdi musùmbà wa bantu wàkenza cinyi? Mbacisangishe kaaba aka nè bapàtùlemù dīgumba kampàndà, benzè cibùmbà cikwàbò cyà Baabèlè. Cintu cìmwècìmwè aci, kucikùpa ànu munda mwàcì amu. Cyà bushùwà. Luther wàkenza cintu cìmwècìmwè aci. Wesley wàkenza cintu cìmwècìmwè aci, John Smith wàkenza cintu cìmwècìmwè aci,

Alexandre Campbell wàkenza cintu cìmwècìmwè aci. Mpenta mmwènzè cintu cìmwècìmwè aci. Nzambi ùtu ùkwàta mudimu nè bantu-nkààya ùshààla mukwàte ku Dìyi Dyèndè. Ndongamu umwèpelè wa Nzambi bwà kutwàla beena kwitabuuja kùdiYe, mu bùmwe bulelèlè, nkupeta Nyumà Mwímpè. Dìbà adi ke mùshindù. . .

168 Wèwè udi wamba nè: “Èè, Mwanèètù Branham, mèmè’s nkàadi mwakùle mu myakulu. Nkàadi mwele mbilà. Nkàadi mwenzè *cikampàndà*.” Pawìkalà ànu ucidi nè nyumà wa mùshindù awu kàdi uvila Dìyi dyà Nzambi, kwèna nè Dìyi dyà Nzambi munda mwèbè to, kwèna nè Nyumà to. Wèwè musòmbe utèeleja Bulelèlè bùyishiibwa, nè ùBùtàngila mu Bible nè umòna nè M’Bulelèlè, kàdi pashiishe kubènga kucyèenza, aci kì n’Nyumà wa Nzambi to. Nànsha wèwè mwakùle mu myakulu bìshi, nànsha wèwè mwele mbilà munyi, nànsha wèwè mwikàle wa mu èkèleeziyà bùngi kaayi, anyi bùngi bwà misangu yùvwa mubàtìijìibwe, anyi cintu cikwàbò kanà cyònsò eci. Dìyi didi Bulelèlè. Ke cidi cìshindika bulelèlè ncyòci aci. Wèwè nè malelèlè makwàbò wònsò aa nè pashiishe nè Dìyi, amen, dìbà adi udi mumanyè nè udi walukila kumbèlu.

169 Nudikù mwà. . . mmunyi mùdiku Nzambi mwinè wàkafùnda Bible awu mwà kukùdimuka kàdi kupingajapu cintu cikwàbò pamutù pàa Dìyi Dyèndè? Nwènu beena Kàtòlikè bàvwa bamba nè Peetèlò wàkajiikiibwa mu èkèleeziyà wenù, nè nyumà wendè ùdi ùnùpèesha bukenji bwà kulekelela mpèkaatù nè bikwàbò, mmunyi mùvwàku Peetèlò, mwena Yuda, mwà kutwàla kwikala nè mpìngù mu èkèleeziyà? Mmunyi mùvwàku Peetèlò mufwànyine kubènga kwamba nè dibàtiiza dyà Nyumà Mwímpè divwa dila, yèyè kwakula mu myakulu, nè bintu byònsò byà bukolè byàkenzaye abi, kàdi kukùdimuka è kwamba bwà kwangata kacystiyà kakesè, nè Nzambi ùdi mu cyostiyà aci? Kaa, aci’s mbunyòngà, mbuyòngà bwà mu nyumà’s!

170 Èè, mpindyewu, nwènu beena Mishònyì ànu cintu cìmwècìmwè aci, nujuuka nulabulangana ku cyanza nè muyiishi, nwamba nè: “Ndi ngiitaba Yesù bu Musùngidi wanyì sungasunga,” kàdi nwalukila nè biikàle nè nsòmbelu wa mùshindù kanà wònsò nè ciinè aci, nè kutùngunuka ànu nè kwenza maalu mùmwè nè bàà pa buloba. Cikwàbò cibumbà cyà Baabèlè.

171 Tukàadi twenda tupweka batàngile ku ndekeelu mpindyewu. Tàngilàayi. Nzambi mmutùme Nyumà Mwímpè, nè Nyumà Mwímpè n’Nzambi Yèyè mwinè. Yèyè ke Wìkala mwà kwenza bùmwe pankaci pàa Nzambi nè muntu. Tùjandulàayibi tùng. Mpindyewu tùyaayaaku. Mpindyewu ndi muswè bwà ntèmà yènu yònsò ayi yikalè mitùma kùnu mu tusunsa bu tùtaanu tùdi tùlondà etu. Tàngilàayi.

172 Muntu mwínshì mwà ndongamu wa dyabùlù mmùteetè

kuvwija èkèleeziyà dīgumba mu bùmwe. Mbateetè bwà kuvwija dīgum-... kulongesha èkèleeziyà mu bùmwe, nudi bamanyè aci's, ku dilonga dyà tūlaasà, ku dīgumba. Bàdi munkaci mwà kuteeta mpindyewu mene, Nsangilu wa Maèkèleeziyà wa Buloba bujimà, ùtūngunuka bwà kuteeta kusangisha beena Kàtòlikè bònsò nè beena Mishòònyi kaaba kàmwe nè kubàvwija umwe. Ncinyi aci? Ndongamu wa dyabùlù's!

¹⁷³ Wèwè udi wamba nè: “Wèwè kwèna mukùmbàne bwà kwamba aci to.” Ndi mutàmbe bukesè bushùwà, kàdi Dîyì dyà Nzambi wanyì ndinène bikolè, ndi nnwàmbila nànkù. Maulu nè buloba nebìjiminè, kàdi Dyòdi kadyàkujìminakù to. Kì ng'ewu udi ucyàmba to, ng'Ewu udi—Ewu udi—Ewu udi mucyàmbè kumpàlà. Ndi ngàmba ànu cyàkambàYe aci, ndi njikula Dîyì Dyèndè.

¹⁷⁴ Cidi ku bukòòkeshi bwà dyabùlù's! Ncijaadikiibwe mu Dîyì kaaba aka, ànu mu dindà emu kumpàlà kwènù, nè aci ncyà dyabùlù. Dyònsò dyà ku malongolodi awu didi dyà dyabùlù. Bantu, mu ndongamu wa dyabùlù, bàdi bàteeta kuvwija bantu dīgumba ku bùmwe.

¹⁷⁵ “Nwènù bònsò lwàyi nùkashààlè beena Assemblées de Dieu. Dìsangàayi nè ba-Unitaires. Shààlaayi bàà mu Église de Dieu. Shààlaayi ba-Méthodistes. Tudi bònsò umwe.” Nwènù musùmbà wa beena lubombo nwè, biikàlè nè cimwènekèlu cyà difwàna dyà Nzambi kàdi nuvila Bukolè bwàdi. Kàdi's Dîyì dyà Nzambi ndinyùkùshiibwa ànu kumpàlà kwènù mene, nè nwènù nudi nè bwòwà bwà kuDibùndula. Bwà cinyi Nzambi kèna ùDileeja díbà adi, panwikalà nè Nzambi? Bwà cinyi kanwèna nwenza byenzedi byà Nzambi? Mmunyi munùdi mwà kwikala nè mmwènekèlu awu, kàdi nukùdimuka nuMuvila, nubiiikila mene byenzedi bilelèlè byà Nzambi nè m'Beelèzèbùlù? Bidi bidileeja's, nwènù musùmbà wa bidimba byà èkèleeziyà bàdi balongè tūlaasà aba! Yesù wàkamba nè: “Nwènù nudi bàà tatwènù, dyabùlù!” Cyà bushùwà! Ndi mutwishiiibwe nè nudi bumvwè cindì muswè kwamba aci. Cyà bushùwà's. Bwà cinyi muntu kampàndà kèna ùCibùndula? Udi mumanyè nè Nzambi ùdi paanyimà pààDì. Nzambi neèndè ànu nè Dîyì Dyèndè.

¹⁷⁶ Muntu ùdi wènza nànkù awu, ùdi wibaka cikwàbò cibùmbà cyà Baabèlè. Cidiye wènza ncinyi? Bàdi bàteeta kuleeja... Tàngilàayi mu Nsangilu wa Maèkèleeziyà wa Buloba bujimà ewu mpindyewu. Ba-Anglicans, beena Kàtòlikè kàba cyena-Loomò, ba-Méthodistes, ba-Presbytériens, beena Mpenta, nè bònsò abu bààkadisanga pàmwe, Science Chrétienne, nè tusùmbù twà ntèndeleelelù búngì cyanààna tùdi mene tùvila dilediibwa dyà kùdi virgò atu, tùdi tùvila Bunzambi bwà Yesù atu, tùMuvwija bantu bàsàtù, tùteeta kukuukwila nzambi yisàtù, tùvila dilediibwa dyà kùdi virgò. Bàmwe bàà kùdibo bàvila Mashì. Bàmwe bàà kùdibo bàvila bishimà Byèndè. Bòbò bònsò bàdi benza nànkù, pàmwe nè bònsò's. Nè pashiishe—pashiishe

kuteeta kusanga bàà mùshindù awu pàmwè, mmunyi munùdi mwà kucyènza? Aci's nkàleyi kenza ku byanza byà bantu. Nekàkulukè ànu mwà kakùlukà Baabèlè amu.

¹⁷⁷ Kàdi Nzambì wàkamba nè: “Kî nku bukolè, kî nku ngulu to; ku Nyumà Wanyi, mùdi Mukalenge wàmba. Mùshindù awu ke wûngiikalà mwà kusangisha Èkèleeziyà Wanyi. Kî nku bulongolodi to, kî nku dilonga dyà tûlaasà to, kî nku beena tèòlòjî nànsha; kàdi ku Nyumà Wanyi, mùdi Mukalenge wàmba, Nènsangishè mìkòòkò Yànyì pàmwè.” Kaa, ekèlekèlè! Nènku pàdiYe wènza nànkù, cidi cyènzekà ncinyi? Nè bimanyinu Byèndè nebigile bujaadiki bwà cintu cimwècimwè aci. Mùshindù awu ngùvwa Izàlèlè mwà kwamba, kumpalà kwà kusambakanabò nè Moàbà. Kùvwa Dikunji dyà Kapyà kumutù kwàbò. Èyowà's, mukalenge. CyènzàYe ncinyi? Yèyè neàfilè bujaadiki, bujaadiki bwà mùshindù wùm-wùm-wùm awu. Kàdi paanyimà pàà bóbò bamane kutàpuluka mùshindù awu nè Nzambì, batàpùlùlè bùmwè bwàbò nè Nzambì, nè babwelàkàne nè Moàbà nè bakwàbò, bucimunyi bònso kupangilabò. Bàakashààla mu cipèèlè munda mwà bidimu bikwàbò makùmi ànaayi, too nè mwàkajuulà Nzambi musumbà mukwàbò bwà kuyabò nè kujikija ndongamu Wendè. Ke cyòci aci menemene cyàkenzàbo.

¹⁷⁸ Mpindyewu tàngilàayi. Kàdi pàdi Nzambì ùsangisha èkèleeziyà Wendè pàmwè nè Nyumà Wendè, nebiikalè nè bimanyinu Byèndè byà Nzambì udi nè mwoyi munkaci mwàbò. Bimanyinu byà mùshindù kaayi? Pàakatàpululà Nzambi Izàlèlè nè Èjiipitù, Nzambi wàkapèèsha Mòsà nè Izàlèlè cimanyinu cyà Dikunji dyà Kapyà. Ncyà bushùwà anyi? Mupròfetà. PàakatàpululàYe Abraham nè Lotà, kwàkalwa Mwanjèlò kùdiye, uvwa mwà kujingulula meeji nè mapàngadika à mu mwoyi. Cimanyinu's! Àlèluuyàh.

¹⁷⁹ Mpindyewu màngumba àdi mangàciibwa mu èkèleeziyà ewu aa, àteeta bwà kwenza bùmwè bu mu Èjiipitù, ànu mùvwa mu—mu Edènà, nè bikwàbò, ku bwenzeji bunène bùdibo naabù ebu.

¹⁸⁰ Kàdi, tàngilàayi, ndi muswè nnùkonkèku cintu kampàndà. Pàakatàpululà Nzambi Izàlèlè, Wàkabàpèèsha cimanyinu Citàmbe-mfùkulu, Dikunji dyà Kapyà. Wàkabàpèèsha mupròfetà. CyàkenzelàYe Abraham ncinyi? CidiYe wènza musangu wònso ncinyi? Ndeejàayi mupròfetà musungula kùdi Nzambi munkaci mwàbò. Yèyè wakasanga èkèleeziyà Wendè pàmwè ku bàpostòlò nè bapròfetà nè balongeshi nè batangadiki. Àlèluuyàh! Ki bwalu mbwòbù abu's. Èkèleeziyà, cyàkàbidi, bu mwàkabiikilàYe Izàlèlè bwà kupàtuka amu. Mwva munwàmbile nè nèngàalukilè ku cyòci aci. Èyowà's, mukalenge.

¹⁸¹ Kakùyi bapròfetà basungula kùdi Nzambi munkaci mwàbò to, to, mukalenge, bu mwàkadibo nè Izàlèlè nè bakwàbò abu

amu. Ncinyi aci? Cibumbà cyà dyabulù cyàkàbidi.

¹⁸² Mpindyewu, Dilwa didi pabwîpi menemene, Dilwa Diibîdi dyà Yesù, Yèyè ùdi munkaci mwà kusangisha Basungula Bèndè pàmwè. Mèmè ndi ngiitabuujà aci. Kaa, nebàfumine ku Esètè nè ku Wesètè. Mwaba ùdi mubidi wusanganyibwa, ke wàdisangishila mikankù. Kaa, ekèlekèle, ncinyi ciine aci? Yèyè udi nè bùmwe Bwèndè, bùmwe Bwèndè bulelèlè, ùDileeja munkaci mwàbò; ùbàpàtwila mu dīgumba nè dīgumba dyònsò, mwikàle ùtwàla Basungula Bèndè pàmwè buumukila mu èkèleeziyà yà mishindù yònsò, mu myaba yònsò, ùpàtula bàna Bèndè, bàalukila buludì mu njila wa Dìyi Dyèndè. Ncinyi aci?

¹⁸³ Mpindyewu, Dilwa dyà Mukalenge Yesù didi pabwîpi menemene, dilwa dyà cilumbulwidi, ùdi munkaci mwà kubiikila Basungula Bèndè pàmwè mu bùmwe nè Yèyè mwinè, nè mudimu wa bwambi wà mùshindù wùmweùmwe wùvwàYe naawù awu. Nudi bamanyè múmwà muzòle Bikondo byà Èkèleeziyà, mwab'ewu ànu àbidi àdi panshi aa, pa bidì bitàngilà ci—cibumbà cinènè cìvwà ciibaka, cìbiikidiibwa nè cipaapu cyà musàkà aci, kàdi dibwe dyà mùsongà adi kadivwa ditéèkiibwepù to. Vùlukàayi mwàkalwà ba-Luthériens, pashiishe beena Wesley mu banyàabanyà, nè pashiishe kupweka too nè ku Mpenta. Nènkù mpindyewu cidiYe munkaci mwà kwenza, ùbiikila bwà kupàtuka mu cyòci aci. CyàkenzàYe ncinyi? Yèyè wàkabiikila Basungula bwà kupàtuka, bwà kwenzabò ba-Luthériens; Yèyè wàkabiikila Basungula, bwà kupàtuka mu ba-Luthériens, bwà kwenza ba-Wesléyens; Wàkabiikila Basungula, bwà kubàpàtula mu cyòci aci, bwà kwenza beena Mpenta; mpindyewu Yèyè ùdi ùbiikila Basungula beena Mpenta bwà kupàtukabò, bwà kwenza díbwe dyà mùsongà bwà kubwelamù. Mudimu wà bwambi ùmwèùmwe awu menemene ùbwelamù dyàkàmwè, munkaci mwà kubiikila bàna Bèndè buumukila mu màngumba ònsò nè mu bipidi byònsò byà mu nsòmbelu.

¹⁸⁴ CidiYe mwenzè ncinyi? Mmutèèke balongeshi balelèlè munkaci mwàbò, bapròfètà balelèlè bàdi bàshààla nè Dìyi Dyèndè, Bible. “Mikòòkò Yànyi yidi yùmvwa Dìyi dyà mukana Mwànyi,” mwàkambà Yesù. Pùikalàbi nè cìvwà n'Dìyi Dyèndè díbà adi, n'Dìyi Dyèndè mpindyewu. Cyònsò cidi cibèngangana nè Dìyi dyà mukana adi, kí ncyàkudyà cyà mikòòkò nànsha. Kayàkucilondakù to. Kaa, mwanèètù. Kuumukila ku Esètè, kuumukila ku Wesètè, kupatuka mu dīgumba nè dīgumba dyònsò, mu bulongolodi bwònsò, mbafùmine ku Esètè nè ku Wesètè, bàdisanga pàmwè! “Netùcyonkomokè nè Mfùmù, bwà kudyà bu babiikidiibwè Bèndè, mùshindù mwinè ùdi beena lwendu aba babènèshiibwe's wè! Bàbandila mpàla Wendè mujidila ùkenka nè dinanga dyà Nzambi; baabanyanganyi babènèshiibwe bàà ngàsà Wendè, bwà kubàlakana bu mabwe à mushinga mukolè ku cifulu Cyèndè cyà butumbi. Yesù

ùlwalwa kàtààtakà, mateeta ètù neàjike díbà adi.” Àlèluuyàh! “Ambabi tǔng bu Mukalenge wetù mwà kulwa pa díbà edi bwà aba bàdì basùulùdìibwe ku mpèkaatù? Díbà adi ncifwànyine kukutwàdila disànka, anyi tunyinganyinga nè diteketa dikolè dyà mu mabòko anyi? Kàdì pààlwà Mukalenge wetù mu butùmbi, netùtuutakeenà Nendè muulu mu mpeepèlè.” Àlèluuyàh! Èyowà’s, mukalenge.

¹⁸⁵ Ncinyi aci? Nè balongeshi batùmiibwe kùdì Nzambi bìikalà mwà kushààla ànu nè Díyì, kùdì Èkèleeziyà mulelèlè, kabàyi batentemuna katòba nànsha kàmwè to nànsha cìdì bulongolodi bwàmba ciikàle cinyi. Kì mbaswikàkàne naaci to. Baprófetà; kabàyi bàà diitabuuja dyà budìngibudìngi to, bàà ku dínà abu, kàdì muprófetà mushùwashùwàle ùdì nè EMU MMÚDÌ MUKALENGÈ WÀMBA, nènku ànu mu byòbì menemene musangu wònsò. Ke cìdìYè mutùme mu Èkèleeziyà Wendè. Ke cyàkambàYè nè Neénzè. Ùdì witabuuja Díyì; kì ntwitabààyi to, kì ndiyi diswika to, kàdì Díyì. Nènku, mu kwenza kwà cyòci eci, Yèyè ùdì ùDileeja munda mwàbò mu kushindika kwà Díyì Dyèndè, wèenza nè Mwoyi wùmwèwùmwè wùwàYè naawù musangu kampàndà awu, mwikàle cyàkàbìdì nè mwoyi, ùfikisha Díyì Dyèndè ku dyenzeke. Kaa, ekèlekèle!

¹⁸⁶ Tèelejààyi nè ntèmà. Kolintò wa Kumpàlà 4.20, ùdì wàmba nè: “Bukalenge bwà Nzambi n’Díyì Dyèndè divwijìibwe bukolè.” Nwènù baswè kufùnda aci, Kolintò wa Kumpàlà 4.20. Bukalenge bwà Nzambi n’Díyì dyà Nzambi divwijìibwe bukolè. Bukalenge bwà Nzambi ncinyi? Bùdì munda mwèbè amu. Bukalenge bùdì munda mwèbè. Nènku pàdì Díyì díbwelamù, Díyì edi dìdì díbanga cinyi? Dìdì dìDikùdìmuna dìshààla bukolè, bùDìfikisha ku dyamba menemene ànu cìvwàDì dyambè.

¹⁸⁷ Kwèna mwà kwamba nè “Dìdì dyàmba *cikampàndà*,” nè Dìdì dyàmba *Cikansanga*, nè kwenza nè Cìkwatè mudimu to. Bìkèngela wàmbe cintu cìmwècìmwè cìdìDì dyàmba aci. Aci cìdì cyènza ditonda. Kì nkwanba nè: “Èè, nDilengèjìibwe ndambù mwab’ewu, nèmpetè lungènyi lwàbùngì, nèngiikalè mu cipidì citàmbe bwìmpè mwab’ewu.”

¹⁸⁸ Shààla wèwè ànu nè Díyì. Ke cyòci aci, wamònu’s. Nè Cìdì cìDìvwija bukolè. “Yesù Kìlistò umweumwe awu makèèlèlè, leelù, too nè kashidi.” Yesù wàkamba, mu Yone Munsantu 14.12 nè: “Nwènù bashààle munda Mwànyì nè Mèyì Àànyì munda mwènù.” To, mfwilaayikù luse, aci kì ncìvwàYè mwambè mwaba awu to. Wàkamba nè: “Ewu udi ungiitabuuja Mèmè, byenzedi bìNdì ngèenza yèyè neàbyènzè pèndè. Nwènù bashààle munda Mwànyì nè Díyì Dyànyì munda mwènù, nudi mwà kulòmba cinùdì baswè nè nebànwènzèlèci. Nwènù bashààle munda Mwànyì nè Díyì Dyànyì munda mwènù.”

¹⁸⁹ Ncinyi aci? Bìkèngela ùshaalè nè Díyì, ùdìshipè wèwè mwìnè. Ndi mutwishìibwe nè bààbùngì bàà kutùdì, balundà bàànyì,

mbapetè Nyumà Mwímpè, kàdi tudi ànu tupeta Nyumà Mwímpè búngi bukumbàne munda mwètù bwà kutùfikisha mu mùshindù wà katùyi baswè kushima to, katwèna baswè kwiba to, katwèna baswè kwenza cintu nànsa cìmwè to. Kàdi Nzambi mmuswè kuuja kajilu kònsò kàà Èkèleeziyà Wendè, Yèyè mmuswè kuuja ngeelèlù webè wa meeji nè Yèyè mmuswè kuuja meeji èbè. Yèyè mmuswè kuuja kantu nè kantu kònsò kàà ku wèwè, kukuvwija ànu mufwè mu wèwè mwine mu kaabujimà, nè mu byònsò anyi mu ngeelèlù webè wa meeji, mudilekèlèlè ànu menemene mu Nzambi mu mùshindù wà nè Dìyì Dyèndè diikàlè nè mwoyi ànu munda mwèbè. Kwèna mumanyè cìngà cintu to ànu Dìyì dyà Nzambi, shààla wèwè ànu nè Dìyì Dyèndè, Didi Mwoyi. “Mèyi Àanyi àdi Mwoyi,” mwàkambà Yesù. Mmutèèke munkaci mwàbò, balongeshi bàdi bìitabuuja Bible, bapròfeta bàdi bàmba Bulelèlè abu, bàdi bàmba, bàleeja cipròfeta cìmwècìmwè cikaavwàbo bàleeje misangu yònsò munda mwà bikondo. CyàkenzàYe ncinyi? Ùdi ùDìleeja nè mwoyi munkaci mwàbò, ùshìndika Dìyì Dyèndè. Dìyì Dyèndè, Bukalenge bwà Nzambi n’Dìyì dyà Nzambi divwijiibwe bukolè.

¹⁹⁰ Pàdibi nè, màngumba aa mashìndàmèenà pa dilukakaja dyà meeji à buntu, pa dilukakaja dyà meeji à buntu. Tèèlejàayi nè ntèmà yònsò mpindyewu. Bòbò. . . Katwèna nè cyà kweyemena dilukakaja dyà meeji à buntu to. Nsùmwinù, nshapità mwi3, mvensà mwi5, mmwambè nè: “Kwèyemenyi dyumvwa dyèbè wèwè mwinè to.” Nwamònu anyi? Kwènji nànkù to, nànsa Dìyì dyà Nzambi *dimwèka* mùshindù kaayi.

¹⁹¹ Wèwè udi wamba nè: “Èè, s’bidi bìmwèka ànu bìmpe mùshindù *ewu*.”

¹⁹² Kì ng’aci cìdiDi to. Cìdi Dìyì dyà Nzambi, Dyangàtà mùshindù wùdiYe muDyàmbè awu. Evà wàkamba. . . Sàtaanà wàkambila Evà nè: “Ndi mumanyè nè Nzambi mmwambè Cyòci aci, kàdi kaCyèna cyùmvwija menemene nànkù to. Cìdi cyùmvwija cikampàndà.” Nè yèyè wàkaciitabuuja. Wàkaciitabuuja. Aci cyàkashipa bùmwe, aci cyàkashipa bwobùmwe, aci cyàkanyangakaja didisanga, aci cyàkanyangakaja buloba, aci cyàkanyangakaja mwoyi, aci cyàkanyangakaja bintu byònsò!

¹⁹³ Nè muntu udi ubènga kwitabuuja Dìyì *dimwèpelè* dyà ku Dìyì dyà Nzambi awu, bìdi bìshipa bwobùmwe bwònsò nkòòng nè byònsò. Cyà bushùwà! Tudi tuDìitabuuja anyi katwèna tuDìitabuuja to. Tùshaalàayi naaDì! Nzambi ngudi mwambè nànkù, nènku tùshaalàayi naaDì. Ndi nè bintu byàbúngi bìdi bikèngela ntupikè kaaba aka, bwalu dîbà dikaadi dipite.

¹⁹⁴ Bu mu bikondo byà kale, mu bikondo bishààle pàvwà muntu mwènzè cyòci eci, cyàkatwàla cilumbulwidi cyà Nzambi kùdi bàà pa buloba. Cibumbà cyà Baabèlè, disangila dyà bàna bàà Kaayinà nè bàna bàà Setè, dyàkatwàla cilumbulwidi. Cìdi

misangu yônsò ànu citwàla cilumbulwidi cyà Nzambi kùdi bàà pa buloba. Nwamònu anyi? Kaa, bùmwe bulelèlè nè Yèyè nebùjuukè ku cilumbulwidi, kumutù kwàci, bu mwàkenza Noà mu cilumbulwidi aci nè díkù dyèndè. Mwakàne Noà nè díkù dyèndè bàakabànda kumutù kwà manyooka. Bàakenza cinyi? Bàakaya!

¹⁹⁵ Mwanèètù Lee Vayle, bu wèwè mwà kukwàta ku eci nùnkù, ncyôci eci. Ke bwalu bùmwèpelè butùdi katùyi tupetanganapù, yèyè ùdi witabuuja nè Èkèleeziyà neàpìcile ku cilumbulwidi. Mémè ncyèna ncimòna to. Ncyèna ncìitabuuja to.

¹⁹⁶ Noà kààkapìcilakù ku manyooka to, wàkaya kumutù kwà manyooka. Abraham kààpeta kapyà to, ùvwa pambèlu pàà kapyà. Izàlèlèlè kàvwa ùsanganyiibwa mu manyooka à Izàlèlèlè to, ùvwa mutàpùlùke pambèlu pàà kapyà, pambèlu pàà manyooka. Èkèleeziyà neàbande kumutù kwà cilumbulwidi, mu bwàtù bwà Nyumà Mwímpè, neàjuukè kuulu kwà buloba.

¹⁹⁷ Cintu eci cyà Nsangilu wa Maèkèleeziyà ewu kî ncìngà cintu to ànu mushiki wà—wà virgò mukùtākāne, bwà kushiyiibwa pa buloba apa bwà kubākudiibwa bwà mwifwilakanyi nè Kilistò. Kàdi Èkèleeziyà mulelèlè wa Nzambi neàlelemè mwàkenza Noà wa kale awu, nè kutùngunuka nè kuya mu Butùmbi ànu mùdibi bulelèlè nè ndi mwimāne kaaba aka emu. Ke bwa cinyi Yèyè ùdi ùbākùngwija kaaba kāmwe. Ke cidi Dìyi munkaci mwà kupàtula leelù ewu ncyôci aci. Ke cidi Nzambi munkaci mwà kwenza, nkusangisha umwe wa ku Los Angeles, nè umwe wa ku Philadelphie, nè umwe wa ku Géorgie, nè bikwàbò. Mwikāle ùbākùngwija pāmwe, cisàmbà Cyèndè cidi ciswè kwitabuuja Dìyi dyà Nzambi udi nè mwoyi. “Ànu mwàkadibi mu matùkù à Noà, ke mwikalābi kàbidi ku dilwa dyà Mwānā wa muntu, mwākasùngidiibwa bakesè, ànu bakesè menemene.” Èyo, bwètù bwàtù bwà Nyumà Mwímpè nebùlelemè ànu pamutù pàà manyooka à Nzambi, bwalu tukàadi bamanè kulumbulwishiibwa, patùdi tujìkula Yesù apa, nè Yèyè mwangāte dilumbulwishiibwa dyètù.

¹⁹⁸ Màngumba aa, nànsha nànkù, àdi ànu nè mutù mukolè! Àdi bu mùvwà Evà amu, ùvwa muswè lungènyi lwèndè kàyi ùtàngila cìvwà Dìyi dyà Nzambi to. Nìmelòodè ùvwa muswè cibùmbà cyèndè aci, kàyi ùtàngila nè, kùvwà Mufùndu anyi to! Bàvwa nè mutù mukolè! Evà ùvwa mumanyè cìvwà citàmbe bwímpè. Setè's ùvwa mumanyè citàmbe bwímpè kutàmba kuya kunanga bakājì balenga abu. Izàlèlèlè ùvwa mumanyè citàmbe bwímpè kutàmba kupàtuka kukabwela mu masandi amu. Ke munùdi pèènu! Kàdi bàmwè bàdi nè mutù mukolè menemene, nànsha kòkù Mufùndu anyi kakùyì Mufùndu to! “Nzambi àbèneshiibwè, maamù wanyì ùvwa Presbytérienne! Ke cingìikalè, pàànyi.” Tùngunukà, tùngunukà s'ke cintu cìmwèpelè cyùdiku pèèbè mwà kwenza dībā adi. Nzambi ùmvwilèku musùukà wèbè mubi awu luse. Mmuniyì muwàpàndukà ku cyôci

aci, pèèbè mumanyè nè mbulelèlè? Nènku wêwè mumòne Dìyì dyà Nzambi, kàdi kùyi ànu wela meeji nè Didi Bulelèlè to, dībà adi's kùdi cintu cidi kacìyi cijaalàme to nè dijingulula dyèbè dyà nyumà. Ncyà bushùwà menemene. Tàngilàayi mu ditunga dijimà numòne mwaba wùdi bintu ebi munkaci mwà kwenzeka. Tukàadi ku cikondo cyà nshìikidilu, balundà bàanyi. Tudi bafùme ku dilonga Bikondo byà Èkèleeziyà nè bamanyè cìikalà mwà kwenzeka mu cikondo cyà Èkèleeziyà wa Laòdikiyà anyi? Katwèna bafùme ku dicikenketa anyi? Nudi numòna cindi njinga kwamba aci anyi? Tukàadi ku cikondo cyà nshìikidilu.

¹⁹⁹ Nzambi ùdi munkaci mwà kusangisha Basungula bàà ku mpeepèlè yinaayi yà buloba. Yèyè wàkamba nè Ùvwa mwà kutùma banjèlò bwà kubàsangisha. Ncyà bushùwà anyi? Kubàsangisha pàmwè, kubàtapolula nè lupèlè. Amen. Lupèlè nelwòshiibwè, kí m'blé to. Cyà bushùwà.

²⁰⁰ Kàdi, bàdi nè mutù mukolè wà dikèma, nebàcipetè anyi to, kabyèna nè cidibi bishintulula to. Kaa!

²⁰¹ Kàdi Basungula bàà Nzambi mbatùmina dīyì bwà kupàtuka munkaci mwàbò. “Tàpulukàayi,” mùdi Nzambi wàmba, “nè Mémè nèn nwàkidilè. Kanùlengi bintu byàbò byà pa buloba abi to, nènku Mémè nèngìikalè Taatù bwènù, anyi Nzambi, nènku nenwikalè bàna Bàanyi bàà balùme nè bàà bakàji. Kanwikadi mu cikòkedi cimwè nè beena bupidyà to, kàdi pàtukàayi muntwamu!” Nzambi mmuswè ditàpuluka nè bàà pa buloba. Yèyè mmuswè kwikala musangishìibwe neenù, Yèyè nkààayendè. Nènku cintu cyà bulongolodi cyenza kùdi bantu nànsha cimwè, dīgumba, anyi malongesha makwàtakaja kùdi bantu kabyàdyàkutwà makàsà panshi to. Nebikengelè Nzambi, Nyumà Mwìmpè, munda mwèbè, bwà kukusanga nè Nzambi. Kàdi mmunyi mùdi umanya nè udi Nendè? Nyumà Mwìmpè wàkafùnda Dīyì awu neàfile bujaadiki ku Dīyì dyònsò; nè bintu bimwèbimwè byàkenzà Nyumà Mwìmpè mu Dipungila Dikùlukulu abi, Yèyè neabyènzè mu Dipungila Dipadipyà; neènzè mpindyewu ànu mùshindù wùmwèwùmwè awu, bwalu Yesù Kilistò ùdi umweumwe awu makèlèlèlè, leelù, too nè kashidi. Nènku kanwèna baswikìibwe ku cikòkedi cyà malongolodi nè maalu à pa buloba to. Kanwèna baswikìibwe ku cikòkedi pàmwè naabò to. Kanùditéeki mu cikòkedi munkaci mwàbò to, kàdi pàtukàayi munkaci mwàbò! Nudi baswikìibwe ku cikòkedi cyà Kilistò. Amen. Baswikìibwe ku cikòkedi cyà Mukalenge Yesù Kilistò.

²⁰² Bible ùdi wàmba nè, mu matùkù à ndekeelu nekwikalè maèkèleeziyà, bu cibùmbà cikwàbò cyà Baabèlè. Mbafwànyine kwikala nè cimwènekelu cyà difwàna dyà Nzambi, kàdi bàvila Dīyì dyà Nzambi nè Bukolè, Bukolè bwà Dīyì Dyèndè. Nènku Dīyì ncinyi? Bukalenge bwà Nzambi ncinyi? Bìkèngela twikalè bàà mu Bukalenge kumpàlè kwà twètù kwikala bantu bàà Mfùmù. Mbanganyi bàdi bamanyè nànkù? Ambàayi

nè: “Amen.” [Disangisha didi dyamba nè: “Amen.”—Muf.] Èè, mmunyi mùdi ubwela mu Bukalenge? Bukalenge bwà Nzambi n’Diyi dyà Nzambi divwijibwe bukolè. Amen. Divwijibwe bukolè; dyumusha mpèkaatù, munkaci mwà kufila bimanyinu. Ncimanyinu cyà mûshindù kaayi? Piikalàbi nè N’Diyi dimwèdimwè dyakatwàlà Mòsà adi, neDitwalè cimanyinu cimwècimwè aci.

²⁰³ Cintu cimwècimwè cyakatàpululà Lotà wa civùmvù awu. Mpindyewu, tudi bamanyè nè Lotà ùvwa civùmvù, nè Yesù wákamba nè neciikalè cimanyinu cyà cikondo cyà nshìikidilu. Lotà wa civùmvù musòmbè kuntu kwàka, ùvwa mutèndeleeidi, bushùwà, yèyè nè mukàjèndè. Nènkù bàvwa bàà mu mafetè à mîshindù yònsò, nè yèyè nguvwa mulombodi wa cimenga, nènkù, kaa, kùvwa bintu búngi cyanààna munkaci mwà kwenzeka. Ùvwa mutèndeleeidi wa dikèma. Ùvwa mwà kucyònkomoja batangadiki nè bònsò bàvwa bàpìcila kuntwaku abo, ùvwa ànu bimpè mûshindù awu. Kàdi, kaa, mwanètètù, yèyè kàvwa Musungula awu to.

²⁰⁴ Tàngilàayi cyàkenzekà’s! Bwà cinyi? Nzambi umweumwe wakatàpulula nè kulwa kùdi Abraham nè kumuleeja dishindika dyà ditàpulula dyèndè...Uhm! Èyi Nzambi wa yàaya! Mûshindù mwinè wûndi njinga nè ngìkalakù—njinga nè ngìkalakù mwà kwenza cintu kampàndà bwà kunùfikisha ku diCimòna’s. Nzambi wàkaleeja Abraham, bu mùvwàye muditàpùlùle, Wàkamuleeja dishindika dyà bwalu abu, bwà nè Yèyè ùvwa nendè nè ànu munkaci mwèndè mene amu. Nè Yesù wákamba nè cintu cimwècimwè aci necyènzekè mu matùkù à ndekeelu. Abraham kàvwa ditungà to, ùvwa mu banyàabanyà, kàdi Nzambi ùvwa nendè. Ùkaavwa mumutàpùlùle dîbà adi. Tudi nè cyà kuditàpulula mu matùkù à ndekeelu aa.

²⁰⁵ Nènkù piikalàbi nè Nzambi wàkapà Mòsà cimanyinu, kupà Izàlèèlà, mupròfetà mulaaba maanyi, Dikunji dyà Kapyà, wàkapà Abraham cimanyinu. Yèyè—Yèyè wàkapèèsha Izàlèèlà cimanyinu. Wàkapèèsha bayiidi cimanyinu. Cimanyinu cimwècimwè aci, musangu wònsò! Cimanyinu cimwècimwè aci, Dikunji dyà Kapyà!

²⁰⁶ Pòlò, pàvwàye mu njila mutàngile ku Damàsèkè apu, kwàkakenka Dikunji dyà Kapyà kumpàlà kwèndè, dyàkafofomejà nè mèsù èndè mene, kumubyànkula panshi ku binù. Muntu mukwàbò nànsha umwe kààkaDimòna to. Bantu bònsò bàvwa biimàne bamunyungùlùke, kabààkaDimòna to. Ke Diyì kwamba nè: “Shawùlà, udi uNkèngesha bwà cinyi?”

²⁰⁷ Yèyè nè: “Mukalenge, Wèwè udi Nganyi?”

²⁰⁸ Yèyè nè: “Mémè ndi Yesù.” Cimanyinu! Nè yèyè ùvwa cinyi? Mùpostòlò kùdi bàà Bisàmbà byà bendè. Amen.

²⁰⁹ Ke twètù aba ku cikondo cyà nshìikidilu, tufùmina ku Esètè nè ku Wesètè, ku Nord nè ku Sud. Citùdi twenza ncinyi?

Tudilongolola bwà Dyambwibwa adi. Tudilongolola bwà... Bashààle biimàne twètù biinè tëndé munda mwà tusunsa tukese too nè pùikalà kajilu kònsò nè cyà kuujiibwa nè Nyumà Mwímpè. Pashìishe Yèyè neàbandè. Kaa, ekèlekèlè! Ûbìikila bantu Bèndè pàmwè kùdiYe Yèyè mwine, mu bùmwe bwà cyà bushùwà ebu nè Yèyè mwinè, bwalu n'Nyumà Mwímpè Wendè umwèpelè awu. “Ku Nyumà umwe nkutùdi bònsò babàtùjiibwe muntu-nkààya mu Mubidi wùmwe, mu kaabujimà Mubidi wà Yesù Kilistò.” Nè Yesù Kilistò udi musòmbe nè Nyumà Wendè mu mubidi wètù, ùdi munkaci mwà kusadila Èkèleeziyà nè wènza bintu bìmwebìmwè byàkenzàYe abi, bu—bu cimanyinu, bu cimanyishilu kùdi bàà pa buloba nè, tudi mu matùkù à ndekeelu, tudilongolola bwà Dyambwibwa. Kaa, ndi muMunangè, kàdi nwènù?

²¹⁰ Ncidi ànu nè mukàndà kaaba aka, kàdi ncyènà ànu mwà kutùngunuka kàbidi naawù to, dībà dikaadi diyè bikolè be. Ndi mwà kuwàmbula cikondo cikwàbò.

²¹¹ Tudi ku ndekeelu. Bùmwe. Nudi umwe menemene nè Nzambi anyi? Ke mùshindù wunwikalà nè cyà kwikala. Eyowà. Nebikengelè bwà twètù kwikala umwe Nendè too nè... Meeji àvwà mu Kilistò awu ikalè munda mwèbè. Dībà adi Kilistò, meeji Èndè Sungasunga munda mwèbè neàjingululè Dìyì dyònsò didiYe mufunde. Ààkenza nàнку mu bàpostòlò, kwabanya Mifundu mu mùshindù mujaalàme, yìdi miikàle Bulelèlè, nwamònu's, Nyumà Mwímpè. Cyòci ciikàle Bulelèlè, dībà adi Yèyè neàCifidile bujaadiki pa kutwàla cimanyinu cìmwècìmwè cyàkafilàYe kùdi Mòsà aci, cimanyinu cìmwècìmwè cyàkapèeshàYe Abraham aci, cimanyinu cìmwècìmwè cyàkenzelàYe kùdi Kilistò aci, cimanyinu cìmwècìmwè cyàkenzelàYe Pòlò aci. Tudi mu cikondo cyà nshìikidilu. Yèyè mmwambè nè necyènzekè. Tudi ku cikondo cyà nshìikidilu. Èkèleeziyà, mu kaabujimà, ùdi wènda ùdisanga mu didisanga adi, umwe apa nè umwe pàapa, wènda ùbànda.

²¹² Wākamba nè: “Nekwikalè bàbidi mu budimi, Nèngàngatè umwe.” Umwe. Tàngilàayi nè: “Bàbidi mu budimi,” mbwena kwamba nè mundaamuunya, dinowa: “Nèngàngatè umwe kàdi kushiya umwe. Nekwikalè bàbidi mu bulàalù,” luseke lukwàbò lwà buloba, “Nèngàngatè umwe kàdi kushiya umwe,” ku dilwa dyà Mwànà wa muntu. Kàdi didi pabwìpì menemene, dikaadi pabwìpì menemene.

²¹³ Kùdìdingi! Kùdìdingikù to, Adàmà! Adàmà! Evà, Adàmà, lekèlè nkwele lubilà lukolè, kùtèelejiku kàbidi mashimi à dyabulù to. Shààla nè Dìyì dyà Nzambi, Didi ng'EMU MMÜDÌ MUKALENGÈ WAMBA. Shààla nè Dìyì Dyèndè. Kutàpuluka Naadi nkushipa bwobùmwe bwèbè nè Nzambi, bùmwe bwà Nzambi ku Nyumà Mwímpè. Dībà adi wèwè wamba mùdi nè Nyumà Mwímpè kàdi kùyì upetangana nè Dìyì to, dībà adi kwèna mu bùmwe nè Nzambi to.

214 Eci's ki bùmwe bwà Nzambi, paùdi wêwê...nyu—nyumà ùdi mupetè ùpetangana nè Dîyi edi, nè ùmwènesha Dîyi edi nè ùvwija Dîyi edi bukolè bwà kwenza maalu mùshindù wùmweùmwè wàkenzàDi kuntu kwàka awu.

215 Tùcyàmbàayi pàmwe nè: “Bùmwe nè Nzambi nkwikala nè Nyumà wa Nzambi munda mwènù ùpetangana nè Dîyi, Dîyi dyònsò, Dîyi dyònsò mu kaabujimà, nè bwà kuDimwènesha mu bukolè.”

216 Ki bwalu mbwòbù abu's, aci ki bùmwe nè Nzambi. Pàdi bukolè abu bùkwàta mudimu munda mwànyi, bùkwàta mudimu munda mwèbè, tudi umwe. Amen! Mwanètù Kidd, pàdi bukolè bwà Nyumà Mwimpè munda mwànyi bùkwàta mudimu munda mwèbè, kakwèna dibèngangana dyà mèyi to, Dîyi didimù. Didi dikwàta mudimu. Amen. Didi diMuvwija cidiYe aci, Nzambi muvwijiibwe mubidi munda mwèbè ku Dîyi Dyèndè. Dîyi divwijiibwe bukolè munkaci mwènù, Dîyi dyònsò!

217 Mpindyewu, vùlukàayi nè, dyabùlù ùtu wàngata Dîyi adi dyàbùngi menemene, pàmwe nè byà pa lukàmà makùmi citèemà nè citèemà nè makùmi citèemà nè citèemà byàDi. Byà pa lukàmà makùmi citèemà nè citèemà nè byà pa lùlàmà makùmi citèemà nè citèemà byà cyà pa lukàmà aci, neàCyenzè ànu mu cyôci menemene, kàdi pashiishe neàtupikè àye àpa, nènku aci's ke cidi cilela lufù ànu mwaba awu. Aci's cidi cikòsolola mùyòòlòlò ànu pankàcìnkàcì, ke wêwè ùdi ùdishinda awu.

218 Dîyi dyònsò! Yesù wàkamba cinyi? “Muntu kààkwikala nè mwoyi ànu ku dyàmpà nkààyaadi to, kàdi ku Dîyi dyònsò!” Kì nku ndambù wa Méyi à Nzambi kwikalàye nè mwoyi nànsha, kì nku byà pa lukàmà makumi citèemà nè citèemà nè makumi citèemà nè citèemà byà Dîyi dyà Nzambi to. Kàdi ku Dîyi dyònsò didi dipàtukà mukana mwà Nzambi, muntu neikalè nè mwoyi ku Dyôci adi.

219 Sàtaanà kuMubàndishayè kuulu aku nè kwambayè nè: “Bààkafùnda nè!” Nwamònu's, ànu mwàkambilàye Evà nè: “Bààkafùnda nè! Bààkafùnda nè!”

Yesù wàkamba nè: “Nè bààkafùnda kàbìdi nè. . .”

220 Yèyè nè: “Bààkafùnda nè: ‘Yèyè neàtuminè Banjèlò dîyi bwà bwalu Bwèbè.’ Ke mùdi Bible mwambè's!” Balùmyàna, yèyè's mmumanyi wa dibàla. “Bààkafùnda nè: ‘Yèyè neàtuminè Banjèlò Bèndè dîyi bwà bwalu Bwèbè bwà Kùlu kutuuta dikàsà dyèbè ku dibwe to, nè nebàKwambùlè.’”

221 Yèyè nè: “Bààkafùnda kàbìdi nè: ‘Kùteeci Mukalenge Nzambi Webè nànsha.’”

222 Bòbò nè: “Tudi nè Mufundu,” Byenzedi 19, “tudi babàtijiibwe kùdi Yone.”

223 Pòlò uvwa nè cintu kampàndà cikwàbò, kwambayè nè: “Aci kacyèna kàbìdi cikumbana to.” Nwamònu anyi? “Yone

wàkabàtiiza ànu...” Yèyè kààkabènga kwitabuuja dīyī dyà Yone to. Yèyè nè: “Nènnwambilè cyàkambà Yone. Yone wàkamba nè wàkabàtiiza bwà kanyinganyinga, kī mbwà dilekelediibwa dyà mpèkaatù to.” Mulàmbù awu kawùvwa mushebeya to, nwamònu’s. Yèyè nè: “Yèyè wàkabàtiiza bwà kanyinganyinga, wàmba nè bìvwa bìkèngela bwà nwènù kwitabuuja Ewu uvwa nè cyà kulwa awu.” Nènku pààkumvwàbo cyôci eci, bààkabàtijiibwa mu Dīnà dyà Mukalenge wetù Yesù Kilistò. Pòlò kubàtentekela byanza mùle tètè nè Dīyī, ke Nyumà Mwímpè kubàpwekelaYè. Bààkabanga kwamba cipròfeta, kwakula mu myakulu, kutùmbisha Nzambi, nè cikondo kaayìpù’s wè! Kaa, ekèlekèlè. Cìvwa ng’èkèleeziyà wa bunène bishi’s? Dikùmi nè bàbidì. Eyowà. Kaa, Nzambi kàtu ùkwàta mudimu nè bùngì bunène to, Ùdi ùkwàta mudimu mu myoyi yà meeji matòòke. Tùpetààyikù mwoyi wà mùshindù awu. Nudi baMunangè anyi? Tùsambilàayi.

²²⁴ Kaa, munanga wanyī mulalakanyi, udi mulengàmìne bàna bàà bakàji bàà Moàbà anyi udi mumòne bàna bàà bakàji (Ndi ngààkula bwà maèkèleeziyà) bàà Kaayinà anyi? Mbalalàkàne ntàntà bule kaayi nè Dīyī’s wè! Udikù, mulundà wanyī wa mushinga mukolè, udikù mumòne nè mu matùkù à ndekeelu aa nè bintu ebi mbyenzèke anyi? Nuvwaku bamòne matùkù mashàale aa mùdi Dīyī dyà Nzambi munkaci mwà kumwènèshiibwa anyi? Mùshindù wùvwà ditàbuluja dyàkatuutà kale wàwa adi dibùtame, kī nkushàale kantu nànsha kàmwè to? Ncinyi aci? Ncinyàànyà cyà kumpalà kwà cipeepèlè cicolè. Manyooka àkaadi pabwipi. Nuvwa munkaci mwà kutàbalela bintu ebi anyi? Nudikù bapàlàkàje Mufundu nè Mufundu, Dīyī dyà mu Bible nè Dīyī dyà mu Bible, cileeeji nè cileeeji anyi? Nudikù bapàlàkàje Dīyī dyà Yesù dyàkambàYe nè dyabùlù mu matùkù à ndekeelu...bìvwa mwà kwikala bifwànàngàne menemene, byenze bu cintu cilelèlè, mu mùshindù wà nè bu byòbì mwà kwenzeka yèyè’s mmufwànyine kuseeswisha muntu yònsò pa kuumusha Basungula, Basungula Abu. Anji elàayibi ànu meeji, dilongesha dyà mu Mifundu adi nedìkale ditàmbe kufwànangana be! “Kaa, tudi twitabuuja Nyumà Mwímpè, Nzambi àbèneshiibwè bwà kashidi! Tudi nè Nyumà Mwímpè, tudi twakula mu myakulu.” Kàdi pashìishe kukùdimuka kàdi kuvila Dīyī anyi? Èyowà. Nwamònu’s, nèaseeswishè Basungula mene bu nè bìvwa mwà kwenzeka.

²²⁵ Kwòkò muntu kampàndà mwab’ewu udi kàyì mu bulongàme nè Nzambi to, kwòkò muntu kampàndà mwab’ewu udi usaama anyi mu lutàtù...Kùdi mìshwàlà nè bintu bitèèka mwab’ewu, nèmbisambidilè. Dikèngela dyùdi naadi nànsha dyòdi diikàle cinyi. Mulayi wònsò mu Mukàndà ngwèbè wèwè. Ngwèbè wèwè.

²²⁶ Mpindyewu, ndi munùtwàdile Dīyī, muDìtwàle kwambwila ku Genèsè too nè ku ditùkù ditùdi nè mwoyi edi, ndenga ànu myaba ayi nè nnùleeja’s. Mvwa mwà kulenga myaba nkàmà

yàbûngi pa kuumusha yôyi ayi, ncyênà nè dîbà to. Kàdi bulelèlè, mu cyôci aci, nudi mwà kumòna nè cintàkanyì cyà bulongolodi eci kacýenamù to. Mmwènenu wa mashimi wa dyabùlù, ùteeta bwà kuvwija muntu bulongolodi nè bwobùmwe bwà meeji èndè sungasunga nè dyela dyà meeji. Pàdibi nè, nku Nyumà Mwímpè kutùdi baswikàkàne nè Nzambi bu umwe. Nè Nyumà Mwímpè ùdi wítabangana ku mèyi nè Dîyi dyà Nzambi. Nwamònu's, Bible mmwambè, Yesù wàkamba nè bàvwa mene mwà kuciìjkula, nudi numòna's: "Kuseeswisha nè basungula mene bu nè bìvwa mwà kwenzeka." Nudi bamòne mwaba wutùdi biimànyìne anyì?

²²⁷ Mpindyewu ambulà Dîyi dyà Nzambi edi mu cýanza cyà diitabuujà aci. Cidi cikukèngela mu dindà emu ncinyì? Bidi bikukèngela dibàtiiza dyà mu màyi mu Dîna dyà Yesù Kilistò anyì? Ciinà cyà màyi cidi bwàshì. Bidi bikukèngela dibàtiiza dyà Nyumà Mwímpè anyì? Yèyè ùdi ùteeta bwà kuseba njila Wendè kubwela munda mwèbè. Bidi bikukèngela dyondopa anyì? Mòna's, Nyumà Mwímpè mene Yèyè mwìnè, Dîyi didi divwijibwe bukolè adi, ùdi apa mene mpindyewu, bukolè mene bwà dijingulula bùdi munkaci mwà kutàngila pa batèeleji apa mpindyewu nè bùmòna Bukénké abu munkaci mwà kwenda kudivunga bu nsèsà. Kacya nkààdikù munwàmbile cintu kampàndà cyà mafi anyì? [Disangisha didi dyàmba nè: "To."—Muf.]

²²⁸ Kacya nkààdikù, mùvwà—mùvwà mupròfetà mwambile Izalèlèlè kumpàlè kwà kubàpetelayè mfùmù kampàndà mukwàtakaja kùdi bantu, yèyè nè: "Kacya nkààdikù munwàmbile cintu kampàndà...? Kacya nkààdikù mwangàte mfrangà yènù anyì? Nkààdikù kacya mulwè kunùlòmba mfrangà anyì—anyì ngènda njèmbelèla bwà kusòmba mu nzùbù minène yà baamfùmù nè kwibaka bintu binène bwà kwangata mfrangà yènù anyì? Nkààdikù kacya munùlòmbe nànsha dyeyà anyì?"

"Nànsha kakesè."

²²⁹ Kacya nkààdikù munwàmbile cintu kampàndà mu Dîna dyà Mukalenge citù Nzambi kàyì mucifikishè ku dyenzeka anyì? Nkààdikù kacya mwakùle mu Dîna Dyèndè cintu citù kaciyi nànkù anyì? Nkààdikù munwàmbile cikeènà-kumòna mu batèeleji citù muntu kacya kàyì mujuukile kuulu, mwenyi anyì cyònsò cìvwàye mufwànyìne kwikala aci, kàyì mwambè nè "Aci mbulelèlè" anyì? Kacya nkààdikù munwàmbile cintu kampàndà cyà mafi anyì? [Disangisha didi dyàmba nè: "To."—Muf.] Pashìishe lekèlaayi nnwàmbilè mpindyewu nè: EMU MMÙDÌ MUKALENGÈ WÀMBA, petàayi Nyumà Mwímpè, Nyumà wíkala mwà kwangata Dîyi dyà Nzambi mu byanza byà diitabuujà abi awu, kupàtuka kuya kwàka. Bukalenge bujimà mbwènù nwènù. Mbwènù nwènù, bânà.

²³⁰ Bwà cinyì nudi nufùmìna ku Géorgie, mu ditunga dijimà, ku Ohio, ku Kansas, myaba yònsò, bwà kaadisangisha kakesè? Ndi

Èmanùwèlè, mùdi beena bupidyà biinyija mwînshì mwà nkwaaka awu, nè bàjìmiya dikeji dyàbò dyònsò dyà dipiilà. Kacya ànu ku diitabuuja ngaamòna musùlu awu wùtù mpùtā Yèbè mifile, dinanga dipikudi ndikaadì cyànyì cyena-bwalu, nè nediiikalè nàнку too nè pangààfwà.”

²³⁶ Taatù wetù wa mu Dyulu, mushikì wà mishwâlā ngwôwò ewu mwadija kaaba aka, gants, bìdi mwà kupàtuka kuya mu mikàndà mifundilangana. Ncyèna mumanyè nè nganyì udi muyitèeke kaaba aka to, pāmwapā m’Billy, pāmwapā mbantu bàdi mu batèeleji emu aba. Ndi ndyùmvwa ànu bwà kwenza cyôci eci mpindyewu, Mukalenge. Kakwèna cintu nànsha cìmwè mu byanza byànyì, cintu nànsha cìmwè mu mémè bu muntu to. Ncyèna mwà kweyemena dyumvwa dyànyì mémè mwìnè dyà buntu to. Ncyèna ngùmvwa nè mbwà cinyì bìdi nàнку to, kàdi ndi munkaci mwà kulonda ciWākambā. “Bāvwa bāngata pambidi pāā Pôlò, mishwâlā nè tulùlù, nè nyumā mibi yivwa yipàtuka mu bantu.” Kabivwa nè mbwalu yèyè ùvwa muntu munène to, mbwalu Nzambì ùvwa nendè mu Dīyì nè mu bukolè. Nè yèyè kàakakonkakù bàpostòlò to, kàdi kujandulayè pàakatwilanganàbo pāmwe nè Èvānjeeliyò umweumwe awu, mùshindù wùmwèwùmwè wà dibàtiiza awu, cintu cìmwècìmwè cìvwàbo bènza aci, bivwa mu kantu nè kantu ànu mùshindù wùmwèwùmwè awu.

²³⁷ Mpindyewu ndi ndòmba, Mukalenge, bwà bantu bàā mushinga mukolè bàdi baKwitàbùùje aba, bwà Ûbòndòpèku. Bàdi mu batèeleji emu aba, bòndòpèku, Mukalenge. Swākù bwà diitabuuja dyàbò dibandè nè dikwatè Dīyì adi ànu mpindyewu, nè dyamba nè: “Cyùjā cyà kansèrè, bubèèdì, bubì, s’mbipiciibwe nè wèwè muumùke, ndi munkaci mwà kukòsa nè Mwelè wà mvitā wà Nzambì! Ndi ngiitabuuja! Diitabuuja dyànyì ndikolè. Ndi nsàka Mwelè wà mvitā ngùbweja mu ndòndò. Uumùkà mu njila wanyì! Ndi njuuka mu nkwasā wanyì, bwà kuumvwa bîmpè.” “Ndi ntènteka cyanza pa tàatù wanyì, pa mwanèètù wa bakājì, mwanàànyì mulela, pa mwena mutumba naanyì. Ndi ngiitabuuja. Dīyì Dyèbè didi Bulelèlā. Mémè ndi mu bùmwe Neebè. Byenzedi byÙvwā mwambè nè Wèwè udi mwenzè abi, twètù pèètù tuvwa mwà kubyènza. Mukalenge Nzambì, ndi ngiitabuuja Dīyì dyònsò. Nènku ndi ngènda nseemena, ngènda nseemena bwà kucinana, bwà kucyàmbula mu dindà emu.”

²³⁸ Kaa Nzambì, mùshindù mene wùmvwā mwà kwela meeji pāvwa èkèleeziyā munkaci mwà kukwàta mudimu, pàakakwàcìkà Mòsà bwôwā bukesè lwā kwînshì kwā mbù aku, wākabanga kwela mbilā kùdì Mukalenge. Ke Mukalenge kwamba nè: “Cyùdì welela mbilā kùNdi ncinyì? Cyùdì uNgeelela mbilā ncinyì? Akùlā ùye kumpālā! Ncyènàku mukutùme bwà mudimu ewu anyì? Akùlā!” Kwakula cinyì? Dīyì dyà Nzambì. “Didi munda mwèbè. Akùlā ùye kumpālā. KùNgeedì mbilā to. Ndā mutàngile kumpālā.”

²³⁹ Nènku, Mukalenge Nzambi, leelù ewu nyèwù ndwa mu Dìná dyà Mukalenge Yesù. Ndi ndwa ngènda nkùpa Mwelè wà mvità wà diitabuuja ewu, ntonda bùmwe bwà Nzambi nè muntu ku Nyumà Mwîmpè, ku luse nè mulàmbù wà Yesù Kilistò Mwan'Èndè. Ndi ngèèla démon yònsò udi muswike muntu mu mùshindù kanà wònsò mu nzùbu emu kadyòmbò, nànsha yèyè mwikàle mwànà wa balùme anyi wa bakàjì, mulùme anyi mukàjì. Ndi ngèèla bubèèdi bwònsò kadyòmbò. Ndi ngèèla mpatà yònsò kadyòmbò. Ndi ngèèla bwòwà bwònsò kadyòmbò. Ndi ngèèla cyònsò cidi cibi kadyòmbò, umùkaayi mu batèèleji emu mu Dìná dyà Yesù Kilistò! Pàtukàayi mu batèèleji aba, bwà twamòna mwà kwikala umwe nè Nzambi nè twamòna mwà kukwàcila Nzambi mudimu kakùyì màsaamà anyi bwòwà to. Swàkù bwà bukolè bwàkatwènzà umwe nè Nzambi abu... Mmunyi mùdi dyabùlù mwà kufuuna mu nyùngulukilu wa balaaba? Mmunyi mùdi démon awu mwà kwimana mwaba awu kàdi kufuuna yèyè mwine bu Goliyàtà? Pàakabwelà Davidi mu citùùdilu, nè kwamba nè: “Nudi nuswa kwamba nè nudi nulekela mwena Pelèshèètè udi kàyì mutengula awu mwimàne mwaba awu wèla bilwilu byà Nzambi udi nè mwoyi kadyòmbò anyi?”

²⁴⁰ Éyi Nzambi, fikishàku balùme nè bakàjì ku dijuuka mu bukolè bwà Nyumà. Kulekela dyabùlù mutuucike udi kàyì mukùdimùne mucima awu, udi mukèngèshèkèngèshe bukwàbantu mu bikondo byònsò ebi, wimana apa nè wèla èkèleeziyà wa Nzambi udi nè mwoyi kadyòmbò anyi? Sàtaanà, pàtukà, nè umùkà, mu Dìná dyà Yesù Kilistò!

²⁴¹ Mpindyewu, nwènù bàdi nè dikàndà dikùmbàne bwà kukùpa Mwelè wà mvità, mpindyewu unùdi nè lumvu lukùmbàne mu Dìyi dyà Nzambi bwà kuDìnana bu cintu cyènù sungasunga, udi mwà kwambula Dìyi dyà Nzambi mpindyewu mu cyanza cyèbè, kuDikwàta mu cyanza cyà diitabuuja, nè kwamba nè: “Ndi ngiimana ku luseke lwà Mukalenge. Nèngiikalè bùmwe nè Nzambi wanyi, kubangila ànu mpindyewu mene. Mèmè nènkupe Mwelè wà mvità wà Nyumà ewu mu Dìyi edi, nè nènkosè dyabùlù ku mulayi wònsò wùdi Nzambi mundayè.”

²⁴² Wèwè mwitàbùùje nànkù nè mwoyi wèbè wònsò, ndi nkulòmba dîbà adi nè meeji matòòke ónsò nè mwoyi wànyì wònsò, mu Dìná dyà Yesù Kilistò, juukilà kuulu ùcitàbè. Ke cyùdi muswè kwamba anyi? Udi nè meeji matòòke anyi? Dìyi didi mu cyanza cyèbè anyi? Cyanza cyèbè ke diitabuuja dyèbè anyi? Elà cyanza cyèbè cyà mubidi muulu kùdi Nzambi, wamba nè: “Nzambi, ku eci, ku cyanza cyànyì cyela muulu ndi mfilà mwoyi wànyì wònsò. Ndi mfilà musùukà wànyì, ndi mfilà meeji àànyì, ndi mfilà byònsò ku Dìyi dyà Nzambi. Nyumà Mwîmpè àngatè diitabuuja dyànyì mpindyewu nè àmpèèshè cintu aci. Kòsa mpatà yònsò ùyumùshè mu mèmè. Nènku, ku diitabuuja, ndi mpeta mulayi wùndi ndòmba, dîbà edi mene.”

²⁴³ Panwìkalà nuciitabuuja, ambàayi nè: “Amen,” mpindyewu. [Disangisha didi dyamba nè: “Amen.”—Muf.] Ambàayi nè: “Amen,” cyàkàbìdì. [“Amen.”] Amen, amen, amen! Dìbà adi, wêwè muswè kwamba aci nè mwoyi wèbè wònsò, mu Dìná dyà Yesù Kìlistò, ndi nkulaya cyûdi mulòmbe aci. Amen. Nudi nuciitabuuja nè mwoyi wènù wònsò. Nzambì ànùbènèshè.

Mwanèètù Neville. 

62-0211 Bùmwe
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org